

عاشقِ حقیق

8



أحمد يونس

[HTTPS://T.ME/MKBTARAB](https://t.me/mkbtarab)





الـعـنـوان : الأثم  
المؤلف : أحمد يونس  
إشراف عام : نجلاء محمد رضا قاسم



جمهورية مصر العربية  
15 ش يوسف الجندي متفرع من شارع البستان - باب اللوق - القاهرة  
تليفون: +202 24517300 - +2 01271919100  
email: samanasher@yahoo.com - publishing@sama-publishing.com

مدون الرواية: حسن الحضري  
إخراج داخلي: حمدي إدريس

جميع حقوق الطبع والنشر محفوظة  
لدار وسعاء للنشر  
يحظر طبع أو نشر أو تصوير أو تخزين أي جزء من هذا الكتاب بأية وسيلة إلكترونية أو ميكانيكية أو بالتصوير  
أو خلاف ذلك إلا بإذن كتابي من الناشر فقط.

التقديم الدولي: 2 - 593 - 781 - 977 - 978

رقم الإيداع: 2023 / 28378  
[HTTPS://WWW.MKTPARAB.COM](https://www.mktparab.com)

اللهم

احمد يونس [WWW.MKTBTARAB.COM](http://WWW.MKTBTARAB.COM)

ننشر على الترتيب من النشر على القنوات الاخرى مؤقتاً

وجميع الحصريات ستكون على

هذه القناة في الوقت الحالي

تلقوا

<https://t.me/MktbtArab>

# اهداء

إلى أصحاب الفضل فيما حققته..

إلى كل قارئ..

إلى كل مستمع..

إلى كل محب ..

إلى (عيلة أحمد يونس) الغالية ..

وأنا أتم عامي الـ ٤٣ ..

أهديكم هذه الرواية ..

♥ وأتمنى أن تليق بمكانتكم في قلبي

أحمد يونس

[HTTPS://T.ME/MKBTARAB](https://t.me/mkbtarab)

[HTTPS://T.ME/MKTBTARAB](https://t.me/mktbtarab)



(مقدمة)

[HTTPS://T.ME/MKBTARAB](https://t.me/mkbtarab)

(قبل صدمة البداية)

نادر: أيوة يا أمنية خير؟

أمنية: إنت ما بتتردش على المكالمات ليه؟

إحنا بقالنا فوق الاسبوعين بدتصل بيك.

نادر: علشان مش فاضي لهيافة بتاعتكوا، خلّصي

عايزة إيه؟

أمنية: هو إيه الطريقة دي؟!

على العموم أنا بكلمك علشان الشيخ لطفي تعبان جداً

وطلب يشوفك

نادر(ساخراً): ماهو على طول تعبان، إيه الجديد؟

أمنية: بقولك تعبان وعايز يشوفك إنت فاهم أنا أقصد

إيه؟

نادر: هيموت يعنني؟ الموت علينا حق

أمنية: نادر إنت نسيت إن الشيخ لطفي هو إلهي علمك

كل حاجة وقربك من ربنا وله أفضال عليك



نادر(مقاطعاً): أنا محدش له أفضل عليّا أنا كل إلهي  
وصلتله ده بتعبي ومجهودي، وإن كان على شغل ال 3  
ورقات فمش هو إلهي علمهولي.

أمنية: براحتك، أنا مش عارفة إيه إلهي جراك!

نادر: خلاص ماتعيطيش إديني شهر كده ولا حاجة  
وهنزل أشوفه.

- أنهى نادر المكالمة لتتحدث إليه علا السكرتيرة  
الجديدة في جريدة عمق الحدث.

علا: دي أمنية أختك إلهي كُنت بتكلمني عليها يا أستاذ  
نادر صح؟

نادر: أيوة أمنية أختي الزنانة.

علا: ملكش حق تكلمها كده

نادر: سيدك وقوليلي إيه سر حلاوتك النهادرة؟

علا(بخجل): بجد؟! أخذت بالك إن أنا غيّرت تسريحة  
شعري؟

نادر: بصراحة لأ، بس إنتي كده كده حلوة على طول،  
فاتحتي ماما في موضوعنا؟

عُلا: نادر دي المرة الرابعة إليي تدي ماما معاد علشان  
تقعد معاها وماتجيش وكل مرة بَعُذر جديد  
نادر(مُبتسماً): إيه ده همّ مش 6 مرات يبقى قاضلنا  
لسه مرتين.

عُلا: نادر إذت بتتسلى بيا؟

نادر: عُلا بلاش شغل الدراما ده، أنا إليي طلبت اتقدمك  
مش إنتي إليي طلبتي، بقولك إيه صحيح أخبار ماهر إيه؟  
عُلا: ليه هو إنت مش عارف إنه إترقد بسببك؟

نادر: ياشيخة حرام عليكى أنا كل إليي عملته إنى  
سجلت له وهو بيشتّم في السياسة التحريرية للجورنال  
ويعتّ التسجيل لمن يهّمه الأمر كده أبقي أنا إليي رفته  
بردو؟

عُلا: نادر ممكن نقفل الموضوع ده علشان أنا من الأول  
رافضة طريقة تعاملك مع الكل مؤخراً، نادر إذت الكل

كان بيتحاكى بأخلاقك قبل ما أجي، دلوقتي الكل حرفياً  
بيخافوا منك

نادر: لأ حضرتك أنا قررت أوريهم نادر الجديد  
عُلا: تمام يا نادر على العموم ماما مستنياك النهاردة  
الساعة 7، أنا قايمة أشوف شغلي

نادر: طب مش ناسية حاجة؟

عُلا(بخجل): حاجة إيه؟

نادر: الملف إللي طلبته منك

عُلا: يا نادر إنت بتطلب مني طلب مستحيل، إزاي أدخل  
مكتبه وأسرقه ورك

نادر: البنات مابتغلبش يا لولو

عُلا(غاضبة): بعد إذتك يا نادر

ماتستغربوش من إللي قرأتوه لأن أنا نفسي وأنا بكتب  
ليكم الرواية دي مصدوم من نفسي، بس كل إللي هطلبه  
منكم سبعة صدر وصبر لأن إللي جاي كله مسار عكس  
التيار

<https://t.me/mktbtarab>

- أنا نادر فودة الصحفي بجريدة عمق الحدث باب ما

وراء الطبيعة

- أنا الصحفي الذي عاندته الدنيا وكلما ظن أنها فتحت  
له ذراعيها اكتشف أنها تحكم قبضتها عليه حتى تُنهيه  
تدرجياً.

المكالمة إلي شوفتوها بيني وبين أختي أمنية الحقيقة  
مكانتش المكالمة الأولى سواء معاها أو مع غيرها.

نفس السرود الجافة، نفس الكلمات القاسية، نفس  
الفتور في المشاعر مع الجميع.

أنا مش فاكر إتغيرت إمتي، لكن فاكر كويس كل المواقف  
إلي مرت عليا على مدار سنتين من بعد آخر رواية قرأتوها  
ليا، سامحوني لو حسيتوا إن كلامي غير مترابط وسردي  
غير متناسق يمكن في الآخر ألاقي عندكم عُذر أقدر أقوله.

[HTTPS://T.ME/MKBTARAB](https://t.me/mkbtarab)

# الفصل الأول

(عودة مدبولي الساعي)

[HTTPS://T.ME/MKBTARAB](https://t.me/mkbtarab)

دخل مدبولي الساعي على نادر بكوب عصير البرتقال المعتاد لنادر وأخرج من جيبه خطاب وأعطاه إياه.

نادر: هات يا وش الفقر

مدبولي: إنت ليه مش عاوز تصدق إنني توبت؟

نادر: علشان يموت الزمار وصوابعه بتلعب يا حلو

مدبولي: بس إللي مات مش زمار يا أستاذ نادر، إللي مات ده إبني، وهو بيموت بين إيديا حلقني أبطل كل حاجة بتغضب ربنا

نادر: يعني مش عايزني أكتب عنك بقى؟ ده إنت كُنت كُله أما تقابلني تقرفني بحكاية إنني أكتب عنك ولا ناسي؟  
مدبولي: بقولك إبني مات إنت ما بتحسش؟

نادر: أنا مش هحلك يا مدبولي غير لما تديني الكتاب إياه

مدبولي (متعجباً): بقولك ده كتساب كُفر ولو قرينه هتدخل في طريق ضلمة عُمرك ما هتقدر تخرج منه أبداً  
نادر: ليه هو أنا أهبل زيك؟

مدبولي: كتر ألف خيرك

نادر: على العموم أنا إللي رجعتك الشغل وأنا برودو إللي  
هقطع عيشك لو ما إدتنيش الكتاب ده

مدبولي: أبوس إيدك أنا مابقاش حيلتي مليم غير  
المرتب إللي هنا لو مشيتني هجوع

نادر: تبيع الكتاب ده بكام يا مدبولي؟

مدبولي: كان يوم أسود يوم ما حكيتك عن الكتاب ده  
كُنت فاكرك عاقل ومش هتطمع فيه

نادر: إخلص

مدبولي: قولي هتعمل بيه إيه؟

نادر: مايخصكش، قدامك من هنا لبكرة يا الكتاب يا  
الرفد وهات الجواب وحت العصير وغور يلاً.

نادر (مُتحدثاً إلى نفسه): هتجيبه يا مدبولي بكيفك أو  
غصب عنك.

(مشهد مُكرر ونبوءة مُبهمَة)

خرجت من الجورنال علشان ورايا كذا مشوار عايز أعملهم  
وكل إللي فسي دماغِي إزاي أخذ الكتاب ده من مدبولي، أينعم

أنا مش متأكد من كلام مدبولي ليا قبل كده عن قدرات الكتاب ده بس مدبولي القديم كان دايماً بيحب يفتخر بعمايه السودا وكون إنه قدر يعمل كل المصايب دي سواء إلهي معايا أنا وهالة أو مع غيري بالكتاب ده فده مالهوش غير معنى واحد، الكتاب ده عبارة عن كنز والغبي ده مش عارف قيمته ولازم الكتاب ده يقع في إيد حد زبي يستغله صح.

خلصت مشاويري وكنت ماشي في شارع هادي وكانت الساعة حوالي 5 ونص المغرب سمعت دوشة وزعيق وشوفت مشهد بيتكرر قدامي بكل تفاصيله، محل فراخ مشوية، العُمال إلهي فيه بيتردوا واحدة ست عجوزة وبيقولوا لها امشي من هنا يا وش النحس إحنا ما بنوزعش أكل ببلاش، المشهد ده شوفته قبل كده مع إختلاف الأكل، المرادي فراخ مشوية والمرة إلهي فانت كان كُشري والقاسم المُشترك هو الست العجوزة إلهي لابسة جلابية وطرحة سودا وضهرها محني من الزمن وبتمشي بصعوبة وفي إيدها عصاية خشب بتسند عليها، عرفتوا مين الست دي؟ الست دي تبقى جوهر.



جريت عليها وإللي أول ما شافتني فرحت ودار بيذا  
الحوار الأتي:

جوهر: إزيك يا نادر يا بنني، كل ده ما أشوفكش؟

نادر: هو أنا أعرفك عنوان ياسست جوهر علشان أجيلك  
كده كده بديتقابل بالصدفة، عاملة مشاكل وقلق ليه؟

جوهر: مش عاوزين يدوني فرخة جاتهم السم لما  
يهري بطونهم

نادر (ضاحكاً): إن كان على الفرخة بسيطة هجيبها لك  
شوفي عايزة إيه تاني أجيبه بالمره

جوهر: عوزاك ترجع عن إللي في دماغك

نادر (مُتعباً): بدأنا الكلام إللي مش مفهوم بقى

جوهر: إللي بتحفر عليه هتاخده والله يكون في عونك  
على شره و أذاه

نادر: من غير أُلغاز الله يباركك تقصدي إيه؟

جوهر: وريني إيدك يا واد يا نادر.

تفحصت جوهر كف إيدي وقالتلي:

3 حزائي وحزتك هيخرج من الخزانة

- طريق مامنوش خروج، الحزن عليك مقدر ومكتوب

- ربك ما بيتعاندش يا نادر

نادر: قلقتيني يا جوهر

جوهر: بير اسود مالوش قران. و وقوعك فيه مبقاش

إختيار

هتأذي أقرب الناس ليك.. و برغم كده كلهم في ضهرك

لحد ما ربنا يشفيك

أذاك هيطول الحبايب والقرايب وأهلك إالي جابوك

وفي وقت الشدة هايتكاتروا كلهم عليك يمكن يلحقوك.

وهات يلاً الفرخة علشان أنا جعانة

نادر: عُمرك ما قابلتيني وقولتلي كلام أقهمه دايماً

بفسر كلامك بعد خراب مالطا

جوهر: الفرخة وإلا همشي

نادر: حاضر يا ستي.

- ودخلت جبتلها الفرخة ورجعت علشان أحاسب

طلعت لقيتها فص ملح وداب.

رُوحت البيت ودماعي عمّالة تودي وتجيّب ما أخبش  
عليكم أنا مش فارق معايا حد يتأذي أنا إللي يهمني  
دلوقتي نادر فودة وبس، علشان كده شلت كلام جوهر من  
دماعي وما فكرتش فيه تاني.

دخلت نمت علشان الصبح هيكون ليّا مع مدبولي كلام  
تاني.

الساعة 8 ونص الصبح كُذت على مكتبي برتّب ورقي  
فتحت الدرج. طلّعت منه الجواب بتاع إمبارح علشان أقرأه.

- فتح نادر الجواب وبدأ يقرأ..

إلى أستاذ نادر فودة..

أنا ببعت بعدما دلوني إن حضرتك الوحيد إللي تعرف  
مشايخ يقدرُوا يساعدوني في مشكلاتي.

وأنا عارفة إن شرط حضرتك إنك تُنشر القصة بتاعتي  
بس ياريت تكون بدون ذكر إسمي.

أنا مش بعرف أعبر عن إللي عاوزه أقوله بالكتابة،  
ممکن أقابل حضرتك وأحكيلك كل حاجة

أرجوك يساعدني إذا فكرت أكثر من مرة في الإنتحار

أرجوك إتصل بيّا أي وقت إنشالله نص الليل

رقم تليفوني .....0122

- قفل نادر الجواب وطلع موبايله وإتصل على طول

بالرقم

نادر: أيوة ياستي معاكي نادر فودة

صاحبة الجواب: الحمد لله .. الحمد لله

نادر: طب ياستي يرحمكم الله، هتقوليلي إسمك ولا

إيه؟

صاحبة الجواب: أنا بسنت

نادر: أهلاً يا بسنت، إنتي مزين؟

بسنت: من عابدين

نادر: كويس قريبة من شقتي

بسنت: أفندم؟

نادر: أقصد يعني قريبين من بعض ونقدر نتقابل

بسنت: ياريت بجد

نادر: فاضية الساعة 6؟

بسنت: موافقة نتقابل فين؟

نادر: في أي كافية في وسط البلد، اوصلي وكلميني  
وهو صلك سهل

- غادر نادر مكتبه متجهاً لوسط البلد .. وبعد مكالمة  
تانية مع بسنت كان في المكان وقاعد معاها على ترابيزة  
3 في الكافية

نادر: صوتك حلو بس شكك أحلى

بسنت: مديشك كتر خير، أحكي لحضرتك إمتي؟

نادر: مستعجلة ليه، إحنا قاعدين مع بعض شوية  
نتعرف على بعض

بدأت بسنت تقلق من نظرات نادر وطريقة كلامه ..

بسنت: لأ أنا عاوزة أحكيك علشان تقولي أعمل إيه

نادر: مفيش مشكلة أنا جاي علشان أسمعك، إتفضلي

بسنت: طب أنا إللي فهمته من إللي رشحوك ليا إنك

بيكون معاك جهاز بتسجل عليه و ورق وقلم علشان  
بتكتب

نادر (ساخراً): إللي قالوك! هو إنتي أصلاً ما سمعتيش

عني؟! <https://t.me/mktbtarab>

بسنت: أسفة أنا إللي عايشاه مش مخليني أعرف أتابع  
أي حاجة

نادر: ولا يهـمك إللي قدامك مخه دفتر مش محتاج  
أسجل حاجة

بسنت: براحتك هو كان علشانك أصلاً

نادر: إحكي يا بوس بوس

- زاد إرتياب بسنت من نادر أكثر وخصوصاً إن كل إللي  
إتحكى لها عنه إنه شخص جاد جداً وبتاع شغل وعمره ما  
كان غير كده أبداً، لكن إللي هي شايفاه عكس ده تماماً.

الفصل الثاني

(لا زلتُ أنسة)

[HTTPS://T.ME/MKBTARAB](https://t.me/mkbtarab)

أنا واحدة زي كتير ضحية تربية غلط وفكر رجعي متخلف  
عملت كل إللي أقدر عليه علشان أخرس الكل.

أنا عندي 37 سنة ولا زلت آنسة ... في عُرف العقل ده  
نصيب وفي وقت هلاقي الشخص المناسب ليًا وفي عرف  
الدين (كل شئ بميعاد).

لكن في عُرف أمي أنا مصيبة متحركة في البيت وكل يوم  
بيعدي عليًا هو إضافة لأحزان وآلام لأمي لا حصر لها!  
عايشة ليل نهار علشان أسمع جُمل مُكررة من المعارف  
والقرايب لدرجة إنني ممكن أسمعها لك.

- مش هنفرح بيكي؟

- هي الرجالة جرالها إيه؟

- إنتي ما بتروحيش أفراح ليه علشان تتشافي؟

- ماتتجوزي واحد مطلق أهو ضل راجل ولا ضل حبيطة

يا بنتي.

- جايبالك عريس أرمل بس معاه 3 عيال.

- جايبالك عريس عنده 52 سنة بس بصحته.

كل ده داير حواليا، لكن أمي كانت دايرة في فلك آخر.



ماما فضلت تدور في سلك الدجالين (مش الشيوخ)  
وأهو كلهم بيقولوا لهم يا سيدنا الشيخ.

لحد ما جت في مرة وقالتي بكرة هنروح لواحد يمكن  
نحسك يتفك؟

هل متخيل إنني يا أستاذ نادر إنني أجرو أرفض؟

هسمع وابل من التوبيخ من أمي الحبيبة.

وتاني يوم كُنَّا في القلعة عند حلال العُقد..

ولايسين عبايات سودا زي ما إشتربت على ماما..

وقفنا قدام الباب وكانت الساعة حوالي 9 بالليل وطلعت

لنا واحدة ست فتحت لأمي كيس أسود فلاقيت ماما خرّجت

من معاها حاجة ملفوفة في جورنال وبتحطها في الكيس

بسرعة علشان ماخدش بالي..

بعدها سمحت لنا بالدخول، حاولت أسأل ماما إنتي

حطيتي إيه في الكيس الأسود فتوّت في الكلام تماماً.

قعدنا في أوضة إضاءتها خافتة جداً على دكة خشب

مساميرها كل أما أتحرك تنتش العباية تقطعها.

[HTTPS://T.ME/MKTBTARAB](https://t.me/mktbtarab)

وجابت الست دي لينا سـبـحـتـين عمري في حياتي ما شوفت زيهم كانت حباتها أقسم بالله زي ماتكون معمولة من العضم!!

عدد حباتها 7 وطلبت مننا نقول مع كل حباية كلمة ونكرر الكلمات لحد ما يأذن سيدنا بالدخول.  
- الكلمات كانت..

اسمح - ادخلوا - بلا شرط - بلا قيد - مستباحة - راغبة - مهينة.

فضلنا أنا وماما نعيد الكلام، كنت حاسة إن جسمي منمل وكل ما أكرر التتميل يزيد.. ضيف على ده كمان إن أنا وماما فضلنا نتأوب وعندنا رغبة ملحة في النوم.

دخلت علينا الست وطلبت منّا الدخول للشيخ طيب، (ده كان اسمه).

مشيت ورا أمي حرفياً مستخبية فيها، دخلنا أوضة ما تفرقش كتير عن إالي كُنا فيها بيتوسطها مكتب عليه كمية كتب كتير مستخبي وراها الشيخ....

قعدت أنا وأمي على الكرسيين إلي قدام المكتب وبدأ  
يستجوب أمي عن كل حاجة وأمي إنفجرت في العياط من  
كُتر حُزنها على بنتها البائرة وخصوصاً بعد جواز معظم  
بنات العيلة والجيران.

كل ده وأنا ساكتة ونظراته ليًا كانت من تحت لتحت  
فيها إبتسامة غريبة لحد ما أمي خلّصت كلام، بص لي  
وقالي:

المعالج: وإنتي عاوزة إيه؟

بسنت: أنا عاوزة أمشي

المعالج: ما أكيد هتمشي أنا بسألك إنتي عاوزة إيه  
وجاية ليه؟

بسنت: أكيد عاوزة العقدة تتحل

المعالج: هتتحل ما تقلقيش

بسنت: ياريت بجد

المعالج: الصبر بس وتنفذي كل اللي هطلبه منك

بسنت: حاضر

المعالج: شايقة الباب إلهي على جنب ده؟ ادخلي  
 هتلاقي على ترابيزة جوا علبة فيها كريم لونه أحمر، إقلعي  
 هدومك وإدهني جسمك منه وحاولي تغطي أكبر جزء من  
 جسمك بالكريم ده  
 بسنت: هذا؟

المعالج: لو كان ينفع عندك كُنت قولتلك خُديه معاكي،  
 بس الأوضة إلهي جوا متحصنة  
 بسنت: ماما؟!!

ماما: هاجي معاكي يابسنت، معلش ربنا يجعل في  
 إيديه الشفا

المعالج: لأ يا حاجّة هي هتدخل لوحدها وإنتي  
 هتفضلي معايا هنا

- دخلت يا أستاذ نادر وقفلت على نفسي الباب وقلعت  
 هدومي وطلّعت الكريم وبدأت أدهن به كل إلهي إيدي  
 تطوله من جسمي كُنت بحاول أعمل كل ده بسرعة على  
 قد ما أقدر.

لقيت أوكرة باب الأوضة بتتحرك زعقت، مين؟!!

مجدش رد!

بسنت: يا ماما إنتي برّا؟.... مفيش ردا!

زقيت كُرسِي ورا الباب علشان مايدفتحش، وخذت هدومي علشان ألبسها بسرعة، لكن كانت الصدمة إنني لقيت المعالج واقف ورايا في الأوضة.

بسنت: إنت بتعمل إيه هنا ودخلت إزاي؟

المعالج: المهم أنا دخلت ليه!

بسنت: هصوّت وهفضحك.. ياماما.. ياماما..

المعالج: سيبي لي نفسك تماماً وخلال أسبوع هيكون العريس في البيت.

بسنت: بقولك إبعد عني وإلا هموتك حالاً!

جريت يا أستاذ نادر من غير ما أكمل لبس هدومي شدّيت الكرسي وفتحت الباب وخرجت لقيت ماما قاعدة بتتكلم مع المعالج زي ما أنا سايباهم!

ماما جريت عليّا وغطتني بجسمها والمعالج فضل يتفحص كل حتة فيّا بعنيه الشيطانية!

كل إللي كان عليّا عمالة أقول إزاي إنت كُنت جوا دلوقتي وبتحاول ت...ت....

ماما: سيدنا هنا يابنتي من وقت ما دخلتي

بسنت: كذاب

المعالج: معلىش واضح إن إلهي عليكى عاوز يكزّك فيا  
بأي شكل

(في الوقت ده حسيت كلامه منطقي جداً)

المعالج: طبيعي إنه يعمل كده علشان يكزّك فيا، بس  
إحنا عندنا عقل نفكر به يابسنت ... أنا تعمدت والدتك  
تكون معايا شاهدة على أي حاجة هتحصل مني...

والدة بسنت: طب والعمل؟

المعالج: إتفضلوا رّوحوا دلوقتي وأنا هكمل إلهي بدأته  
وأنا هنا.. من بعيد!

بس بشرط مفيش حُما ولا صلاة لمدة 3 أيام!

- خرجنا مشرينا يا أستاذ نادر وأنا دماغي مش مستوعبة  
حاجة من إلهي حصلت ولما حكيت لماما فضلت تقول إنني  
بعمل كده علشان أمتنع إنني أتعالج وأموتها بحسرتها..

<https://t.me/mktbtarab>  
مكشش عندي حل غير السكوت..

سكوت بائس معرفش له نهاية..

مكنتش أعرف هو يقصد إيه بحكاية إنه هيكمل من

بعيد دي!

لحد ما روحت وكُذت قاعدة على السُفرة وماما حطت

الأكل فجأة شوفت طبق الرُز مليان نمل بيجري جوا الرُز

بشكل مُخيف وبدأ يخرج برا الطبق ويجي عليًا

نطيت من على الكرسي و وقفت أتنطط على الأرض

زي المجنونة وماما في حالة ذهول، صرخت فيها علشان

تلحقني لكن لقيت واقف وراها شيطان أسود وبيمد إيديه

وبيلفها حوالين رقبة أمي، عينين أمي جحظت لبرا وبدأت

تحشرج وكان روحها بتتسحب منها!

فوقت على صرخة بصوت أمي لقيتني قاعدة على

الكرسي والطبق زي ماهو وأمي سليمة ومفيش أي حاجة

من إللي شوفتها حصلت قومت وجريت وسبت الصالة

ودخلت أوضتي وقلبت عليًا الباب، وإترميت على السرير

في حالة يرثى لها! مش فاكرة نمت إمتي!

لكن إلهي فاكره كويس هو إحساسي بالملاية وهي  
بتتشدد من على هدومي وبعدها هدومي بتترفع من على  
جسمي...

وأنا زي المشلولة معنديش أي قُدرة على الحركة،  
وصوت بيهمس في الخلفية..

”بحق الكلمات السبعة كلمات القسم تمكنا منك  
وأتينا“

وهناك عند باب الأوضة شوفت نفس الشئ إلهي كان  
واقف ورا ماما بس المرة دي كان أوضح بكثير.

كان أشبه بجسم مشتعل عيونه بيضا براقه، بشرته  
لونها أحمر محترق، له قرنين معقوفين للخلف، قفصه  
الصدري بارز من تحت الجلد، أصابع يديه طويلة بشكل  
يكون ضعف صوابعنا إحنا!

عاري بالكامل، النار المشتعلة عامله حواليه هالة  
مخيفة من النار وودانه أشبه بمثلثين مسحوبين ل فوق.

إبتسم إبتسامة زادت رعب وبشاعة!

<https://t.me/mkbtarab>



- كل ده وأنا مش لولة في مكاني... وهو بيتحرك ببطء شديد في إتجاه السرير، كل جوارحي رافضة الإستجابة ليًا!!

لا عارفة أتحرك ولا أصرخ ولا أعمل أي حاجة غير إنني أغمض عنيًا وأفتحها علشان أفوق من الكابوس ده.

وقف قدام السرير ومد إيديه الإثنين ومسك رجليًا من تحت وضغط عليهم، حسيت بنار بتسري في جسمي كله. ومن بعيد سمعت صوت جرس تليفوني بيتسلل لوداني وكان كل ما يعلى كانت صورة المسوخ بتتهز وتتلاشى بالتدريج.

فوقت تمامًا من الحالة الإلي كنت فيها وإلي مقدرش أقول أبدأ إنها كانت كابوس، لأنني متأكدة إنني كُنت حاسة بكل حاجة حصلتلي.

إلي بيتصل كان مصمم جداً إنني أرد لكنني ما كُنتش قادرة أرد عليه لقيته باعت رسالة صوتية شغلتها:

إزيك يابسة، أنا الشيخ طيب، ردي علي مكالمتي ضروري.

إتصل تاني فرديت عليه

الشيخ طيب: أنا كنت بتصل بيكي علشان أنقذك منه

بسنت: من مين؟

الشيخ طيب: «عاروس» ده إللي كان عندك

بسنت: أنا مش فاهمة حاجة، هو كده ده العلاج؟

الشيخ طيب: بقولك إيه أنا عاوزك تجيلني الليلة

بسنت: أجيلك ليه مش فاهمة؟

الشيخ طيب: علشان إنتي عجباني

بسنت: إنت راجل مش محترم

الشيخ طيب: لو مجتليش الليلة صورك كلها هتكون

على الذن!

بسنت: صور إيه؟!

الشيخ طيب: هو إنتي فاكرة وإنتي في الأوضة كنت

سايبك! أنا صوّرتك، وإللي دخلك جوا ده كان قريني

بيشوفك بالذيادة عنّي، فـ يلا زي الشاطرة إنزلي تعالي

وهترجعي البيت قبل ما أمك تصحى

بسنت: أنا هبلغ فيك الشرطة

الشيخ طيب: معنديش مشكلة هدخل السجن وهسيبك  
«عاروس» وإنتي شوفتي بنفسك شكله، وإللي كنت هعمله  
أنا جذب إللي هو هيعمله لعب عيال.

بسنت (مُنهارة): أبوس إيدك إرحمني.

الشيخ طيب: أبوس إيدك أنا إرحميني

بسنت: أنا هقول لماما

الشيخ طيب (ضاحكاً): ماما؟! طيب ماما مقالتيكيش  
إنها عارفة إن أنا ليّا طلبات وهي وافقت عليها علشان  
تتجوزي

بسنت: لأ لا إخرس مش ممكن

الشيخ طيب: معاكي أسبوع ياتيحي وقت ما أطلبك  
يا إما «عاروس» هو إللي هيزورك بنفسه وقت ما يحب...  
وإبقي خلّي ماما تحميكي منه!

- قفلت معاه التليفون لقيته باعدلي صور عريانة ليّا  
وأنا عنده فضلت أصوّت وألطم، جريت على الحمام قفلت  
علّيّ الباب وقعدت على الأرض مُنهارة من المصيبة إللي  
أنا فيها.

الكهرباء إتقطعت ومع قطعها حسيت بإيد بتطيطب  
 على كتفي جيت أقوم الإيد زقتني قعدتني في الأرض.  
 وسمعت صوت ستارة البانوي بيتفتح ببطاء مخيف ومن  
 وراها كان في ضوء أحمر عبارة عن نقطتين، لما الستارة  
 إتفتحت شوفت النقطتين دول...

كانوا عبارة عن عينين طفل قاعد في البانوي عريان  
 وعيضية مضيئة باللون الأحمر المخيف!

وبصوت أجش مخيف الطفل نطق وقال: ماما !!  
 ومسك في سور البانوي وبدأ يتساقه ووقع على أرض  
 الحمام خارج البانوي وبدأ يزحف ناحيتي وهو بيكرر كلمة  
 ماما دي بصوت جاي من أعماق الجحيم.

مكنتش عندي مكان أهرب له أنا ضهري للحيطه وقاعدة  
 في الأرض وبحاول أسحب رجليًا وأضمها ليًا، وده بيقترب  
 أكثر وأكثر لحد ما وصل لي وتسلق جسمي وبقي وشه في  
 وشي وحاضني وشلّ حركتي...

عينية البشعة في عيوني ومكتفني تماماً وبعلو  
 الصوت صرخ وقال: ماما...

صوته كان عامل زيّ مايكون إنفجار مدوّي ضرب في

وشي

وداني صفرت، عيذيا مكدتش شايفة بيهم أي حاجة  
وحسيت بجسمي بيترفع من على الأرض وإتفتح باب  
الحمام وأنا متشالة لحد ما وصلت لباب أوضتي دخلت  
وإتحطيت على السرير ولقيت تليفوني بيدشغل رسالة  
صوتية من تلقاء نفسه:

ده تذكير بسيط علشان تعرفي تقرري كويس قبل  
نهاية المهلة.

نادر(مقاطعا): فاضل قد إيه من المهلة؟

بسنت: يومين، أنا من وقت ماظهر الطفل ده ماشوفتش  
النوم، أنا بقيت بخاف أنام، أرجوك يا أستاذ نادر ساعدني.  
نادر: ماتقلقيش يا بسنت، إللي بتحكيه ده بيقول إن  
«طيب» ده مسخرك جن مخصوص يرعبك علشان تنفذي  
له طلبه وأنا أوعدك الموضوع ده كله هيخلص في أسرع  
وقت.

- رن تليفون نادر بإسم "عُلا عمق الحدث" و دي كانت  
المره الثامنة والساعة كانت 8 ونص يعني نادر ضرب  
المعاد وتجاهل عُلا ووالدتها من جديد!

بسنت: هتقدر بجد يا أستاذ نادر تساعدني؟

نادر: أيوه

بسنت: هي ماما فعلاً لها يد؟

نادر: من وقت ما إبت لطيب اللفة وهي متواطئة ولو

بدون قصد!

بسنت: اللفة دي كان فيها إيه؟

نادر: دورى في لبسك وشوفي إيه ناقص؟

بسنت: يانهار اسود أنا مش هقدر أقول إيه

نادر: أنا مش محتاج أسمع لأنى عارف

بسنت: ليه كده يا أمي!!

نادر: حسابك معاها بعد ما أوقفك باب «طيب» ده تماماً

إلا لو عاوزانى يكون لينا تصرف معاها وأعرفها غلطها!

<https://t.me/mktbtarab>

بسنت: إلهي تشوفه يا أستاذ نادر

نادر: رُوحي يا بسنت إنتي دلوقتي وما تفلقيش من  
حاجة!

- مشيت بسنت وسابتني مع سيل من رسايل التهزيق  
من "عُلا" وبصراحة أنا مش فارق معايا، هتصدقوني لو  
قولتلكم إنني مبسوط إنني فرقتها هي وأمها مرة كمان!  
أنا كل إللي هاممني إنني أساعد «بسنت» وأحلّ لها  
المشكلة بتاعتها بس مع شوية تحديثات طرأت على  
شخصية نادر فودة!

رُوحت البيت طلّعت دفتر يومياتي وكتبت الآتي:

1 - لطفي شكله هيووع

2 - أمنية فاتحة لي مذدبة

3 - قضية جديدة تحت عنوان بسنت

4 - معالج متحرش عينيه من الضحية

5 - مسخر جن علاشان يتمكن من تنفيذ زرواته

6 - أم بسنت ست جاهلة حالها من حال آلاف الأمهات

عندنا

- 7 - بسنت حرفياً ضايعة وموقفها سيء للغاية ومُستعدة  
تعمل أي حاجة للإنجاة من المصيبة
- 8 - العلاج في جُملة واحدة : لا يفل الحديد إلا الحديد
- 9 - الحل في كتاب مدبولي
- 10 - أنا لست صحفي...أنا طوق النجاة.



الفصل الثالث

(طوق نجاة)

[HTTPS://T.ME/MKBTARAB](https://t.me/mkbtarab)

تاني يوم الصبح كنت في مكتبي ومدبولي واقف قدامي  
وبقوله: المهلة إتغيرت، الكتاب لازم يجيلي النهاردة وإلا  
هتترفدا!

مدبولي: تحت أمرك يا أستاذ نادر

نادر: بعدين أنا عاوز أقولك حاجة يامدبولي

مدبولي: إتفضل

نادر: أنا هعالج به وهحل به حاجات وأزمات كتير

مدبولي: كلنا قولنا كدة في الأول

نادر: خلاص إنت برأ نمتك وسلم وإستلم يا معلم

مدبولي: أستلم إيه؟

نادر: ألف جنية.. قدامك ساعة تروح تجيبه وترجع.

مشي مدبولي وهو خلاص ماعندوش إختيارات تانية!

وأنا طلعت جواب بسنت قريته تاني علشان أجمع

الخيوط كلها!

- فات ساعة وإثنين وخمسة ومدبولي مجاش!

إتصلت عليه كتير ما رُدش! واضح إنه إختار يضحى  
بوظيفته وما يضحش بالكتاب علشان متمسك بتوبة

مؤقتة مزيفة هجمت عليه بسبب موت ابنه ويومين ويرجع  
أسوء من الأول!!

- باب المكتب إتفتح بعنف ولقيت عُلا داخلة وعيذنها  
بتطرق شرار.

عُلا: أنا غلطانة إني فعلاً هزقت نفسي ثاني معاك

نادر: إهدي يا عُلا لا يطق لك عرق ولا حاجة

عُلا: ولا يطق ولا حاجة، إنت إنسان مريض وأذا غلطانة

إني من أول مرة مخدتش موقف.

نادر: مريض بيكي يا لولو

عُلا: من فضلك إتكلم معايا بأسلوب أحسن من كده

نادر: ماخلاص يا عُلا قولني لماما الزبون اللقطة هيجي

تاتي وهندبسه! سيبيذي بس أجمع حاجتي علشان عايز

أروّح

- خرجت عُسلا ورزعت الباب وراها وهي مُنهاره

ومصدومة من ردودي عليها!

في الوقت نفسه كنت لميت حاجتي ونزلت من الجورنال

وإشتريت أكل علشان أروّح وأفكر بهدوء في حل لموضوع

بسدت ده...

وأنا طالع على السلام لقيت عم مدبولي قاعد على العتبة  
إلي قدام باب الشقة وإلي مجرد ما شافني قام وقف.

مدبولي: أنا أسسف يابني إنني إتأخرت بس غصب عني  
أنا طول اليوم بفكر إإلي هعمله ده صح ولا غلط، أنا ما  
صدقت إنني توبت عن الطريق ده وريحت إبني في رقدته،  
إزاي بعد كل ده أديك الكتاب إإلي أذيت به ناس كتير بإيدي.

نادر: عم مدبولي ماتزهقنيش، إنت جاي ليه؟

- أخرج عم مدبولي من جيبه كتاب ملفوف وإداه لنادر  
نادر (مبتسماً): أيوه كده، تعالى بقى أدخل علشان أديك  
الفلوس، إنت نفدت الجزء بتاعك من الإتفاق وأنا هنفذ بقى  
الجزء بتاعي.

مدبولي (مقاطعاً): الأهم من ده إنك تعرف تستخدم  
الكتاب

نادر: هو له كتالوج ولا إيه؟

مدبولي: تقدر تقول حاجة زي كده

[HTTPS://T.ME/MKBTARAB](https://t.me/mkbtarab)  
نادر: طب تعالى أدخل

- دخل نادر ومدبولي وأصر نادر إن مدبولي يتعشى  
معا

مدبولي: الكتاب ده غير كل كتب السحر، في ناس قالت  
إنه إيراني وناس قالت إنه سوداني وناس قالت إنه من كتب  
سحرة فرعون وناس قالت إنه من كتب جن سيدنا سليمان،  
الحقيقة محدش يعرفها لكن الحقيقة إللي أنا أكدهالك  
إن الكتاب ده أخطر كتاب سحر مرّ عليّا أو على أي ساحر  
مش مطلوب منك تقرأ الطلاسّم قد ما مطلوب منك تكون  
عارف إنت فاتح الكتاب في اللحظة دي علشان عاوز إيه  
نادر: مش فاهم

مدبولي: كل الطلاسّم إللي في الكتاب بتأدي الغرض  
المطلوب بس بشرط تكون عارف إنت عاوز إيه

نادر: تقصد إن أنا كل ما أعوز حاجة أفتح الكتاب وأقرأ  
أي طلاسّم وهينفذ إللي أنا عاوزه؟

مدبولي: تقريباً، فكّر في إللي إنت محتاجه وإفتح  
الكتاب وسيله يختار الصفحة والباقي هو هيعمله.  
نادر: بالبساطة دي؟

مدبولي: إسمها بالخسارة دي، إنت هتخسر كتير أوي  
مع أول مرة هتفتح فيها الكتاب

نادر: مش أكثر من إللي خسرتة

مدبولي: عندي سؤال قبل ما أمشي هموت وأسأله

نادر: إيه هو؟

مدبولي: إنت مين؟

نادر: أنا مين إزاي؟

مدبولي: إنت مش نادر إللي إشتغلت معاه طول الفترة  
إللي فاتت، ياراجل ده إنت حاربتنى ولا كأني كُنت شيطان  
رجيم!

نادر: كُنت غبي

مدبولي: لا إسمحلي أقولك إنك دلوقتي إللي بقيت غبي  
ده إذا كُنت نادر أصلاً!

- خرج مدبولي وساب لي الكتاب ومعاه مزيج من  
مشاعر متداخلة ومتضاربة هو أنا صح وكان لازم أفوق  
لنفسي بقى وأشوف مصالحتي فين ولا أنا بمر بمرحلة  
سوداء هتقضي عليا وعلى أي حد حوالياً.

أذا مش هضيع وقتي في أسئلة غبية وأنا بين إيديا  
كنز وجه الوقت إلي لازم أفتحه، أخذت الكتاب ودخلت  
أوضة نومي وقللت الإضاءة تماماً وفتحت الكتاب على أول  
صفحة إلي كان فيها مقدمة تسمحولي أكتبها الكوازي  
ماهي مكتوبة بالضبط علشان تحسوا بإلي أنا حسيته.  
(مقدمة الكتاب).

- قبل أن تتخطى هذه المقدمة وجب التحذير!

- إن هذا الكتاب لا يحمل في طياته سوى الحزن والألم  
والممتعة الزائلة.

- ولتعلم أيها القارئ أن وجود هذا الكتاب بين يديك هو  
إختبار حقيقي لك.

- ولتسمح لي أن أساعدك في اجتياز هذا الإختبار

- من فضلك إحرق هذا الكتاب ولا تدعه يقع في يد أي  
شخص.

- هذا الكتاب لن يجلب لك سوى الهلاك!

برغم كل التحذيرات إلا إنني كملت وفتحت أول صفحة:  
1 - إذا فقدت إخترت.

2 - قُسم بجرح إصبعك إذا كنت مُستخدم جديد لهذا الكتاب وأسكب دمك على عنوان الكتاب الخارجي حتى يغمره بالكامل.

3 - ثم إتلوا تلك الجُمْل بالترتيب الآتي:

- أقسم بسُلطة هذا الكتاب الأبدية.

- أن أنصاع إنصياعاً تاماً.

- مُتحملاً كافة أحكامه، مُنفذاً كافة أوامره.

- مُضحياً بكل أضاحيه، ولا مجال للتراجع أو التردد.

- وفي مقابل ذلك أحصل على كل ما أبتغي.

- مُنقطعاً عن أي علاقة ربانية أو روحانية.

- وإذا فكرت يوماً ما أن أتراجع أو أن أستغفر أو أن أتوب

فإن إنتقام الكتاب لن يُبقي ولن يذر أي أحد من أقاربي

وأصدقائي وأحبائي إلا وقضى عليه.

نفذت كل المطلوب وشعرت برغبة مُلحة في النوم

فاستسلمت ونمت وأنا عارف إن نومي هو إستكمال لعهد

الشیطان والكتاب.



مقدرش أقول ده كابوس ولا حلم ولا رؤيا ولا مزيج من كل دول.

شوفتني واقف على ضفة النيل بالليل بحاول أشوف حاجة مش عارف هي إيه كأنني كنت بدور على شئ تايه مني كل إللي شايفه مية سوداء وصخور كبيرة وغربان واقفة على الصخور دي بتذعق بصوت حزين منتظم وكأنها في حالة حداد جماعي ومن ورا الصخور ومن وسط المية الراكدة ظهر كيان ضخم كان بيتحرك في المية من غير المية ما تهتن، زاد صوت الغربان وكأنها بتحذرنني.

حاولت أرجع بظهري فإكتشفت إن المية مغطيانني لحد رقبتي، ورجلياً مغروسين في الطين، حالة شلل تام وهو بيقترب أكثر لحد ما وصل لي، وحرفياً أنا كنت عند نص جسمه وبحركة مُباغته منه خبط بإيده المية جنبي فتسبب في حدوث موجة عالية جداً غمرتني المية وفضلت أستنى الموجة دي تنحسر علشان أعرف آخذ نفسي لكنها للأسف فضلت مغطيانني وسمعت صوت جاي من أعماق النيل بيقول:

<https://t.me/mkbtarab> قبل العهد.. قبل العهد.. قبل العهد.

صحيت لقيتني غرقان والسرير كمان كأننا كنا فعلاً  
في قاع النيل.

قومت جريت على المرآة أتطمئن على نفسي لقيت  
جسمي كله أزرق بما فيه وشي، بالضبط زي إلهي مات  
غريقاً!

فضلت صاحي للصبح كل شوية أبص في المرآة  
والأقي وشي بيرجع لشكله تدريجياً.

على الساعة ٦ الصبح كُنت بفتح الكتاب وأنا في نيتي  
البحث عن حل لمشكلة بسنت.

فرّيت صفحة والتانية جيت عند الثالثة كنت كل أما  
أجي أقلبها صباغي يتشك وكأن حاجة بتمنعني تماماً  
من إنني أقلب الصفحة ففهمت إن الحل في الصفحة دي،  
والله كان مكتوب فيها طلسم مُعقد جداً وبعده مكتوب  
(ثم يذكر حاجته).

قرّيت الطلسم وبعده قولت هلاك المدعو الشيخ طيب  
وإبعاده تماماً عن بسنت، الكتاب إتقفل لوحده ومفيش  
دقايق لقيت بسنت بتكلمني

نادر: صباح الخير يا بسنت

بسنت: ده خير كبير، حصل حاجة أنا مش فهمها

لغاية دلوقتي

نادر: حاجة إيه؟

بسنت: الشيخ طيب إتصل بيترجاني أسامحه وبيقولي

أنا تحت أمرك في أي تعويض عن الخطأ إللي إرتكبته بس

أرجوكي قوليلي مين معاكي

نادر: ماالكيش حصله إيه؟

بسنت: حاولت اعرف منه لكن رفض، بس إللي أقدر

أقولهوك إن إللي حصله شئ أعظم بكتير من إللي هو

بيعمله في الناس.

نادر: بس أنا لازم أعرف حصله إيه، أنا ما ياكلش معايا

جو إن الحاجة تحصل من برا برا ده من غير ما أكون عارف

تفاصيل، أمال هكتب إيه؟ أكتب إنه ندم وتاب يا حليلة!

بسنت: مش عارفة بقى

نادر: تمام يا بسنت

بسنت: بس في حاجة، ماما مختفية بقالها كذا ساعة

وبتصل بيها موبايلا مقفول

نادر: أنا مش شغلي يابسنت إنني أدورك على الست  
الحاجة.

بسنت: أيوة فاهمة بس كنت بسأل لو إنت تقدر  
تساعدني

نادر: إبقني طمئيني لما ترجع

يومها بالليل بسنت إتصلت بيّا بتبلغني إن أمها رجعت  
البيت فاقدة النطق وبتترجاني أتصرف، أتصرف إزاي إذا  
كنت أنا السبب في إللي حصل لأمها، هتسألوني إزاي  
هقولكم إفتكروا كلامي مع بسنت عن إن أمها لها دور في  
إللي بنتها مرت به وإني أتدخل بشكل أو بآخر، ده غير  
إن المدعي إللي إسمه طيب هو كمان قالها إن الست أمها  
وافقتة إنه يعمل أي حاجة في مقابل إن بنتها تتجوز،  
طبعاً أنا عارف إنها مكانتش تقصد إللي هو فكر فيه بس  
الحقيقة أنا بطلت أتعامل مع الناس بنواياها.

قبل ما أقفل قصة بسنت دي كلها خايني أقولكوا إنها  
كلمتني مكالمة تانية وحرفياً كانت بتصرخ في التليفون  
وبتدعي عليّ لأنني على حد زعمها خنت الأمانة ونزلت  
القصة في الجورنال بإسم بسنت الثلاثي!

وعنوانها وإسم أمها، من الأخر فضحتهم، وده بيرجعني  
لنفس السؤال.

هو أنا كدة صح وعرفت قيمة نفسي ولا أنا بهد كل إللي  
بنيته في سنين؟!

الشاهد، إن الكتاب العظيم إللي معايا دلوقتي عملت  
به البدع، أي حاجة تخطر على بالكوا عملتها به بس كلها  
حاجات في عُرف نادر القديم غلط وحرام، أما في عُرف  
نادر الجديد فهي عين العقل.

إسمحولي أسيبكم علشان أجهز شنتطتي إللي هسافر  
بيها البلد بسبب مكالمة من أمي بتطلب مني فيها إنني  
أجي على وجه السرعة دون إبداء أي أسباب.

هسافر البلد وهما ورزقهم معايا بقى، سلام مؤقت.

[HTTPS://T.ME/MKBTARAB](https://t.me/mkbtarab)

[HTTPS://T.ME/MK1BTARAB](https://t.me/mk1btarab)

## الفصل الرابع

(لا يفل الحديد إلا الحديد)

[HTTPS://T.ME/MKBTARAB](https://t.me/mkbtarab)

يادوب قفلت شنطتي وبفتح باب الشقة لقيت واحد واقف  
في وشي إحنا الإثنين إتخضينا.

الشخص: إنت بقى نادر فودة؟

نادر: أيوة، مين حضرتك؟

الشخص: إنت إللي خربت بيتي؟ وضيعتني وقضيت  
عليّ؟

نادر: جرى إيه يا راجل يا مخبول إنت هتذلق وتقول  
إنت مين ولا أقفل الباب في وشك

الشخص: أنا طيب يا نادر أفندي

نادر (مبتسماً): أهلاً أهلاً تصدق إن أنا كان نفسي  
أتعرف عليك

طيب: مش أكثر مني

نادر: إيه سبب الزيارة الكريمة دي؟

طيب: مش ندخل نتكلم جوا أحسن؟

[HTTPS://T.ME/MKBTARAB](https://t.me/mkbtarab)  
نادر: إتفضل



طيب: أنا جاي أسألك سؤال واحد بس، إللي معاك دول  
سخرتهم إزاي؟ أنا معايا واحد وحاسس إنني ملكت الدنيا  
بإللي فيها

نادر: ما تحكي لي إللي حصلك وأنا هقولك إللي إنت  
عايزه

طيب: أنا كأني لا شوفت سحر ولا إتعلمت تسخير، أنا  
كنت ليديتها عامل زي العيل الصغير إللي كل غيلان الدنيا  
إتكاترت عليه

نادر: بقولك إحكي أنا مش عاوز عناوين.

طيب: ليديتها أنا كنت لسه مخلص جلسة علاج لواحده  
من الزباين، دخلت خدت دُش وكلات لُقمة وروحت سريري  
عاشان أذام أول ما طلعت على سريري سمعت صوت  
واحدة بتصوت خرجت من الأوضة أجري مالمقيتش حاجة  
مالمقيتش عارف الصوت ده جاي من برا ولا من جوا لحد  
ماسمعت صوت واحدة ست بتنادي عليًا من جوا أوضتي،  
دخلت الأوضة لقيتها فاضية مافيهاش حد ناديت على  
الجن إللي أنا مسخره «عاروس» وطلبت منه يشوف إيه

<https://t.me/mktbtarab>

الحكاية، غاب ومرجعش ب رد، سمعت صوت الست بينادي عليًا مرة تانية، الصوت كان طالع من دولاب هدومي.

لأول مرة في حياتي أقلق، مشيت ناحية الدولاب بحذر بقدم رجل وبآخر رجل، فتحت الدولاب بالراحة شوفت آخر حاجة كنت ممكن أتوقعها، شوفت الجن إللي أنا مسخره «عاروس» متسلسل ومتكتف ومرمي في الدولاب وبوقه داخل فيه سلك مخيطه في بعضه وبيبصلي بصة خوف وذعر، كانت أول مرة أشوفه خايف ومرعوب بالشكل ده، كل إللي جه في دماغي وقتها لما ده الجن إللي أنا بستعين به وحصله كده أعال أنا هيحصلي إيه؟!!!!

كل إللي كان في دماغي إنني عاوز أعرف إيه السبب في إللي بيحصل ده، لاحظت إن عينين الجن المسخر بتاعي «عاروس» بتبص ورايا بمنتهى الرعب، مالحقتش أتلفت أشوف إيه ورايا لأن لقيتني بترفع من على الأرض وبتسحب لفوق وإخترقت السقف كأني هوا، فضلت أطلع لفوق لإرتفاع مش قادر أوصفه كل إللي كان على لساني...

أنا عملت إيه؟

<https://t.me/mkbtarab>

أنا عملت إيه؟

أنا عملت إليه؟

العفو والسماح العفو والسماح.

سمعت صوت من ورايا من الشيء إلي رفعني قالي  
كلمتين إثنين: (أترك بسنت).

ما الحقتش حتى أقول حاضر لأنه سابني ومن أعلى  
إرتفاع كنت فيه لقيتني بقع ناحية الأرض بمنتهى السرعة  
كنت شايف في الأرض مشهد بيحصل بسرعة رهيبه،  
حفرة بتتكون وكأنها مُعدّة لإستقبالي، إترزعت في الحفرة  
ما إتوجعتش الحقيقه لكن الرعب كان تملك مني لما  
لقيت كل تراب الحفرة بيهدل عليا، جسمي كله مشلول  
مش قادر حتى أحوش بإيديا التراب إلي بدأ يغطيني،  
وعذد طرف الحفرة شوفت رجلين حاولت أجيب بنظري  
باقي جسم إلي واقف ماعرفتش كل إلي شوفته رجلين،  
الرجل الواحدة قد رجلينا يجي عشرين مرة، الجلد شبه  
الصدف إلي بيبقى على السلاحف عمري ما أقدر أقول  
على الضوافر إنها ضوافر أو حتى حوافر دول شيء ملهوش  
وصف.

صرخت وقولت أنا مليش دعوة بيها ولا هقرب منها  
 السماح والعفو، لكني كنت بكلم نفسي فضل تراب الجفرة  
 يهدل عليا والشئ إلهي واقف مابيتحركش، كاذت دي آخر  
 لحظات ليّا قادر أتنفس فيها، بعدها الدنيا ضلّمت وعرفت  
 إن ده الموت لا محالة!

نادر: ما إنت عايش أهو وزى الفل وقاعد بتتكلم

طيب: إلهي حصل إنني فوقت فجأة لقيت الجن المسخر  
 بتاعي «عاروس» هو إلهي حفر وخرجني بعد ما إتفك أسره  
 وطلب مني أبعد عن بسنت وإني لو عاوز أعملها حاجة  
 مايكونش من خلاله.

نادر: وبسنت بقى إلهي قالتك إن أنا إلهي ورا الفيلم  
 الهندي إلهي إنت بتحكيه ده؟

طيب: ماتجيبش سيرتها، لا حكّلي ولا عايز أسمع  
 عنها حاجة، الجن المسخر بتاعي «عاروس» هو إلهي قالي  
 وعلشان كده أنا جاي أسألك إنت مين، وأترجاك تشيلني  
 من دماغك وأنا مش هقرب منها ثاني طالما هي تخصصك

نادر: هسيبك بشرط واحد

طيب: إيه هو؟

نادر: تحكي لكل حد تقابله عن قوتي وإللي جراك

بسببي

طيب: من غير ماتطلب، أنا بالفعل حكيت ولسه هحكى

كتير

نادر: إتوكل إنت علشان ورايا مشاوير ولو عوزتك

هعرف أجيبك

[HTTPS://T.ME/MKTBTARAB](https://t.me/mktbtarab)

[HTTPS://T.ME/MK1BTARAB](https://t.me/mk1btarab)

الفصل الخامس

(لقاء عابر)

[HTTPS://T.ME/MKBTARAB](https://t.me/mkbtarab)

بعد ما مشي طيب إحساسي بالقوة والانتصار تضاعف،  
حسيت إنني عايز أكثر أنا مش مكتفي بالمستوى إللي وصلته  
من السيطرة، أنا والكتاب ده هنقدر نعمل كثير.

إنطلقت في طريقي لمسقط رأسي، مجرد ما دخلت البلد  
إنتابني شعور عمري ما حسيت به قبل كدة وأنا هنا...أنا  
مبقاش ينفع أنزل البلد تاني مش دول إللي يعرفوا قيمتي  
ولا يقدرُوا إسمي ولا مكانتي.

وصلت البيت وبعد slaامات الحارة المبالغ فيها بيدي  
وبين أمي وأختي، قولت لأمي:

بقولك إيه يا ماما أنا قررت حاجة

والدة نادر: خير يا بني

نادر: أنا هاخدك إنتي وأمنية تقعدوا في القاهرة معايا

والدة نادر: ليه يا بني هو كان حد إشتكالك

نادر: أصل أنا مش هقدر أنزل البلد دي تاني

والدة نادر: ومالها البلد دي؟

نادر: ما بقتش تنفع مع إسمي والنجاح إللي وصلته

والدة نادر: أه، يبقى كلام أختك أمنية صح



نادر (لأمنية): قولتي لها إيه يا هاتم؟

أمنية: قولتها إن إنت بقيت بذي أدم غريب وأديني

شوفت وإتأكدت بنفسي

نادر: الحق عليا إني عايز أنضفكم

والدة نادر: كتر ألف خيرك يا بني أخرتها ترضفنا!

نادر: بلاش أنضفكم هطلعكوا من الجحر إللي إنتوا

عايشين فيه ده

أمنية: أولاً محدش طلب منك ده.

ثانياً وإن كان على الزيارة إللي هتقرفنا بسببها

ماتكررهاش

نادر: خلاص خليكي قاعدة هنا لحد ماتعنسي

والدة نادر (مُنفعلة): إنت بتكلم أختك كدة إزاي؟ إنت

مش ممكن تكون نادر إبني

نادر: يوووه أنا كل ما أتكلم مع حد يقولني إنت مش

نادر، خلاص شوفولكم إسم جديد بقى تذاوني به

أمنية: يلاً يا ماما ندخل نشوف هنعمل لنادر بيه إيه

عديشان الغدا وبالمناسبة إبقى إتعطف وروح زور الشيخ

لطفني ده لو مكانش يقلل من شأن حضرتك.

دخلت ماما وأمزية المطبخ وسابوني لنفس السؤال من جديد هو أنا كدة أحسن ولا أسوء؟

غيرت هدومي وطلعت على بيت الشيخ لطفي قابلني في الطريق عم مختار حاولت أكون وودود معاه قدر المُستطاع لحد ما جه عند جملته المعتادة (إنت بتفكرني بشبابي يا واد يا نادر).

نادر: أولاً أنا مابقيتش واد أنا الناس كلها بتقولي يا أستاذ نادر

ثانياً: بتفكرني بشبابي بتفكرني بشبابي هو إنت فاكرني مش عارف إنت كُنت بتهبب إيه في شبابك!

الحاج مختار (مذهولاً): هو في إيه؟

نادر: في إذك كنت واحد فاشل عايش على فلوس أبوك وفاكرين نفسكوا أعلى من باقي الناس، وكل المغامرات إلی إنت قارفتني بيها كانت عبارة عن جري ورا الحریم في

العزبة، صح ولا فاكرني مش عارف!

الحاج مختار: خلاص يابني أسكت، أنا كنت بفتخر بيك ولازلت بس واضح إن ده بقى بيضايقك، إنت مش نادر إللي أنا أعرفه

نادر: أه هو بالضبط أنا مش نادر إللي إنت تعرفه إعرف بقى نادر الجديد وإتعود عليه ويلاً بقى ندخل نشوف الراجل العيَّان قبل مايقطس.

الحاج مختار: لا حول ولا قوة إلا بالله، حاضر يابني. دخلنا عند الشيخ لطفي، ده الوحيد إللي مش هقدر أتجاهل حبي له وفضله عليًا مهما أنكرت.

شديت كرسي وقعدت جنب السرير وكنت عاوز أقوله أي حاجة أهون بيها عليه التعب لقيتني بقوله:

إيه ياشيخ لطفي إنت مش عارف تشفي نفسك ولا إيه؟

الشيخ لطفي (بصوت ضعيف): إزيك يا نادر يابني، هو

في حد بيشفي نفسه الشافي هو ربنا

نادر: أمال اللّف إللي لفتهولي معاك ده كان إيه؟

طالما ربنا هو إللي بيشفي، كل واحد بقى يقعد في بيته ويستني دوره.

میل علیاً عم مختار و قالی: الشیخ لطفی مش هیستحمل  
طریقتک دی یاتقول کلمة کویسة یاتقوم تمشی  
نادر: لأ همشی بس عایز أقولک حاجة یاشیخ لطفی قبل  
ما أمشی زی ما إنت طلبت تشوفنی أنا کمان کنت عایز  
أشوفک علشان أقولک إن معایا سلاح أقوى ملیون مرة من  
التخریف إلیی إنت علمتهولی

الحاج مختار: التخریف ده هو إلیی خلاك الأستاذ نادر  
فودة بتاع دلوقتی إلیی مش طایق یسمع صوت حد مڈا،  
التخریف ده ساعدک فی کل التحقیقات إلیی کتبتھا،  
التخریف ده هو إلیی نجدک من مصایب یاما،  
التخریف ده هو إلیی خلاك تقدر علی الوقاد وإبنه.

نادر (مُتهکماً): إیه الوقاد ده کمان؟ وإبنه ده یطلع  
مین؟ ولاد خالتک!؟

الحاج مختار: إنت هتعمل عبیط! الوقاد وکساب إیه  
نسیتهم؟

نادر: أنا فعلاً معرفش ناس بالأسامی دی، ولا یشرفنی  
أعرف.

الحاج مختار وقف وزعق : أقسم بالله إنت مش نادر  
وأنا مسئول عن كل حرف بقوله

الشيخ لطفي (بهدوء): قرّب يانادر يابني عايز أقولك  
حاجة، فتّح عينيك على الآخر كدة عايز أبص فيها  
نادر: اللهم طوّلك ياروح، حاضر

الشيخ لطفي بعد ما بص في عنين نادر: لا إله إلا أنت  
سبحانك إني كنت من الظالمين.

-روّحت البيت لقيت أمي وأختي ناصبين القاعدة  
وجايبين خالتي صافية ومرورة بذت خالتي وقاعدين  
يقطعوا في فروتي، خالتي صافية لما شافتني قامت  
سلمت عليّا هي ومرورة، ما إديتهمش فرصة يفتحوا أي  
كلام ودخلت الأوضة وقفلت على نفسي وسامع صوت أمي  
من برة بتقول: شايفة يا صافية؟ شايفة خيبتي الثقيلة في  
إبني، أنا لو كنت أعرف إن شغل الصحافة هيقلبه علينا  
بالشكل ده مكنتش سمحتله يسيب البلد أبداً، ده راح يزور  
الراجل العيّن جاب للراجل مرض زيادة عن إللي عنده.

- رغي رغي رغي مش قادر أتحملة، لميت هدومي من  
بعد ما كنت طلعتها علشان أقعد يومين وحطيتهم في

الشنطة وفتحت باب الأوضة وخرجت من غير ما أسلم على أي حد.

أمنية جريت ورايا..

أمنية: إذت رايح فين؟

نادر: همشي وأسيبلكم المخروبة علشان تتكلموا عليا براحتكوا

أمنية: ممكن تقولي مالك؟

نادر: مفيش حاجة إبغي سلمي على ماما

وسافرت ورجعت شقتي إللي بحس وأنا فيها بالسكينة والهدوء وأنا مقرر إنني مش هنزل البلد دي ثاني وإللي عاوزني عارف عنواني.

صحيت على تليفون من علا وكلمتني بمنتهى الجدية وقالتلي: زميلنا «عمر القصاص» في قسم الحوادث عمل حادثه ومات والجورنال كله رايحين المشرحة لو تحب تكون موجود.

لبست هدومي ونزلت على عنوان المستشفى وروحت من الباب الخلفي عند تلاجة الموتى لقيت معظم زمائلي

موجودين والكل في حالة حزن كبير وعرفت إن ٢ من  
زمايلنا دخلوا يشاركونا في الغسل مع أخوه، دخلت بسرعة  
ومجرد ماشوفت وشه قلبي إتقبض وكان أنا كُنت ناسي  
الموت!

شاركتهم الغسل وطول ما أنا بغسل في صوت ملعون  
بيتردد في ودي وأنا بحاول أتجاهله بكل طريقة ممكنة...  
الصوت كان بيقول جملة واحدة: (ليالي الأرواح الضالة)،  
مش فاهم معناها ولا الهدف منها!

خلصنا غُسل «عمر» وكفناه وحطيناه في الصندوق  
الخشب ونقلناه لسيارة نقل الموتى ومنها إلى مثواه  
الأخير...

ولحد ما أنا واقف قدام التربة الصوت لسه بيتردد في  
ودي بشكل مستمر (ليالي الأرواح الضالة)... لدرجة إنني  
زعقت وقولت: خلاص سمعت، والكل إتخض منّي!

سبقت الكل وروحت وما روحتش الجورنال... أول ما  
دخلت البيت شغلت جهاز الكمبيوتر وبدأت أعمل بحث  
عن (ليالي الأرواح الضالة): موقع مطلعها إنها فيلم، موقع  
ثاني مطلعها إسم كتاب، موقع ثالث كاتب جملة واحدة:

ليالي الأرواح الضالة هي ليالي الغذاء الروحاني! ومش  
كاتب أكثر من كدة!

على طول جه في بالي الكتاب معرفش هيساعدني إزاي  
بس أكيد هيدلني، فتحت الكتاب وفضلت أدور فيه لحد ما  
لقيت جزء مكتوب فيه «البحث عن المعاني» لقيته شارح  
معاني طلاسـم وتعاويذ وخطورتها بشكل مُفصل وإن لو  
حباب أخوض معني أي طلسم في خطوات بتتعمل...

بس ده مش طلسم الموضوع ده الكتاب مش هيقدملي  
الحل فيه.

يبقى معنديش غيره... «طيب» هو إلهي هيتمنى  
يساعدني ويدلني، جبت رقمه من بسنت واتصلت به وفرح  
جداً إنني طلبت أقابله وخلال ساعتين كان عندي في البيت.

نادر: طيب أنا عاوزك في خدمة

طيب: وأنا تحت أمرك

نادر: هو مش أنا تحديداً، كائنات الظلام إلهي إنت شوفت

رجلين واحد منهم

[HTTPS://T.ME/MKBTARAB](https://t.me/mkbtarab)

طيب: يا باشا مش مهم إنت ولا هم... أنا موافق



نادر: يعنني إيه ليالي الأرواح الضالة؟

طيب وشه إتخطف وقال: و دي عاوز منها إيه؟

نادر: هي إيه أصلاً؟

طيب: اليومين دول

نادر: ما تنقطنيش بالكلام، هي إيه دي؟

طيب: ليالي الأرواح الضالة دي ما يدلكش عليها غير

حد عاوز يقضي عليك

نادر: بمعني؟

طيب: ده طقس خاص جداً من السحر، كان بيُمارس قبل

سيدنا سليمان وإتدفن مع الكتب إلهي إتدفنت، الطقس ده

زمان كان الجن نفسهم بيخافوا يمارسوه والوحيد إلهي

مارسه هو إبليس!

نادر: نعم!!

طيب: أيوة إبليس علشان كدة بقولك إلهي ذلك عليه

عاوز نهايتك، الجن كان بيرفض بسجده أوامر إبليس

المباشرة، ويفضلوا إنه يخلص عليهم بدل ما الطقس ده

إلهي يخلص عليهم، ممكن تقولي عرفته مدين؟ أصل لو

إذنت مسخر كل عشائر الجن هيخافوا يدلوك عليه لأن الأذى  
هيطولكم جميعاً.

نادر: للدرجادي؟!

طيب: وأكثر، أنا وأي كاهن أو ساحر بذيجي عند الطقس  
ده بالذات ونتجذب الحديث عنه، ومش هتلاقي حد يكلمك  
إلا لو كان بينه وبين إبليس نفسه عهد!

نادر: أفهم من كدة إنك مش هتفهمني؟

طيب: ولو فيها موتي، أنا إللي أعرفه عنه مجرد قشور  
وصدقني إللي عاوزك تعرفه ده عدو لدود مش صديق أبداً.  
- خرج طيب وسابني في حيرة وخوف وفضول أكثر  
وخلاتي عاوز أعرف إيه موضوع ليالي الأرواح الضالة بأي  
تمن.

مكنش عندي غير إختيار واحد! الكتاب.

## الفصل السادس

(ليالي الأرواح الضالّة)

[HTTPS://T.ME/MKBTARAB](https://t.me/mkbtarab)

فتحت الكتاب (وإلي عمري ما هقولكم إسمه) على الجزء  
بتاع شرح الطلاس...م

وبدأت أتبع خطوات شرح الطلاس، وإلي ماتفرقش  
كتير عن إلي عملتها قبل كدة غير شوية إختلافات بسيطة  
أهمها إن أنا في الآخر بقول إسم الطلاس إلي المفروض  
أعرف معناه وتأثيره وقولت بدلاً منه ليالي الأرواح الضالة.  
وكتبتها على ورقة فاضية بعد الجزء ده في الكتاب  
بدبوس مغموس في دمي، وعلى مرآة الأوضة بصباغي  
المتلطح بدمي بردو كتبت ليالي الأرواح الضالة ... وقلت  
نور الأوضة تماماً ونمت.

نمت وأنا مش عارف إلي عملته ده هيديني إجابة  
شافية ولا خارج نطاق صفحات الكتاب!

بس من الواضح إن إمكانيات الكتاب أكبر بكتير من  
درجة تخيلي، شوفت في منامي راجل كبير في السن  
بشوش الوجه دقنه بيضا واقف قدام باب أوضتي بيبتسم  
لي وبيشاورلي أمشي وراه، خرجت من الأوضة وإلي  
بمجرد ما خرجت لقيتني قدام المشرحة والتلاجة إلي كان

فيها زميلينا «عمر» ، الشخص ده إتكلم وقال بنفس الصوت  
(ليالي الأرواح الضالة).

قولتله: إنت إللي كنت بتقولها ليّا في وداني كل شوية؟  
الرجل العجوز: بالضبط وكويس إنك أدركت الرسالة  
وفهمت إن كتاب (.....) هو إللي هيدلك على الطريق  
الصحيح

نادر: طب فهمني

العجوز: فعلاً زي ما طيب قالك الطقس ده صعب جداً  
لكن إنت عندك قدرات تختلف عن أي حد والطقس هيفرق  
معاك

نادر: عاوز أفهم

الراجل العجوز: من أيام ممالك السحرة القديما كان  
الطقس ده بيمارس لأطالة أعمار الكهنة، حرفياً كان  
بيعيشوا مئات السنين في شباب دائم...

ومش بس كدة، قدرات أكثر ونفوذ وسيطرة أكثر، ولو  
على إنك تعيش وتخلد أعتقد دي لو حدها كفاية.

نادر: بس طيب قال إن الموضوع ده خطر جداً

الراجل العجوز: أنا خادم من خدام الكتاب وهساعدك

نادر: طب هو ليه مدبولي مكانش عنده السطوة ولا

القوة دي طالما الكتاب كان معاه؟

العجوز: علشان هو أولاً كبير سنأ، ثانياً طموحه كان

فلوس، ثالثاً ودي الأهم مدبولي كان غبي وكل خدام الكتاب

كانوا بيحذفوه لبعضهم ومحدث عاوز يساعده.

الكتاب إللي معاك مش مصباح علاء الدين أي حد يلاقيه

هيعرف يستخدم كل إمكانياته، بالعكس الكتاب هو إللي

بيحدد لمستخدمه الحد الأقصى من الإستفادة، يعني واحد

زي مدبولي إستفادته من الكتاب كانت ماتزيدش عن ٢%

نادر: طب وأنا؟

الراجل العجوز: الكتاب إللي طلب منك تدور على ليالي

الأرواح الضالة من بداية إستخدامك له و دي لها مدلول

عظيم جداً

نادر: مدلول إيه؟

الراجل العجوز: إنك عاجب الكتاب يا نادر!!

<https://t.me/mktbtarab>

نادر: طب أنا مطلوب مني إيه؟

الراجل العجوز: إحنا معانا ٣ ليالي مطلوب منك فيهم النوم بجوار أكبر عدد من الميتين إللي جوا التلاجة دي، كل ليلة هتنام في درج من الأدرج دي جنب جثة نادر: وبعدين؟

الراجل العجوز: بعد نهاية ال ٣ ليالي إنت هتشوف بنفسك، بس لازم تعرف إن في ٣ أشخاص عايشين عمرهم هيتقص ويا سلام لو كانوا من أعدائك.

نادر: يعني إيه عمرهم يتقص؟

الراجل العجوز: أسئلتك كتير واللييلة الأولى هتضيع وإنت بتسأل.

نادر: طب وهقنع إزاي عامل تلاجة الموتى إني أبات مع ميت؟

الراجل العجوز: مش بتاعتي دي

نادر: طب ليه مش تربة مثلاً؟

الراجل العجوز: لأ في القبر الروح بتكون عرفت وفهمت إنها وصلت للنهاية وملناش أي إستحوان عليها، إنما في التلاجة الروح فعلاً بتكون حائرة ضالحة وإحنا بتقدر

نصفها بطريقةتنا! عشان كدة إسمها ليالي الأرواح  
الضالة أو الحائرة.

نادر: طيب مطلوب أعمل حاجة وأنا جوا في درج  
التلجاجة؟

الراجل العجوز: روح وهتفهم

نادر: أنا ما حددتش مين هيتقص عمره

الراجل العجوز: روح وكل حاجة هتتم.

نادر: طب صحيني عشان أروح بجد

الراجل العجوز: إنت صاحي يا نادر بالفعل، أدخل

وشوف هتعمل إيه

- من بعيد سمعت صوت مش غريب عليا بيزعق:

إمشي من هنا يا بني.

إهرب...توب...إرجع لريك...قدامك فرصة أخيرة.

نادر: الصوت ده أنا عارفه، مين ده؟

الراجل العجوز: الملايكة لو حابب تسمع لهم براحتك

نادر: بس الصوت...ده..

[HTTPS://T.ME/MKTBTARAB](https://t.me/mktbtarab)

الراجل العجوز: الوقت بيعدني!



الصوت البعيد: أنا مش قادر أوصل أكثر من كدة، هتضر نفسك أكثر من كدة إيه!

بلاش الأرواح الضالة

بلاش الأرواح الضالة

بلاش الأرواح الضالة

تجاهلت الصوت ومشى العجوز وأنا إتحركت ناحية باب التلاجة وخبطت، وفتحلي الباب شاب في منتصف العشرينات من عمره بيدخن سيجارة وبيبصلي بإرتياب شديد وخوف وقلبي وهو بيتلعثم:

إنت.. إنت مين.. وعاوز إيه يا حضرت؟!

ومع رعبه ولخبطته غيرت في لحظة كل الخطة إللي كنت حطيتها، كنت ناوي أدخله دخلة الرشوة من الأخر بس كل ده إتغير حالاً بالكامل.

نادر: أنا جاي من طرف مولانا إنت إسمك إيه؟

الشاب: أنا إسمي فاروق

نادر: طيب يا فاروق مولانا له طلب ولازم يتنقذ

فاروق: مولانا مين وطلب إيه؟

نادر: مولانا إلهي كلنا عايشين في بركته هو قال إنك  
خايف من الشغل هنا

فاروق: أيوة أه والله أنا ماكملتش أسبوع ومرعوب  
وعاوز أمشي

نادر: إيه إلهي مخوفك يا فاروق؟

فاروق: الميتين إلهي جوا

نادر: أهو أنا بقى جاي علشان الميتين إلهي جوا ومولانا  
باعطني علشان ألحقك قبل ما يأنوك

فاروق: يأنوني ليه هو أنا عملت لهم حاجة؟!

نادر: المهم كمان هتاخد فلوس ولو عاوز بعد ما أخلص  
إلهي مولانا باعطني به ممكن تسبب الشغلانة كلها.

فاروق: أنا مش فاهم مطلوب مني إيه

نادر: ولا حاجة أنا هجيك هنا ٣ مرات وأول مرة منهم  
الليلة، كل المطلوب منك تدخلني جوا وتقفل عليا وتديني

ملف الجثث إلهي جوا.

فاروق: ولما يعرفوا هنا؟

<https://t.me/mktbtarab>

نادر: هيعرفوا إزاي ما إحنا بالليل، وبعدين إنت بطولك مين هيقولهم؟!

فاروق: وهتعدد قد إيه جوا؟

نادر: معرفش لما مولانا يأذن لي أخرج هخرج

فاروق: طيب، المهم تقوله ما يعضبش عليًا ويساعدني أكمل فرش شقتي علشان الحالة ضحك أوي

نادر: حاضر يا فاروق

- أخذت ملف الجثث وفاروق خبط على باب التلاجة ٣ خبطات وقال: لما تحب تخرج خبط على باب التلاجة من جوا وهفتحك، لو وقفت جوا تنادي مش هفتحك إذت أكيد فاهم إن المكان ده له أصول.

بمجرد مافتح الباب هب عليا هوا ساقع بارد برودة الموتى، ولوهلة لمحت كل الأدراج إتهزت هزة بسيطة حتى فاروق ما لاحظهاش من كتر ما كانت خاطفة.

فاروق: هسيبك زي ما إنت طلبت، مش كل الأدراج على فكرة فيها جثث، هتلاقي المليون وهتلاقي الفاضي، إنت عارف هتعمل إيه بالضبط؟

نادر: أقسم لك ما أعرف أنا هنفذ إليّ إتطلب وخلص.

- خرج فاروق وقفل الباب وسابني لمصير مجهول.

- هو أنا ليه سواء زمان أو دلوقتى لازم ما يعديش عليّ

سنة غير لما أكون إتدفنتلى مرة ولا إثنين مع ميتين.

وقفت قدام أدراج التلاجة ومدي ضهري للباب الرئيسي

وبفكر هبدء بمين الليلة.

روحت على أول درج فى وشى شديت المقبض وأنا فى

منتهى الخوف ماهو يا جماعة مهما الواحد شاف مفيش

بعد رهبة الموت!

(الدرج رقم ١٧)

الدرج الأولانى طلع فاضى، مديت إيدي على الدرج إليّ

تحتة وإذا بشحنة كهربيا بتسري فى جسمي كله طيرتني

لورا خلتنى أخبط فى الباب وأقع فى الأرض، ببص على

الدرج وأنا قاعد فى الأرض لقيته ما إتفتحش أصلاً، كان

واضح إن مش أنا إليّ هختار الأدراج وخصوصاً إنى لقيت

درج مكتوب عليه رقم ١٧ بيتفتح بهدوء شديد وإيد سودا

بتمسك فى جاذب من جوانب الدرج كأنها بتسند عرشان

تخرج، من شكل الإيد كان واضح إن الجثة محروقة ما  
إحتاجتش أسنتي كثير علشان أتأكد من المعلومة دي  
خصوصا لما الجثة قامت قعدت وخليني أوصفها لكم  
بالضبط...

- بشرة سوداء متفحمة، الشفايف مش موجودة تقريبا  
متأكلة

- الأسنان بيضا مخيفة، الجفون مش موجودة، العيون  
مستديرة جاحظة لبرة

- العضمتين إالي تحست العينين بارزين لبرة، الرأس  
بدون شعر اللهم إلا بعض خصلات متناثرة في أنحاء  
الرأس

- ترتدي فستان أبيض شبيه بالفساتين الشهيرة في  
أفلام الرعب

كانت بتلف راسها يمين وشمال بتدور على حاجة لحد  
ما عنيتها جت عليا!

نزلت من درج الأموات وماعرفتش تحافظ على توازنها  
فسندت على أيديها ورجليها وبدأت تحبب زي الأطفال

ناحيتي وبيخرج منها صوت مش عارف أوصفها ولكم هو صوت كأنه خارج من بطنها، وبرغم إن حركتها كانت بطيئة جداً إلا إن البطاء ده كان بيخلص علياً واحدة واحدة، حاولت أقوم من مكاني مش قادر ومع كل حركة كنت بعملها كان صوتها بيعلى وبتكشر عن فكها البشع فمكنش قدامي غير إنني أستسلم تماماً وأشوفها هتعمل إيه، فضلت تقرب لحد ما وصلت عند رجلها وبدأت تشم فيهم زي الحيوانات وتوقفت عن الحركة وكأنها مستتية مني إن أنا يكون ليأ أي رد فعل، مسكت بإيديها رجلها الإثنين وبدأت تسحبني ناحية الدرج إلكي خارجه منه مكانش الموضوع سهل عليها لكنها كانت مصممة على سحبني للمكان إلكي خرجت منه، خلصت رجلها من إيدها وقومت وقفوت ونطيت دخلت في الدرج رقم ١٧ نمت على ضهري وبإيديا الإثنين مسكت سقف الدرج وسحبت نفسي لجوا لحد ما الدرج إتقفل علياً.

آخر حاجة عيني جت عليها كانت الجثة الحية دي وهي بتبصلي ونظرات عنيا خالية تماماً من أي تعبيرات.

بمجرد ما الدرج إتقفل خبط جسمي قشعرة ورجفة،  
بمجرد التفكير في الموقف إللي أنا فيه، أكيد الموضوع  
مش هيكون مجرد نومة والدليل الخروشة إللي أنا سامعها  
دلوقتي والحكة إللي أنا حاسس بيها عند رجليًا.

ضلمة، عتمة، رعب من المجهول، صوت أنفاس يتلف  
حوالين وداني، هوا ساقع بيلف جسمي حدة حدة وإيد  
باردة ماسكة كف إيدي اليمين.

البرد بيزيد وخاطرة جت في بالي إني في وقت زي ده  
مكانش عندي غيره ألجأ له... ربنا.

لكن العهد إللي دخلت نفسي فيه من أول ما إقتنيت  
الكتاب بيمنعني إني حتى أفكر في ربنا.

مخادتش معايا وقت الخاطرة دي لأن من هناك من عند  
صوابع رجليا تحديداً لمحت ضوء خافت مكانش واضح  
في الأول لكن واحدة واحدة بدء يبان وإكتشفت إنه مش  
ضوء ده لهب بدء صغير عند رجليا وبيكبر تدريجياً.

نار مسكت في رجليا وبقت تحرق في لحمي وبتتنقل  
بسرة مخيفة لباقي جسمي، كذت بصرخ جوا الدرج  
وبنادي على عامل التلاجة علشان يلحقني ولا حياة لمن

تنادي، إستسلمت وإستذيت اللحظة إللي ينتهي فيها الكابوس ده وإذا بالدرج يتفتح بمنتهى العنف نطيت برة الدرج وكل هدومي كانت محروقة وهناك عند الدرج رقم ١٧ شوفتها بتنام جوا الدرج والدرج بيتقفل بهدوء شديد فضلت أخطب على الباب بقاع التلاجة وأنادي على فاروق عامل التلاجة إللي أول ما فتحي صرخ من الصدمة، ما دارش بينا حوار غير إنني قولتله: بكرة هجيك في نفس المعاد.

معرفش وصلت البيت إزاي، جريت قلعت هدومي كلها ووقفت أبص على نفسي في المرآة علشان أطمئن إن جسمي سليم وفعلاً جسمي مكانش فيه حرق واحد.

عند باب الأوضة شوفت الراجل العجوز كان مبتسم وقالني: حصدت أول روح باقيلك إتنين، وإختفى!

إترميت على السرير وأخر حاجة فاكرها قبل ما أنام إنني سألت نفسي ياترى مين من أعدائي إتقص عمره مع أول روح ضالة؟

ونمت، كان نوم هادي خالي من الكوابيس جاي بعد ساعات عصبية قضيتها في الدرج رقم ١٧.



اليوم إلي بعد الصبح صحيت على مكالمات كثير من  
أمي رديت متوقع إنها هتقولي إن الشيخ لطفي مات لكن  
المكالمة مشيت كالآتي..

والدة نادر: أنا مش عاجبني حالك إلي وصلته ده

نادر: ماله حالي يا ماما؟

والدة نادر: إنت ما سيدبتش حد ما زعلتوش قبل ما  
تمشي وأختك أمنية ما بتخرجش من الأوضة من وقتها

نادر: ليه يعنني هو أنا كنت عملتها حاجة؟

والدة نادر: يا نادر أختك مله اش غيرك من بعد موت  
أبوك

نادر: والمطلوب مني إيه؟

والدة نادر: تيجي تصالحها وتطيب خاطر الحاج مختار  
إلي كسفته الراجل ما يستاهلش منك كدة

نادر: يا ماما ده راجل مُبالغ فيه

والدة نادر: وإيه الجديد ماهو كدة على طول وإنت كنت

متحملة ومبسوط، إيه الجديد بقي؟

نادر: الجديد إن أنا إتغيرت

والدة نادر: إتغيرت للأسوء، لو كل واحد ربنا فتحها عليه  
وكبر في شغله إتغير على الناس قول على الدنيا السلام

نادر: طب سلام بقى علشان أنا مش فاضيلك

والدة نادر: إيه هتقفل في وشي السكة ولا إيه؟

نادر: في إيه يا ماما؟

والدة نادر: بقولك أختك تعبانة وإمبارح بالليل تعبت

أوي

نادر: هاتيلها دكتور، أمنية متدلعة بزيادة بس والبركة

فيكي.

والدة نادر: إللي تشوفه يابني ربنا يصلحك حالك، بس

خلى بالك أنا ما شوفتكش بتركعها وإننت في البيت ولو

إللي في بالي صبح وبطلت تصلي ربنا مش هيباركلك في

أي حاجة وأول حاجة هتتضر شغلك إللي إنت فرحان به ده

نادر: تمام وصلت النصيحة، حاجة تاني؟

والدة نادر: إنت مش ممكن تكون نادر إبني

نادر: أنا لازم أقفل علشان أقوم أليس وأروح الشغل.

- أنهيت المكالمة مع أمي بعدما هي كمان قالتلي: إنت مش نادر، للدرجادي كانوا بيحبوني بشخصيتي الضعيفة الإنهزامية؟ وأول ما بدأت أشم نفسي بقيت مش نادر، براحتهم بقي.

فطرت بسرعة وروحت المكتب وأول ما شوفت مدبولي وهو بيحطلي كوباية الشاي قولتله:

نادر: بقولك إيه يامدبولي إنت تعرف حاجة إسمها الأرواح الضالة؟

مدبولي: أه أعرف إلابي زيك كدة

نادر: يعني إيه؟

مدبولي: يعني واحد ربنا مديله كل حاجة هيسيب كل ده ويمشي في السكة الشمال

نادر(ساخراً): ده على إعتبار إن حضرتك كذت إمام

جامع؟

أفكرك عملت إيه فيا أنا وهالة؟

[HTTPS://T.ME/MKTBTARAB](https://t.me/mktbtarab)  
(لمزيد من المعلومات برجاء العودة لرواية...)

مدبولي: ما بقولش إنني إمام جامع بالعكس أنا كل إلهي  
عملته غلط بس عقاب ربنا ليا كان كبير أوي جه في إبني،  
فوق يا أستاذ نادر قبل ما الكتاب ياخذك أكثر من كدة  
وتفقد إلهي بتحبهم واحد ورا الثاني

نادر: مجاش جوابات النهاردة؟

مدبولي: لا والله مجاش

مر اليوم بهدوء اللهم إلا رسالة واحدة من أمنية بتقولني:  
أذا تعبانة ومش عارفة مالي

وكان ردي عليها إني هكلم حد من زميلي إلهي في البلد  
يجيبها دكتور.

تعمدت أطول في الشغل لحد المغرب علشان أطلع من  
الشغل على تلاجة الموتى وده إلهي حصل فعلاً، أول ما  
فاروق عامل التلاجة شافني قالني:

فاروق: وصيت عليا مولانا؟

نادر: طبعاً، وباعتلك معايا دول كمان

[HTTPS://T.ME/MKTBTARAB](https://t.me/mktbtarab)

فاروق: إيه دول؟

نادر: كل طوبية من دول لفها حوالين سريرك قبل ما  
تنام وخلال أسبوع هتسمع أخبار تفرحك  
(بالمناسبة يا جماعة الطوب ده أنا جبتة من على باب  
المستشفى وأنا داخل).

فاروق صدق وبلع الطعم وقولتله: يلاً علشان أدخل  
تاني.

فاروق: بس في حاجة غريبة حصلت بعد ما إذت مشيت  
نادر: حاجة إيه؟

فاروق: الميتين هاجوا، هاتك يا خبط ورزح جوا  
التلاجة وأدراج تتفتح وتتقبل وأصوات تخوف جداً، شوف  
وقتها كنا بالنهار بس بردو خوفت وطلعت وقفت برة لحد  
ما هديوا لما علبت القرآن الكريم.

نادر: هقول لمولانا يا فاروق الموضوع ده، مش يلاً  
ندخل بقى؟

(الدرج رقم ٣)

فتح فاروق باب التلاجة ودخلت وقفل عليا زي إمبارح،  
وقفت مدي ضهري لباب التلاجة وببص على الأدراج

مستدني أي إشارة من جثة النهاردة، بعد حوالي دقيقتين لاحظت سرسوب مية بينزل من الدرج رقم ٣ وكان الدرج بيتلمي مية وفاضت وبتنزل منه، السرسوب زاد والدرج إترج وبدأ يخرج منه مية كثير وهو لسه مقفول.

المية بتغرق الأرض وكان واضح إن هو ده درج النهاردة، روحت للدرج ده على طول وفتحته لقيت المية جواه بتفور ومش شايف أي جثث، بالمناسبة مش فوران المقصود به إنها بتغلي، لا كانت بتتقلب بسرعة، إتهمرت المية من الدرج أكثر وإنفجرت في وشي، رجعت لورا خطوتين ورجعت ثاني للدرج علشان أبص عليه حاولت أتفحص بعنيا وأدور على الجثة مش شايف حاجة، مديت إيدي جوا الدرج أدور يمكن ألقى حاجة وفي لحظة إيد مسكت إيدي وشدتني بمنتهى العنف جوا الدرج لدرجة إن راسي إتخبطت في الدرج إالي فوقيه فدوخت والدنيا ضلمت قدامي وكل إالي فاكره قبل ما أفقد الوعي إني دخلت بجسمي كله جوا الدرج وإتقفل عليا.

ضالمة، خذقة، شلل تام من جديد ونايم على ضهري  
ومفيش نقطة مية حواليا بس حاسس بتقل رهيب فوقى،  
كأن في طور نايم عليا وسامع صوت حد بيغرق وبيقول:

أنا نزلت في الغريق، إلحقوني

أنا مبعرفش أعوم

أنا بغرق حد يلحقني

وبدء الصوت يبعد وساد المكان صمت تام ما دامش  
طويلاً لأنى سمعت صوت مية يتملى الدرج كانت بتغمر  
الدرج وأنا بحاول أحافظ على هدوئى علشان أنظم تنفسي،  
لكن في الآخر المية غمرتني بالكامل ومش باقى غير  
مذاخيرى وبوقى إالى برة المية، الموضوع ماطولش لأن  
المية غمرتني وبمجرد ما وشي كله بقى في المية فضلت  
كاتم نفسي ومغمض عنيا وكأني هزود من عمري دقيقة  
لكن في الآخر إستسلمت، فتحت بوقى وحسيت بالمية  
بتخترق الرئتين وجربت الموت غرقاً وعرفت الغريق آخر  
حاجة بيمر بيها بتبقى إيه قبل مايموت، فتحت عنيا  
شوفت ضلمة زي إالى بنشوفها في أعماق البحار في

برامج التلفزيون أو في الغوص للبيحبوا يمارسوه،  
كذت عامل زي إلهي طابير جوا الضلمة دي.

شوفت ضوء جاي من بعيد كان بيقترب بهدوء لحد ما  
بقي في وشي، الضوء قل وقدرت أشوف بوضوح فإكتشفت  
إن الضوء وراه آخر حد كذت متوقع أشوفه.. هالة!

كاذت بتبصلي بنظرات كلها عتاب وحزن، ما إتكلمتش  
وإدتني ضهرها ومشيت حاولت أعوم وراها لكن حسيت  
بحاجة زي الزلزال ومن فوقني شوفت زي ما تكون طاقة  
نور بتفتح ولقيت دراع ظهر من العدم بيشدني لفوق،  
سبت نفسي له لقيتني قعدت في الدرج والدراع إلهي  
كان بيشدني كان صاحبه واحد ميت واقف قدامي وشه  
أزرق منفوخ عمسال ينزل من ودانه وعيذيه ومناخيره مية  
وببصلي بنظرة كلها غضب وببشاورلي إنني أخرج من  
الدرج كأني مثلاً نايم في بيته!

تجاملت على نفسي وخرجت برة الدرج وبمجرد ما  
خرجت هو دخل مكاني ورجع الدرج يتملي مية وإتقفل  
عليه، لقيت محفظتي وتليفوني مرميين في الأرض



مجاهش عليهم نقطة مئة شديلتهم وخبطت على باب  
التلاجة وفاروق فتحلي وعلى وشه نفس نظرات الذهول  
وقالي:

فاروق: إيه إللي مغررك كدة إنت فتحت الدرج رقم ٣  
ولا إيه؟

نادر: إشمعنى؟

فاروق: ماهو الجثة إللي فيه لواحد غريق وبالمناسبة  
الجثة بتاعة الدرج ١٧ محروقة ومجهولة بردو، إنتوا إيه  
حكايتكوا بالضبط؟

نادر: أنا همشي وهجيك بكرة

فاروق: طب إستنى لما هدومك تنشف

نادر: أنا مشيت وهدومي محروقة إمبرح هتفرق إيه؟

وأنا واقف بكلمه ظهر من وراه نفس الراجل العجوز  
بنفس الإبتسامة وقالي: حصدت الروح الثانية باقيلك  
الأخيرة.

روحت غيرت هدومي وإترميت على السرير لحد اليوم  
إللي بعده، صحت من النوم مُجهد وقررت ما أروحش

الشغل النهاردة، بعث رسالة لعلا قولتلها: بلغيهم إنني  
مش هقدر أجي النهاردة، شافت الرسالة وماردتش قوت  
أكيد لسه مقموصة.

وبما إتي فاضي النهاردة لحد معاد الروح الثالثة جبت  
الكتاب وفضلت أقلب فيه وكل أما أقلب صفحة أذهر  
بمحتوى الكتاب، فعلاً الكتاب مش ممكن يكون بنى  
أدم إلهي كتبه أنا مش عارف إزاي كنز زي ده كان في إيد  
مدبولي وفرط فيه بالسهولة دي، معقول الكتاب يكون له  
دخل في موت إبنه؟

على العموم أنا مش بالغباء ده إلهي يخليني أسمح إن  
القدر بتاعه يقع على حد مني.

فضلت صاحي للفجر بفكر في كل إلهي حصل.  
علقة الليلة إلهي فاتت وإلهي قبلها كانوا أصعب  
مايكون، ياترى النهاردة هتكون إيه؟

أديني قابلت محروق وغريق فاضل إيه من الموتات  
البشعة علشان أعيشها النهاردة؟

هانت كلها كام ساعة وأشوف بعديًا، الوقت مر يومها  
ببطء وعلشان أكسر الملل خرجت أتغدى برة وعلى المغرب  
كذت بخبط على فاروق إالي قابلني بوش مخطوف وإتكلم  
بصوت واطي وقالني:

فاروق: مش هينفع دلوقتي يا أستاذ نادر

نادر: هو إيه إالي مش هينفع دلوقتي؟

فاروق: مش هينفع تدخل

نادر: ليه؟

فاروق: علشان في جثة هذستلمها دلوقتي إالي  
المفروض الإسعاف هتجيبها خلال نص ساعة أو ساعة  
بالكثير

نادر: برودو مش فاهم إيه العلاقة؟

فاروق: يعني يدخلوا يحطوا الجثة في التلاجة يلاقوك  
نايم جوا؟!

نادر: عندك حق، والعمل؟

فاروق: لو مستعجل أقعد هنا جنبني لحد ما يجيبوا  
الجثة وبعدها أدخل ونام في الدرج زي ماتحب إنشالله  
تنام للصبح

نادر: إنك عرفت مدين إن أنا بتام في الدرج؟

فاروق: أكيد من كاميرات المراقبة، بصراحة أول ما بتدخل بفضل أتفرج أشوفك هتعمل إيه

نادر: وبتلاقيني بعمل إيه؟

فاروق: ليه هو إنت مش عارف إنت بتعمل إيه؟

نادر: بقولك قولي بتشوف إيه؟

فاروق: حاضر ماتزوقش في الكلام، إنت بتدخل من هنا تقوم واقف زي التمثال والنور جوا بيدء يترعش وبتتحرك ناحية الأدرج بعدها النور يتقطع، بقولك إيه تعالي شوف بنفسك أحسن في الشاشة أكيد هتكون فاهم أحسن مني.

شغل فاروق فيديو كاميرات المراقبة أول يوم وإللي حصل الآتي..

دخلت قلعت ساعتني وحطيتها في الأرض ومعها الموبايل والمحفظة والملف بتاع الجثث وقلعت الجزمة والشراب ولزقت في باب التلاجة شوية بعدها إديت ضهري لأدرج التلاجة وبصيت للحيطنة وفضلت على الحال ده

أكثر من خمس دقائق بعدها رفعت إيدي الشمال ولفيت  
بجسمي ١٨٠ درجة وبإيدي إلي رفعتها شاروت على درج  
معين كان الدرج ده رقم ١٧، إتحركت بشكل لا إرادي كأنني  
مَنوم مغناطيسياً، إلي لاحظته وأنا رايح ناحية الدرج  
إن كان في دخان بسيط طالع من جسمي وهدومي كأنني  
هتتحرق وبمجرد ما وصلت للدرج الدنيا ضلمت تماماً،  
فاروق كان عايز يجزي الصورة قولتله لإسـتـنـي، فضلت  
أدقق لمحت في الضلـمة بصعوبة الدرج بيتفتح وأنا بدخل  
فيه بعدها مفيدش حاجة حصلت لمدة طويلة لحد ما النور  
رجع وأنا واقف ولبسي محروق، فضلت واقف على الحال  
ده مدة مش بسيطة والدرج مفتوح والجنـة موجودة فيه،  
فين وفين بدأت أتـحـرك وفي نفس الوقت الدرج كان بيتقفـل  
بمنتهى الهدوء.

فاروق نطق في الوقت ده وقال:

فاروق: أنا عايز أفهم الدرج ده إتفتح وإتقفـل لو جهه

إزاي؟

نادر (ضاحكاً): هي دي الحاجة الوحيدة إلي  
لا قيلها تفسير يعني؟ شغل الفيديو الثاني يلا

فاروق: حاضر أدينا بنتسلي لحد ما الجثة الجديدة  
توصل أنا هشغلها ولك وهدخل أشوف الدرج إالي هنحط  
الجثة فيه غالباً هيبقى رقم 5.

شغل فاروق القيديو ومشى وهو داخل نبيه علياً إن لو  
حد جه أناديله بس لازم أخبط على الباب الأول.

بدأ القيديو بنفس الطريقة وبنفس سرحاني  
وإنصياعي التام لشئ مش ظاهر، حطيت حاجتي برديو  
على الأرض وإتوجهت ناحية الدرج رقم ٣ وإلي لما دقت  
معاه كان بيدزل سائل أسود ثقيل مش مية زي ما حصل  
معايا، قربت من الدرج إالي إتفتح لوحده وخرج منه إيدين  
رفيعين متغطيين بحاجة أشبه بالشحم، قربت ودخلت  
وشي بين الإيدين دي إالي بدأت تتحسس وشي وبحركة  
مباغثة خبطت دماغي في الدرج وسحبتني جوا الدرج  
وكان جسمي زي مايكون مافيهوش عضة، كان ليّن  
جداً لدرجة إنني دخلت الدرج زي العجينة، إتقفل الدرج  
بعنف وإنقطع التيار الكهربى، فضلت أدقق في الصورة  
المضلّمة.

إتكون في وسط الضلّمة كيان عبارة عن راجل عجوز مع  
شوية تركيز إكتشفت إنه نفس الدليل إللي بيظهرلي، إللي  
بحكيه لحضراتكم ده أنا شايفه بالعافية لأنه جوا الضلّمة  
والعتمة مد العجوز إيده فتح الدرج النور رجع في الوقت  
ده، والعجوز إختفى وأنا خرجت من الدرج زي الغريق إللي  
لقني طوق نجاة ورجعت وقفت أخذت حاجتي وإبتسمت  
إبتسامة مخيفة وقولت جملة بس للأسف الصورة مفيش  
معاها صوت فعدت الفيديو أكثر من مرة علشان أعرف أقرأ  
شقايفي وأشوف بقول إيه بس بدون أي فائدة.

خرج فاروق بسرعة من التلاجة وقاللي:

فاروق: أنا قولتلك لما حد يخبط على الباب تناديلي

نادر: ماهو محدش خبط

فاروق: هو إيه إللي محدش خبط؟! أنا سمعت الخبط

وأنا جوا، قوم أقعد على الكرسي التاني وما تنطقش خالص

ولو حد سألک، إنت ابن عمي وجاي تزورني من البلد.

فتح فاروق للمسنّعين ودخلوا بجثة محطوطة جوا  
الجراب الأسود إللي بيتحط فيه الميتيين، كان هو وإثنين

مسعفين دخلوا وأنا فضلت أعيد في اللاقطة لحد ما عرفت  
أنا بقول إيه، كذت بقول:

بكرة الدرج رقم ٥ في الوقت نفسه فوقت على صوت  
فاروق وهو خارج مع المسعفين وبيقولهم أنا معنديش  
أدراج غير رقم ٥ وأديكوا إستخدمتوه وحطيتوا فيه الجثة  
دلوقتي لو جبتوا ميديين ثاني هبدأ أنيمهم في حضان  
بعض، وضحكوا الثلاثة.

الجملة نزلت عليا زي القلم على خلقتي مع إن فاروق  
كان قايل موضوع الدرج رقم ٥ ده قبل كدة بس المرادي  
الرد جه فوري ومن قبل ما أدخل أنا عارف وجهتي الدرج  
رقم 5.

(الدرج رقم خمسة)

ليه المرة دي بالذات الرسالة مباشرة بالشكل ده؟

ليه المرادي تحديداً بتوجه ناحية الدرج رقم ٥ من قبل  
حتى ما أدخل التلاجة؟

مش هسفل بالي ولا بالكوا بتكهنات كلها دقايق  
وهشوف بعنيًا ليه تحديداً الدرج رقم 5.



من غير ما أتكلم مع فاروق فتحت باب التلاجة ودخلت وروحت على طول على الدرج رقم 5 شديت وفتحته بدون تفكير أو تردد، الجثة قعدت وشهقت وكأن الروح ردت فيها، في الحالات العادية المنظر يشيب بس إللي شيدني منظر تاني خالص!

فضلت أصرخ وأقول:

إنت!!

إنت!!

إنت!! وأزعق..

قعد في الدرج يتلفت حوايه وسمعت نفس صدى الصوت بيقولي: دي آخر فرصة ليك إهرب يا نادر من الأرواح الضالة.

طبعاً عايزين تعرفوا مين صاحب الجثة؟!

صاحب الجثة يبقى أبويا(مصطفى عبدالرحيم فودة).

نادر: إنت إزاي، أنا دافذك بإيديا إزاي تدخل هذا! إنت ميت من ستين!

إلتفت لي وهو قاعد في درج الأموات وبصوت جاي من أعماق الجحيم ويمنتهى الشر قالني:

أنا الروح الثالثة!!!

نادر: لا يا أبويا الموضوع فيه حاجة غلط

والد نادر: هو أكيد غلط من أول ما دخلتك الشغلانة دي بإيديا، أنا موتي كان على إيدك إنت

نادر(صارخاً): أذا مليس ذنب يعني إيه موتك كان على إيديا؟

والد نادر: لا إنت عارف كويس إنك السبب في هلاكي

نزل أبويا من الدرج الخامس وقرب مني وأنا واقف وقالني:

والد نادر: تحب تحصل على الروح الثالثة دلوقتي بس إنت أكيد عارف الشرط إنك تعيش لحظات موتي بالتفصيل

إللي كنت سبب فيها!

[HTTPS://T.ME/MKBTARAB](https://t.me/mkbtarab)

نادر: بقولك أنا مليس ذنب، أنا مجيتش جنبك

والد نادر: ماهو مش لازم يكون بإيدك ولا نسيت كلام  
كساب ليك، إنت مؤتله أبوه وهو مؤتلك أبوك فنقدر نقول  
إن إللي حصل ده بشكل أو بآخر إنت السبب فيه.

نادر: كساب مين إللي أنا مؤتله أبوه؟! أنا معرفش حد  
بالإسم ده!

والد نادر: إيه معقول لحقت تنسأه؟ على العموم أنا  
دوري إنني أخليك تعيش اللحظات الأخيرة في حياتي كونك  
بقى تفتكر أو ماتفتكرش دي بقى مش بتاعتي، إفتكر يا  
نادر وإرجع بالذاكرة معايا لمشهد طول عمرك بتحاول  
تهرب منه.

لقيتني بارجع لمشهد فعلاً بكرهه ومابحبش أفتكركه،  
لقيته بيتكرر قدامي بكل تفاصيله، بعيشه بكل جوارحي  
من جديد، لقيتني واقف قدام بيتنا علشان أستقبل أكبر  
حزن في حياتي!..

هحكي لكم المشهد وأعتقد إنكم هتفتكروه...

كراسي في الشارع قدام بيتنا صوت قرآن خارج من  
بيتنا بصوت الشيخ محمود خليل الحصري بيأكد إن  
البيت ده فيه ميت!

كنت ماشي وأنا بقدم رجل وبآخر رجل لحد لما الناس  
إللي واقفين قدام البيت لمحوني جم بسرعة ناحيتي وكل  
واحد منهم بـءء يكلمني.. كانوا كلهم بيتكلموا في صوت  
واحد و وقت و واحد:

- حمد لله على السلامة يا نادر، كويس إنك متأخرتش،  
لسه قدامنا وقت على صلاة العصر

- أمك رافضة أي حد يدخل على المرحوم

- إنت مبتردش ليه يا نادر مش هينفع كده، إنت لازم  
تمسك نفسك عن كده

صرخت قيهم غصب عني:

- هو في إيه إنتوا شايفني بلطم وبقطع في شعري..!  
إتضدوا من رد فعلي وكلهم سكتوا، إنسحبت من  
وسطهم وتوجهت ناحية باب البيت بقاعنا ودخلت وطلعت  
السلم...

أول ما دخلت الشقة جريت على أوضة بابا حاولت أفتح  
باب الأوضة مفتحش.. فضلت أخبط وناديت على أمي أكثر  
من مرة لغاية لما الباب إتفتح.. أول لما شافتني قالت:

- إذت السبب.. في إللي حصل لأبوك. من أول يوم بدأت  
تمشي ورا السحرة و الدجالين وإحنا شايفين الغم بسببك،  
أبوك مات وبذت خالتك مُخها إتلحس والله أعلم هتأذي  
مين تاني يا نادر.. روح كدة إكشف الغطا عن أبوك وإتفرج  
على نتيجة أفعالك ولا تحب أجي أكشفهولك أنا..؟

إتحركت ببطء ناحية السرير إللي عليه جثة أبويا  
المتغطية بكوفرتة وعقلي عمال يتخيل مليون شكل لوش  
أبويا..

مديت إيدي ورفعت الكوفرتة عن وشه.. رميت الغطا  
وكتمت بوقى بإيدي عشان ما أصرخش ورجعت لورا من  
الصدمة.. أبويا ملامحه كانت بشعة مرعبة جداً، عينيه  
جاحظة وخارجة لبرا لدرجة إن الدم نازل منها ومغرق  
وشه ومتجلط وبوقه كان مفتوح على الآخر ونازل منه رغو  
بيضا ولسانة لونه أسود حالك أما عن لون بشرة أبويا فكان  
بنّي ملبان أثار حرق وأجزاء من الجلد متشالة وواقعة على  
المخدة جنبه ولحم الوش باين.. وعينيه مركزة على نقطة  
معيضة في السقف

فجأة أُمي شددت باقي الغطا عن باقي جسم أبويا عشان  
 أتفاجئ بالباقي.. أبويا إيديه كانت مكلبشة وكان رافعها  
 لفوق كأنه بيحامي نفسه من حاجة هتقع عليه من السقف  
 وعلى رقبة أبويا أثار تقطيع وبقايا شوك مغروس في  
 رقبته، ناهيك عن عضم وشه البارز بشكل مُفزع.

دخل الشيخ لطفي والحاج مختار علشان نغسل أبويا،  
 كذت معظم الوقت أذناء الغسل ببعده عينا عذ مش  
 عاوز أشوفه وسامع الشيخ لطفي عمال يقرأ قرآن..

بصيت بطرف عيني على والدي لقيته بيبص عليا..  
 عينيه جت في عينا بعد ما كان باصص لفوق وفضلت  
 عينيه بتتحرك معايا كل لما أتحرك يمين وشمال..

سمعت صوته بيتسأل لوداني من غير مايفتح بوقه  
 وبيقولي: {شوف نتيجة أفعالك}

{إنت كذت فاكرها لعبة وأنا إللي دفعت التمن وجه الوقت  
 يا نادر تعيش لحظات الموت الأخيرة إللي أنا عيشتها بكل  
 تفاصيلها المفجعة}.

<https://t.me/mktbtarab>  
 بس يا ترى هتقدر تتحمل إللي أنا إتحملمته؟

إوعى تنسى أبداً إنك إنت كنت السبب في تدهور  
حالتى ونهايتى البشعة إلی كذت بداري وشك علشان  
ماتشوفهاش.

إوعى تنسى أبداً ياذاذر إنك إنت إلی مؤتني.

تبدل المشهد ولقتني واقف في فراغ أسود بكلم نفسي:  
- هو أنا فعلاً مؤت أبويا؟

- هو أنا بعد ما دعيت عليه في صلاة الجنازة وديته في  
داهية؟

- هو أبويا بيدفع تمن حاجة أنا السبب فيها؟ (يرجى  
الرجوع لرواية النقش الملعون)

إتبدل المشهد لقيتني في بيتنا في البلد وأنا نايم على  
السرير وشايف أمي بتكلم أمنية وبتقولها لازم أخوكي  
يجي، أبوكي حالته بتتدهور وقربت مني وبتقولني إتكلم  
يا مصطفى بتبص لإيه ياخويا، في اللحظة ديه أيقنت إنني  
مكان أبويا وبقيت جوا جسمه!

دخل عم مختار وباسني من جبيني وقال لأمي وأختي  
سيدبوا مصطفى يرتاح شوية يمكن وجودنا مصعب عليه  
إنه يروح.

قامت أمزية إنفجرت بالبكاء وقالت: خلاص كدة أبويا  
بيموت؟!

قام رادد وقالها: إدعيله يابذتي، وعيط

طلعت ماما وأمزية و وقف عم مختار وقال: اللهم هون  
عليه سكرات الموت.

كنت عاوز أصرخ بعلو صوتي وأقول ماتسيديونيش  
لوحدي لكن في حاجة كانت منعاني إنني أنطق!

خرج من وراء الستارة شخص ملامحه مش واضحة  
وقالي: عيش يا نادر.. عيش نهاية أبوك بكل تفاصيلها ،  
خليها تستنزف روحك لأخر قطرة.

بعدها إختفى وظهر مكانه كائن مخيف عابس الوجه  
ضخم البنيان ومد إيده ناحيتي كل إللي جه في بالي إن  
ده ملك الموت فضلت أحرك في راسي يمين وشمال كأني  
بقوله: لا مش عايز أموت دلوقتي، خبط الأرض خبطة



كسرت الحيطان وخرج ٣ وحوش أشبه بالغوريلا لكنهم  
أكثر بشاعة منها بملايين المرات وحجمهم أكبر منها  
بكتير ومن ورا الستارة نفس الشخص بيتكلم:

- بحق قوى الأعوان
- بحق الدم في الشريان
- وبكل ذلٍ وهوان
- تقبض روحك عاجلاً الآن

- بحق قوى الأعوان
- بحق الدم في الشريان
- وبكل ذلٍ وهوان
- تقبض روحك عاجلاً الآن

إتلفوا ال ٣ كائنات المخيفة ورفعوا أيديهم لفوق وخرج  
من أيديهم نار شقت السقف

وكوئت فتحة منها للسما، ولقيت بينزل من الفتحة دي  
طيور مخيفة وشوشها بشسعة كلها بتنقض عليا، رفعت  
إيديا الإثنين لفوق علسان أحوشهم عني وإنا بال ٣ وحوش  
يوجهوا إيديهم بالنار إالي خارجة منها ناحيتي!

الذار مسكت في كل حطة في جسمي والطيور نازلة  
نهش في كل حطة تعرف تاخذها مني، ومن بعيد سامع  
صدي صوت:

”إنا لله وإنا إليه راجعون، توفي إالي رحمة الله تعالى،  
نادر مصطفى عبدالرحيم فودة، إبن المرحوم مصطفى  
عبدالرحيم فودة، والدفنة الآن من مسجد عباد الرحمن إالي  
جهنم وبئس المصير“

فتحت عنيًا لقيتني رجعت التلاجة وأبويا واقف قدامي  
وبيقولني:

والد نادر: تحب تكمل؟

أديك شوقت قبض الروح بالشكل العبيط إالي إنت كنت  
فاهمه زمان.

<https://t.me/mktbtarab>  
- وأدخلك القبر من جديد؟؟؟

- وتشوف الويل من تاني؟

- ولا كفاية عليك كدة؟ أقولك.. كفاية عليك لأن إلي

جاي أشد يا نادر!

نادر: أنا مليس نذب في كل إلي حصلك، أنا طول عمري  
كنت بار بيك، مش مشكلتي إن نهايتك كانت سودا بالشكل

ده

والد نادر: وهو مين كان السبب في النهاية دي؟ مش

إنت؟

نادر: لا طبعاً مش أنا

والد نادر: إنت مش ممكن تكون نادر إبني، إنت طول  
عمرك عايش حاسس بالندم، وحاسس بتأنيب الضمير  
بسبب موتي، جاي دلوقتي تقول مش مشكلتي، إنت مين؟!

نادر: جرى إيه هي لباظة على لسان كل واحد فيكوا؟

حتى الأموات كمان بيقولولي إنت مش نادر!!

بتلقت حواليا لقيتني لوحدي في التلاحة، خبطت على

فاروق فتحلي وأول ما فتح قال:

فاروق: أهو ده إلهي كان ناقص، مرة بهدوم محروقة  
ومرة بهدوم مبلولة ومرة عريان ملط!!

أدركت في اللحظة دي إن أنا عريان تماماً، أخذت هدوم  
من فاروق ولبستها وطلبت منه يجي معايا جوا تلاجة  
الموتى ويفتح هو بنفسه الدرج رقم 5، فتح الدرج وصرخ  
وفضل يقول: مش ممكن.. أعوذ بالله.. يارب لطفك.

إلهي كان في الدرج كان أبويا وكان شكله عادي زي  
مايكون نايم بالضبط، إلتفت لفاروق أقوله في إيه لقيته  
جري وخرج برة كان قاعد على الكرسي بيتنفض.

نادر: ممكن أفهم إيه إلهي خوفك؟ ما إنت على طول  
وسط الميتين

فاروق: قسماً بالله الجثة دي غير إلهي دخلت من شوية

نادر: طب ما عادي ما كلهم أموات

فاروق: لا مش عادي

نادر: تحب أقولك الجثة إلهي إذت شوفتها جوا دي جثة

مين؟ دي جثة أبويا ميت من سنيين ومعرفش إزاي جثته  
رجعت ظهرت من جديد وحت هنا!

فاروق: أبوك مين؟! الجثة إللي في التلاجة جثتك إنت!

نادر(مصدوماً): نعم! إزاي يعني؟!

فاروق: بقولك جثتك إنت، وكنت فاتح عيذك وبوقك على الآخر ورافع إيدك لفوق كأنك بتحمي نفسك من حاجة هتقع عليك من السقف وعنيك بتنزف وبوقك عمال ينزل منه رغوّة ورقبتك مليانة شوك مغروس فيها والنمل سارح على جسمك كله.

نادر: قوم معايا نبص عليها مرة تاني كدة.

دخلنا وفتحنا الدرج لقينا جثة تالّثة لأ أنا ولا أبويا!!

فاروق: هي دي الجثة إللي أنا إستلمتها.. هي دي وربنا!

نادر: إقفل عليها يا فاروق ويلاً بيانا نطلع برة أنا كدة

خلاص مش محتاج حاجة تاني، هو طلب واحد هتشغلي

الكاميرات أشوف إللي حصل وهديك فلوسك وهمشي

فاروق: هشغلها لك وهروح أعمل كويادتين شاي علشان

بصراحة مش عايز أشوف حاجة تاني في المكان ده.

شغل فاروق تسجيل الكاميرات وسابني ومشى وبدأت  
أتفرج على أغرب حاجة ممكن تتخيلوها!

البداية دخلت زي كل مرة حطيت الساعة والموبايل  
والمحفظة وملف الجثث على الأرض، إتوجهت مباشرة  
ناحية الدرج رقم ٥ وفتحته وإتعاد نفس إللي حصل  
بالضبط الفرق الوحيد إنه مكاتش أبويا كان الشخص إللي  
الإسعاف جابته بس من الواضح إنني كنت شايفه إنه أبويا  
ودار الحوار بيني وبينه، بقيت كل شوية أسيديه وألف في  
الأوضة وأرجعله من تاني، أحياناً أقعد في الأرض، أحياناً  
أجري، أحياناً أشاور بإيديا كآني في خذاقة.

بعد شوية إنتهى الحوار بالكامل ولقيته بيفتح الدرج  
علشان يدخل جواه لكن ظهر من أحد الجوانب المظلمة  
في التلاجة الراجل العجوزا وشاور بإيده كأنه بيستدعي  
حد، الشخص إللي المفروض كذت شايفه أبويا خرج  
بمنتهى الهدوء من الدرج رقم ٥ وبدء يلف على كل درج  
من أدراج التلاجة يفتحهم ومع كل درج يفتحه كانت جثة  
بتقوم تقعد.

إللي من غير رأس، إللي محروقة، إللي مخذوقة، إللي  
إتركنت فترة طويلة فملاحها بقت بشعة وغيرها كثير.  
ومن داخل الأدرج كلهم بصوا ناحيتي وشاوروا عليًا  
وصرخوا، صرختهم كانت أشبه بزلزال ضرب المكان  
كله وقعت من قوته على الأرض وبدأت الجثث تنط من  
الأدرج واحدة ورا الثانية، هجموا عليًا وشالوني ورفعوني  
زي الدبيحة كانوا بيـجروا بيًا في الأوضة وبيتباروا مين  
هيشيلني كأنهم شايدين ميت في نعشه ورايحين به  
لمثواه الأخير!

مكنتش محتاج أسمع لكن الصورة مترجمة أحسن من  
مليون صوت، فضلوا يشدونني من بعض لحد ما قطعوا  
هدومي بالكامل، حطوني في الأرض وسط دايرة معرفش  
إترسمت إمتي وقعدوا كلهم حوالين الدايرة، في الوقت ده  
أنا كنت فاقد الوعي لا بتحرك ولا بعمل أي حاجة، هما إللي  
كانوا بيعملوا، قاعدين في دايرة وعمالين يعملوا حركات  
منتظمة مصحوبة بحركة شفايفهم غالباً كانت تعويذة  
بيرددوها مع بعض ولازال الراجل العجوز واقف مبتسم!  
ولكن سرعان ما تبدلت الإبتسامة لنظرة غضب شديدة و

إتلفت براسه لركن ثاني من أركان التلاجة وركزت إكتشفت  
 إن في شخص ثاني موجود وهو سبب غضب الراجل  
 العجوز، مكنتش قادر أحدد ملامحه لأنه كان مختفي جوا  
 الضلمة وبإشارة ثانية من العجوز كل الجثث قامت وقفت  
 وهجمت على الشخص الثاني وكرروا نفس إلي عملوه  
 معايا شالوه وبدؤا يلفوا بيه جوا التلاجة وكانت الصدمة  
 إن الشخص ده طلع هالة!!!

في اللحظة دي أذا فوقت وقومت وقفت وجريت علشان  
 أذقنها لكن الدائرة إلي حواليا إتحولت لكتلة من النار أذا  
 محبوس جواها، ولأول مرة من وقت طويل أشوفتي بعيط  
 علشان من جديد هالة هتضيع مني، الموضوع ما وقفش  
 عند كدة دول حطوها في الدرج رقم ٥ وقفلوا عليها ورجعوا  
 قعدوا حواليا وبمجرد ما دايرتهم حواليا إكتملت حصل  
 أعجب مشهد، النار سابت الدائرة وراحت كأن حد بيسوقها  
 ناحية الدرج رقم ٥ ومسكت فيه، بعد كدة الصورة ضلمت  
 ومانوريش ثاني ومبقاش في حاجة أشوفها.

<https://t.me/mkbtarab>



طلّعت من جيبى ٥٠٠ جنية حظيتهم على المكتب  
ومشيت من غير حتى ما أستنى فاروق يرجع، بصيت في  
ساعتى كانت ١٢ وربع بالليل.

إتوجهت للبيت قلعت لبس فاروق وخذت دش ووقفت  
قدام المراية أتفحص ملامح وشى، في حاجة غريبة أنا  
شكلى كدة بيّفكرنى بشكلى من خمس ست سنين فاتوا.  
- فين الخُصل البيضاً إللى بقالى مدة شايفها في  
شعرى؟

- فين التجاعيد إللى ظهرت في وشى مع إنى لسه  
صغير؟

- فين الذاب المكسور إللى بقالى مدة عايز أروح  
للدكتور علشان يشوفله حل؟

معقول إللى أنا شايفه ده؟

هو أنا صغرت ولا بيتهياألى؟

هم الناس إللى عمرها إتقصف، عمرهم أنا أخذته فعلاً؟  
طب هي مين الناس دي أصلاً؟

لأ أنما محتاج أنام والصبح رباح بقى والنهار كفيل  
يكشف ستر كل حاجة مستخبية، بس قبل ما أنام عاوز  
أقولكم إن الموضوع مش على قد تغيير ملامحي، أنا  
حاسس بقوة وصحة دبت في جسمي ومش قادر أتجاهل  
ده.

وكالعادة إترميت على السرير وأنا مرتاح إنني خِلصت  
من حوار ليالي الأرواح الضالة ده.

# الفصل السابع

## (حوارات عبثية)

[HTTPS://T.ME/MKBTARAB](https://t.me/mkbtarab)

نمت نوم ثقيل متعب صحيت مده على صوت صرخات  
 ستات كثير، قعدت في السرير بحاول أفوق وأستوعب ده  
 كان حلم ولا حصل بجد، مفيش دقيقة والصرخات رجعت  
 تاني لثواني وسككت الصوت كان جاي من الصالة يعني  
 من قريب، نزلت من على السرير وخرجت من الأوضة  
 أبص هنا وهناك أنا مش عارف بدور على إيه لكن عمال  
 أبص يمكن أعرف سبب للصرخات بيه، رجعت الصرخات  
 تاني لمدة ثانية أو إثنين وسككت جريت ناحية الحمام لأن  
 من واقع تجاربي ومتابعتمكم لأفلام الرعب أكيد عارفين  
 إن الحمام مصدر ثري جداً للخوف والعفراريت، مديت  
 إيدي وفتحت باب الحمام بهدوء لقيته فاضي وأنا بخرج  
 لفت نظري إن ورا ستارة البانيو في ٣ أجسام واقفين ما  
 بيتحركوش مش باين ملامحهم لأن الستارة شبه مُعتمة،  
 قربت من الستارة بحذر ومسكت المساحة وخبطت بها  
 على الستارة بيها مفيش حاجة إتحركت، حطيت المساحة  
 على جنب ومديت إيدي فتحت الستارة بحذر شديد فإذا  
 بي أجد ٣ فساتين مختلفة متعلقة على شماغات ونازلين  
 من السقف معظمهم فيه أجزاء متقطعة وكأن إلهي كانوا

لابسينهم قلعوهم بالإكراه!، إنطلقت الصرخات تاني سبت  
الحمام وخرجت بسرعة وكان مفيش غير مكان واحد لازم  
أبص فيه المكان، ده قدام باب الشقة وخصوصاً إنني لما  
خرجت شوفت من تحت باب الشقة إضاءة ونور غريب  
جاي من برا غير نور عتبة الباب إالي أنا أصلاً بطفيه قبل  
ما أنام.

كنت بقدم رجل ويأخر رجل وأنا بقرب من الباب بس  
علشان ده مش وقت تردد ومع أول صرخة إنطلقت وأنا  
قدام الباب فتحتة بسرعة شوفت قدامي حرفياً ساحة من  
ساحات جهنم.

نار في كل حدة، بيوت بتتحررق، بوابات ضخمة جداً  
بعضها مقفول وبعضها مفتوح، جبل عالي وناس واقفة  
عليه طوابير وبينطوا من عليه واحد ورا التاني، طيور  
ضخمة مشتعلة بتحلق في السما إالي مقدرش أقول  
عليها إنها السما لأنها كانت سودا سواد حالك والسحاب  
مُشتعل، وقفت كأني قدام مشهد من مشاهد جهنم إالي  
طول عمري بتخيله بالشكل ده.

الصرخات دوت من جديد وكانت جاية من ورا بوابة من البوابات المقفولة، إتكون قدامي طريق ممهد للبوابة دي، مشيت فيه وأول ما وقفت قدام البوابة لقيت مقبض، إستخدمته في إتني أخبط على البوابة، فتحلي الباب نفس الراجل العجوز إلسي ظهرلي (الدليل) من أول ما حصلت على الكتاب بنفس إبتسامته وشاورلي بإيده إتني أمشي وراه، رجعت أسمع من بعيد نفس الصوت بيقولي: كفاية كدة يا نادر إرجع وتوب قبل ما باب التوبة يقفل.

مش هقولكم إن الصوت مش غريب عليا لأنني كنت شاكك ودلوقتي إتأكدت يمكن كمان إندتوا دلوقتي بقيتوا شاكين، في الحقيقة مش صوت ضميري زي ما بعضكم يكونوا فاكرين ده صوت الشيخ لطفى إلسي المفروض يكون بين الحياة والموت، ويمكن مات أساساً.

مشيت ورا الراجل الدليل لحد ما وصلنا عذ شط بحيرة مليانة حمم بركانية وفي نص البحيرة نازل من السما ٢ جنازير غليظة وفي آخر كل جنزير متعلق واحدة ومحطوط علي وشها كيس قماش أسود زي إلسي بنشوفه في مشاهد الإعدام.

كانوا الثلاثة ما بي تحركوش، هل فاقدين الوعي ولا ماتوا؟

معرفش، ظهر فجأة مركب صغير بدأ يطوف حوالين ال ٣ ستات وكان في شخص بيسوق بالمجدافين وجه تحت واحدة من الثلاثة ووقف جذبها بالمركب فجأة السلسلة إللي متعلق فيها الست دي تحديداً فكت ونزلت البنبت أو الست وغاصت في الحمم البركانية لمدة أقل من الثانية بعدها إترفعت تاني، مكانش جسمها محروق أو منتهي لأنها غاصت في حمم بركانية لكن كان أسود متفحم وأطلقت صرخة تاني زي إللي كذت بسمعتها.

قام الشخص إللي في المركب بالتجديف وبقى تحتها بالضبط وهي متعلقة ولقيته كشف الغطاء عن إناء كبير وبدأ جسم الست ينزل منه نقط جوا الإناء ده، وإتكرر الموضوع بنفس الطريقة مع الست التانية.

لقت نظري حاجة ما كنتش واخذ بالي منها، أنا ركزت أوي مع ال ٣ ستات مع إن وشهم كان متغطي وما ركزتش مع الشخص إللي كان بيسوق المركب وبيجمع في الإناء

معاه الحاجات إللي بتنزل منهم، لكن بإلتفاتة مذه ليّا  
وإبتسامة خبيثة لقيت الشخص ده يبقى أنا! أيوة!!

الصورة كلها وضحت قدامي واللغز إتحل ال ٣  
المتعلقين دول إللي إتقصف عمرهم وإللي موجود طبعاً  
ده أنا وإللي بينزل منهم ده سُمّوه عمرهم، سُمّوه صحتهم،  
سُمّوه حياتهم، وإللي أكد لي تفسيره ده إن الشخص إللي  
بيقود المركب (إللي هو المفروض أنا) رفع الإناء وبدأ يصب  
على نفسه منه، وجه الدور على الضحية الثالثة وإتعمل  
معاهها نفس إللي إتعمل مع الإثنين التانيين، الفرق الوحيد  
إنها أما جت تصرخ صرخت بإسمي بصوت خلع قلبي من  
ضلوعي، مع صرختها صحت من النوم والكابوس إنتهى.  
كانت الساعة ٧ إلا ربع الصبح، قومت جهزت هدومي  
ودخلت الحمام غسلت وشي بصيت في المرآة لقيتني زي  
ما أنا ملامحي أصغر سناً ووجهي أكثر نضارة كأني عامل  
عملية تجميل من إللي الفنانين بيعملوها من الشفط  
والشد والحاجات الحلوة دي.

وصلت الشغل ودخل مدبولي بكوباية الشاي ولسه  
هيقولي صباح الخير لقيته غير كلامه وقالي:



مدبولي: بسم الله ما شاء الله عيني عليك باردة

نادر: خير يا مدبولي في إيه؟

مدبولي: إنت ما بصيقتش في المراية النهاردة ولا إيه يا

أستاذ نادر؟

نادر: عادي بصيت إيه الجديد يعني!

مدبولي: لا يا أستاذ نادر إنت ما شاء الله النهاردة وشك

زي البدر في تمامه

نادر (ضاحكاً): إنت بتعاكسني ولا إيه يا مدبولي؟

مدبولي: ربنا يروّق بالك يا أستاذ نادر، راحة البال

بالدنيا وإللي فيها والله العظيم.

نادر: سبحان مغير الأحوال بقينا حبايب دلوقتي!

مدبولي: ربنا ما يكتب عليك إللي أنا شوفته، الشاهد

من كلامي يا أستاذ نادر إن طلتك الحلوة دي مطمئاني إنك

معملتتش حاجة تغضب ربنا ومافتحتش الكتاب من أصله،

أنا صح مش كدة؟!

نادر (مبتسمًا): وليه ما يكونش الكتاب يا عم مدبولي

هو السبب في إللي إنت شايفه دلوقتي؟!

مدبولي: ما أتمناش إن ده إللي يكون حصل!

نادر: إشمعنى؟

مدبولي: علشان الكتاب ده ما بيديش حاجة ببلاش هيديك حاجة هياخد قصادها عشرة وأدبك شوفت إللي

جرالي

نادر(ضاحكاً): بهزر معاك أنا بس كنت عامل ماسك زبادي بالخيار قبل ما أنام شوفت الأستاذة أمينة شلباينة بتعمله.

مدبولي: وده ينفع للي في سني يا أستاذ نادر؟ ده أذ عندي في البيت يجي ٢ كيلو خيار

نادر: أه ينفع طبعاً ما ينفعش ليه عمل يا أخويا عمل

مدبولي: أكل بقى الخيار الأول ولا الزبادي الأول؟

نادر: تاكل؟! بقولك إيه يا مدبولي كل إللي تاكله يلا سيبنى بقى علشان أشوف ورايا إيه الله يخليك

مدبولي: طب عايز الحلاوة

نادر: خلاوة إن شكلي عاجبك يعنى! ودي حلاوتها إيا إن شاء الله... ما كينة حلاوة!

مدبولي: لأ حلاوة ده يا أستاذ نادر

(وأخرج مدبولي من جيبه جواب جديد سلمه لنادر)...

نادر: لا كده تستاهل أحسن حلاوة ده إنت وش السعد

كله يا عم مدبولي يا بتاع الخيار

- خَرَجَ عم مدبولي وفتحت الجواب علشان أقرأه..

سلام عليكم أستاذ نادر أبو فودة..

أنا مش متأكدة الإسم صح كده ولا غلط

بس أنا لجأت لك بعد ما كل الأبواب إتقفلت في وشي،

طول عمرنا بنقول إن الشرطة في خدمة الشعب بس

لجأت لهم ما عبرونيش وطرودوني طردة الكلاب من القسم

ومبقاش عندي غيرك، ولو طردتني إنت كمان ذنب موتي

هيبقى في رقبتك.

(إتفتح باب المكتب بعنف ولقيت مدبولي إلي كان

لسه بيتغزل فيا دخل وقالب وشه وإتكلم بلهجة عمره ما

كلمني بيها قبل كده..)

مدبولي: هو إيه الحكاية بالضبط؟

نادر (متعجباً): حكاية إيه يا مدبولي؟

مدبولي: حكايتك إنت هو في حد عنده حكايات غيرك  
يا أفندي!

نادر: إتكلّم عدل يا مدبولي إنت إتجننت ولا إيه؟

مدبولي: أنا إتجننت يوم ماسلمتك الكتاب ده بإيدي

نادر: ما تنطق ياراجل إنت في إيه؟

مدبولي: هو إيه حكايتك إنت وعلّا؟

نادر (مذهشاً): إيه التخريف إلهي إنت بتقوله ده مفيش

حاجة بيني وبين علّا يا متخلف!

مدبولي: لا في حاجة كبيرة كمان والدليل شكلك  
النهاردة وشكلها هي كمان.

نادر: أنا مش فاهم حاجة من التخريف إلهي بتقوله ده

بطل حزق وفهمني في إيه بالضبط يا مدبولي.

ما كملتش الحوار بيني وبين مدبولي علشان علّا دخلت

من باب المكتب ومن الواضح إنها جت على الصوت.

علّا: أنا سامعة إسمي بيتقال هو في إيه؟

- أنا لسانى وقف ومعرفتش أرد عليها وإتصدت صدمة  
عمرى عُلا كان وشها شاحب وفيه بعض الخُصل بيضا فى  
شعرها وبعض التجاعيد البسيطة فى وشها، بالمنااسبة  
عُلا عندها ٢٤ سنة.

نادر (بتوتر): طب أقعدى يا عُلا بس وقوللى مالِك؟

عُلا: معرفش يا جماعة هو كل أما حد يقابلنى يسألنى  
نفس السؤال؟ أنا بقالى ٣ أيام تعبانة وروحت لأكثر من  
دكتور كلهم قالوا إن أنا سليمة جسمانياً وإن إلبى عندى  
ده نفسى، ألا ماتعرفش يا نادر مين مضايقتى وخلقى  
نفسيتى كده؟!!

نادر: بس يا عُلا إنتى فى خُصل بيضا فى شعرك  
عُلا: هو إنت فاكر إن أنا مايشوفهاش كل لحظة فى  
المراية؟

نادر: حاسك واخدة الموضوع ببساطة

عُلا: على إعتبار إنه فارق معاك!

نادر: طب إنتى حاسه بإيه دلوقتى؟

عُلا: شوية إجهاد وهبقى كويسة لو الكل بطل يقولى

مالك

مدبولي: أما صحیح يقتل القتييل ويمشي في جنازته

عُلا: في إيه ياعم مدبولي بتتكلم مع نادر ليه كده؟!

مدبولي: علاشان أنا وهو داقدينه سوا يابذتي

نادر: إذت لسه واقف هنا يا راجل إذت؟ إمشي إطلع بره.

مدبولي: هطلع بس خليك فاكر إن الذار هتحرق الكل

ومش هتسيب حد طول ما الزفت ده معاك.

خرج مدبولي وخرجت عُلا وإلي أنا لاحظت إنها

بتمشي بصعوبة.

رميت الجواب ورفعت إيدي على المكتب ودفنت راسي

بين إيديا وغرقت في بحر من التفكير إزاي عُلا الكتاب

يعتبرها من أعدائي؟! أنا مش فاهم!

ولما دي أول ضحية أعال مين الإثنين التانيين؟

معرفش كملت اليوم ده في الشغل إزاي، عُلا حديث

الجورنال اليوم ده لدرجة إنها ما إتحمليتش نظرات الناس

وقدّمت على أجازة ومشيت ومدبولي وأنا كنا بنتجنب

ذتقابل أو حتى عذينا تيجي في عذين بعض صدفة،

على آخر اليوم أخذت الجواب وروحت البيت ووقفت في

نص الصلاة أزعق وأطلب من الراجل العجوز إنه يظهر،  
أما دخلت أوضتي لقيته قاعد على السرير مبتسم نفس  
الإبتسامة المستفزة.

نادر: إنت مين؟

الدليل العجوز: متأخر أوي السؤال ده يا نادر، على  
العموم أنت مرشد الكتاب دوري أوجهك لتنفيذ مطالبك  
ومطالب الكتاب على حد سواء.

نادر: مكنش الإتفاق إن عُلا تكون من الضحايا أبداً

الدليل العجوز: إنت ما حددتش أسماء على فكرة

نادر: إحنا إتفقنا يكونوا أعدائي

الدليل العجوز: إنت قولت ده لكن الكتاب هو إلي

بيختار مش أنا

نادر: بس أنا قولتك أعدائي أنا فاكر كويس كلامي

الدليل العجوز: وأنا ما أمنتش على كلامك، أنا كمان

فاكر كلامي كويس

نادر: عاوز أعرف مين الإثنين التانيين؟!

الدليل العجوز: لو أعرف هقولك، أنا بعرف زيي زيك

نادر: طب لو عايزها ترجع شابة أعمل إيه؟ أنا مستغني  
عن الشباب والصحة إللي حصلت عليهم منها وبعدين أنا  
مش شايف غير تغيير بسيط في ملامحي

الدليل العجوز: هتكتشف النتيجة بمرور السنين  
وهتشكرني، وإن كان على عُلا هتتعود والكل هيتعود على  
شكلها ومش هتكبر أكثر من كده لأنها الأولى، الثانية  
والتالثة....

نادر: وأنا مش موافق

الدليل العجوز: مش إختياري يا نادر، إنت وقعت العقد  
بدمك، ونصيحة مني بلاش الكتاب يغضب، علشان غضب  
الكتاب نار هتحرق كل حبايبك وهتحرق قلبك عليهم واحد  
ورا الثاني صدقني

نادر: إنت بتهددني؟!

الدليل العجوز: أنا مرشد الكتاب ودوري أنورك  
بصيرتك، كمل الجواب إللي جالك النهاردة يا نادر إنت  
محتاجه جداً صدقني.



(عمالة تتعقد وأنا لسه بقاوح وفاكر إني ملكت الدنيا  
واللي فيها

جرى إيه يا نادر؟!

إيه إللي حصلك؟

جيت تذببت قوتك ضريرت ناس ملهاش ذنب)

(أه وإيه يعني أنا من حقي أشوف نفسي، وبعدين مين  
عُلا إللي ههتم بيها دي كمان، يكفيني إن الكل عمال يقول  
إني بقيت أكثر شباب ووسامة!

-مش ممكن ده إللي إنت بتدور عليه! وسامة إيه وزفت  
إيه!

-زفت لما تبقى تاكله!

- كده مبسوط والكل عارف إنك إتغيرت

للأسوء؟!

-عادي أنا مبسوط كده بقولك

-كذاب ومحتار جُواك صراع بين نادر القديم والجديد  
-وأوعدك الجديد هيكسب المعركة)

-يعنني إنت مش فارق معاك إللي حصل للمسكينة

عُلا؟!

-حصل لها إيه يعني ياكش تتحرق!

-طب إبقى فكر بقى مين تانني هتقول عليه ياكش

يتحرق هو كمان؟!

-أي حد عادي.

-متأكد؟

-أيوة متأكد

-والشيخ لطفي؟

-زمانه بيخلص أو مات وارتاح

-وعمك مختار إللي كسرت بخاطره؟

-راجل تافه وكان لازم يفوق علشان يبطل أفورة

-وأختك؟

-عندها أمي

-وأمك؟

[HTTPS://T.ME/MKBTARAB](https://t.me/mkbtarab)  
-عندها أختي

-وأهل قريرتك؟

-مجرد حالات بستغلها في تحقيقاتي مش أكثر

-وزمايلك في الشغل؟

-شوية موظفين قلتهم أحسن!

-وهالة يا نادر؟

-وهو أنا كمان هعمل حساب لشبح واحدة ميتة؟!

-بس إنت بتحبها

-كنت، في فرق كبير! أديك قوت كنت..

-ولازلت على فكرة

-وبعدين هالة دي مجرد كارت أخير بستخدمه وبلجأ

له لما السكك كلها بتتسد في وشي

-طب ونادر فودة؟

-ماله؟ بقى في أحسن حال ولسه هيعلى أكثر

-مش حاسس إنك قضيت عليه ودوست عليه؟!

-داس عليك قطر يببطك...أذا ضميري إللي بتحاول

تلاعبني به ده مرتاح و ١٠٠ فل وعشرة ولو جالي فرصة

إني أعمل أكثر من كده أوعدك هعمل

-إنت الكتاب خلاص سيطر عليك ولحس مخك وبقي

راكبك وسايقتك زي الحمار!

-أقولك الحمار ده مين وماتزعلش؟

-إنت مش ممكن تكون ن.....

-اه مش ممكن أكون نادر، هي جت عليك إنت كمان!

-على فكرة أنا وإنت واحد

-لأ طالما هتفضل ترازيني كل شوية نبقى مش واحد،

وأحسنك تفارقني للأبد علشان عمرنا ما هنتفق أيها

الضمير الحي الغبي!

خلاص أنا هغور

غورة لما تاخذك ماترجع أبداً يا بعيد..أنا داخل أنام..

حل عني نامت عليك حيلة ماقومت!

(وإنتهى هذا الحوار العبثي مع عقلي وضميري)

بدخولي السرير وأنا مقتنع تمام الإقتناع إنني على الطريق

[HTTPS://T.ME/MKTBTARAB](https://t.me/mktbtarab)

الصح.

وفي أول محطات نومي باب الشقة خبطت قومت من  
السريير وأنا متأكد إنه حلم من قبل ما يبدأ، أول ما فتحت  
الباب كمية مشاعر متضاربة لطشت فيا!!

نادر: هالة؟!

هالة: كويس إنك فاكرنى عرفتنى!

نادر (مصدوماً): أنا ماتوهش عنك، بس إنتى إيه إلبى

عمل فيكى كدة؟!

هالة: فعلاً ماتعرفش؟؟؟ ولا مش حابب تسمع إنت

عملت فيا إيه؟

نادر: هالة أنا مشوفتكيش من قد إيه؟

هالة: لأ مشوفتنى فى التلاجة ووقفست تتفرج عليهم

وهما بيولعوا فيا، لأ وكمان ما إكتفيتش بده.

نادر: تقصدي إيه؟

هالة: أقصد إلبى إنت شسايفه، هو إنت فاكرك علشان أنا

طيب ولا شسبح زى ما إنت قولت عليا من شسوية، كتابك

الملعون ده مش هيضرني؟ شوف يا نادر وملتى عينك منى

بعد ما روجى عجزت سنين بسببك.

نادر: أنا ماعملتلكيش حاجة إنتي جاية ترمي بلاكي علياً!

هالة: أنا مش مسامحك يا نادر

نادر: إنشالله عنك ما سامحتيني، أنا ماقولتش للكتاب يختارك إنتي ولا الحلوة الثانية

هالة: وياترى ده هيبقى نفس كلامك لما تعرف مين

الحلوة الثالثة؟

نادر: الحقيقة كلكم زي بعض. والحقيقة الأهم إللي توصلت لها في النهاية إن أهم حد عندي هو نادر فودة فقط

هالة: هو أنا في الحقيقة مش مستغرباك، إللي يموت أبويا ممكن يعمل أي حاجة تاذية علشان نفسه (لتفاصيل أكثر يرجى العودة لرواية الذقش الملعون).

نادر: قولتلك مليون مرة ما قتلتتهوش، بس طالما إنتي الموضوع على هواكي إعتبريني قتلتته، أنا لو مكانك وأعرف إن البندي آدم إللي بحبه ويجري وراه له يدقي موت أبويا أنا ممكن أقتله.

هالة (ساخرة): بحبك؟ ويجري وراك؟ أنا مش عارفة إنت  
جايب الثقة والغرور البشع ده منين؟

نادر (بخبث): إيه مش دي الحقيقة؟

هالة: لا أنا حقولك الحقيقة إللي عمرك ما سمعتها، إنت  
يا نادر بالنسبالي قبل ما أموت كنت بالنسبالي صحفي  
ناشئ إستغليته كويس علشان أوصل للي أنا عوزاه، وبعد  
موتي ورجوعي إنت بالنسبالي شخص بئس وحرقياً أي  
كلب معدّي بينهش فيك.

إوعى يا نادر تكون مصدق فقاعة نجاحك الوهمية،  
عاوزاك تفتكر كل مرة لحقتك فيها قبل ما تروح فطيس  
وتخرج تكتب وتقول للناس أنا نادر فودة الصحفي وهاتك  
يا كذب!

نادر (صارخاً): إنتي إتجذنتي؟! أنا محدش له فضل علياً،  
مبقاش إلا الميتين كمان هيقيموني، مش عايز أشوف  
خلقتك تاني إنسي إسمي وإمحيه من ذاكرتك للأبد..

هالة: من ناحية أنساك فأنا فعلاً نسيك أما بخصوص  
إنك ماتت وشوفت خلقتي تاني فالأسف فاضلنا مرة كمان  
وبعدها فعلاً هختفي للأبد

نادر: هو إنتي لزقة! مش عايز أنا المرة الأخيرة دي!

هالة: معلش هي قربت جداً يمكن بعدها تعرف إن كان لازم نتقابل للمرة الأخيرة دي.

نادر(ساخراً): تصدقي إنك تستاهلي إليي حصلك، أول مرة أشوف ميتين ببيعجزوا، مُضحكة الحكاية جداً.

هالة(باكية): وأنا كان مين السبب في إليي وصلته ده؟!

نادر: بقولك إيه فكك من جو الصعبانيات ده وإمشي يلاً علشان عايز أصحى من النوم.

\*\*\*\*

[HTTPS://T.ME/MKBTARAB](https://t.me/mkbtarab)



# الفصل الثامن

( غضبة الموتى )

[HTTPS://T.ME/MKBTARAB](https://t.me/mkbtarab)

(وإنتهى الحلم وإنتهى لقائي بهالة مُعلنًا بداية يوم جديد وأنا بيغمرنني شعور فظيع بالانتصار ولقيتني بسأل نفسي هو إلي عملته ده؟ هو أنا ليه عاملتها كأنها ألد أعدائي؟)

جت الإجابة على طول على لساني: دي بتعاير ومصدقة نفسها إن لها أي فضل عليًا مش كفاية إنني راضي بعلاقة غريبة زي دي، وكل أما أفكر أرتبط بأي واحدة أرفض علشان كنت بحبها، على العموم هي جت منها والرابط ده إتكسر وإرتحت منه للأبد.

(مابقيتش طابق نفسي ولا طابق الدنيا كلها المكتب، البيت كله محصل بعضه مفيش جديد مفيش تغيير نفس الناس نفس الورق نفس شرايط الكاسيت العتيقة نفس الاقلام نفس البني آدم إلي عايش طول عمره في معاناة.)  
لبست هدومي وروحت الشغل وأول ما دخلت المكتب ولسه هشوف ورايا إيه لقيت الباب بيخبط وطبعاً إنتوا عارفين مين، مفيش غيره مدبولي أفندي كان داخل ووراه واحدة ست.

[HTTPS://T.ME/MKTBTARAB](https://t.me/mktbtarab)  
نادر: خير يا مدبولي؟

مدبولي: أنا أسف يا أستاذ نادر بس الست دي واقفة

بتعيط وعايزة تقابلك ضروري

نادر: إتفضلني ياست أقعدي

الست: يارب تعيش

وإنفجرت الست في العياط والنحيب وقالتلي:

الست: أبوس إيديك ساعدني

نادر: مين حضرتك، إتفضل إنت يامدبولي شوف شغلك

الست: أنا إسمي جليلة وبشتغل مغسلة

نادر: خير يا ست جليلة؟

جليلة: مفيش غيرك إللي ينفع أحكيه ده حتى الشرطة

ما صدقونيش، أجيب مين يا ناس يصدقني، أنا عايزة أكفر

عن ذنوبي أبوس رجلك.

كلامها وإلحاحها كان غريب وخلاني أفكر لوهله إنني

أسمعها هيحصل إيه يعني.

نادر: إتفضلني ياست جليلة

جليلة: زي ما قولتلك أنا بشتغل مغسلة أموات أو كنت

بشتغل لكني توبت والله العظيم

نادر: وطبعاً إنتي ماكونتيش بتغسلي بس؟ إنتي كنتي بتعملي مصيبة مع غُسل الميتين وجاية تتوبي هنا عندي!

جلييلة: أنا بشتغل مغسلة من ٣٠ سنة منهم ٢٠ سنة عملت فيهم إللي ما يتعمل، كنت وأنا عيلة صغيرة بشوف أمي وهي بتغسل فورثت الشغلانة منها.

وفي مرة لقيت أمي بعد ما خلصت غُسل شالت الصابونة إللي كانت بتغسل بيها وخبثها، فبقولها إنتي خبتي الصابونة ليه يامًا؟

بصت لي يا أستاذ نادر بصة عمري ما نسيتها طول حياتي وده خلاني ما أسألهاش أبداً عن أي حاجة بعد كدة مهما حصل ومها شوفت ومهما هي عملت بفضل ساكتة، تقدر تقول زي الخرساء، فضلت سنين على الحال ده لحد ما أمي قررت تديني خبايا ومصايب الشغلانة ولأول مرة تكشف السرا!

-كنا بتغسل واحدة أنا وهي وبنات الست المتوفية  
الإثنين

ولقيت أمي بتقولهم أنا مية الغسل دي تلزمني تببها

بكام؟

-ردوا البنات مية إيه إلهي نبيعها إنتي إتجننتي يا ولية

إنتي؟

أم جليلة: عشر آلاف كويس؟

-لاحظ إن عشر آلاف في الوقت ده يجي مليون جنية

دلوقتي!

-البنات من الصدمة ما نطقوش

أم جليلة: طب أنا هدفعلكوا عشرين ألف جنية، وبعدين

هي مش هتتأذي في حاجة أمكوا ماتت وشبعت موت

طلعت أمي كيس أسود من شنطتها وخرجت الفلوس

وإدتها للبنتين إلهي ما إترددوش لحظة وخذوا الفلوس.

-أمي شالت الطشت إلهي فيه مية الغسل وطلبت منهم

چراكن بلاستيك وفضت المية فيهم، البنات نسيوا أهمهم

المية وقعدوا يعدوا الفلوس وأنا هتجنن أمي هتعمل إيه

بالچراكن ديه!!

رجعنا البيت ومعانا چراكن المية شايلاها على قلبي طول السكة، أمي دخلت خبتهم في مكان (كانت أول مرة بردو توريهولي).

ليلتها يا أستاذ نادر الكل نام وأنا فضلت صاحية على سريري هتجنن من عمايل أمي، زمان تخبي الصابونة والنهاردة تشتري مية الغسل بعشرين ألف جنية ومش لاقية إجابة!!

قومت من على سريري بدل ما أتجنن ووقفت قدام چراكن المية (كنت بكلمهم زي المجنونة وبقول هتهب بيكوا إيه؟)

فجأة قلبي إتقبض وأعصابي سابت ورجليا مابقيتش شايلاها وإنعزلت عن الدنيا كلها، وسمعت صوت جوا نافوخي لوحدة ست بتعيط وبتقول: أمك أذنتي وبناتي ساعدوها، إرمي المية وإرحميني أرجوكي.

جريت دخلت أوضتي وإستخبيت تحت البطانية زي العيال الصغيرة وجسمي كله بيدترعش والضوت لسه سمعاه في وداتي بيقول:

أمك أدتني وبناتي ساعدوها، إرمي مية الغسل  
وإرحميني.

تصدق إن أنا من الرعب نمت؟

تاني يوم لما صحيت خوفت أحكي لأمي أي حاجة بس  
هي قالتلي:

-أم جلييلة: بت يا جلييلة هتاخدي ٣ چراكن من بتوع  
إمبارح وتروحي على أول الشارع عند محل عمك أبو محرم  
البقال تديهمله وهيديكي كيسه سمرا على الله تفتحيها  
تجيبها وتيجي طوّالي.

خذت چراكن وروحت عملت إللي قالتلي عليه فيما عدا  
حاجة واحدة بس ماقدرتش أمنع فضولي وفتحت الكيس  
الأسمر لقيت فيه فلوس ضعف إللي أمي إدهم للبنتين.

روّحت البيت أمي طلعت ٥٠ جنية وإدتهملي وقالتلي:

أم جلييلة: أنا عارفة أنك فتحتي الكيس خدي دول شبرقي

نفسك بيهم بس إنتي عارفة لو ماكنتيش فتحتي الشنطة  
ماكنتش هعلمك حاجة إنتي كدة بنت أمك بصحيح

أمك يا جليلة كبرت ومبقاش فيا حيل للتنطيط وإنني  
كل شوية أشوفلي عفريتين تلاتة، أينعم أنا مش بخاف  
بس تعبت وإنتي يابت لسه بصحتك وتقدري تبقي أحسن  
مني.

جليلة: حاضر يامًا، عايزاني أعمل إيه؟

أم جليلة: هاخذك معايا دلوقتي، عندنا غُسل جديد،  
المطلوب منك تركزي في إللي هعمله.

دخلت أمي أوضتها، ورجعت ومعاها ورقة على شكل  
مثلث صغير متطبق مربوطة بخيط أسود ناشف وريحتها  
عاملة زي الخشب المحروق ريحة تخنق كدة، وإدتهالي  
وقالتلي:

أم جليلة: ركزي كويس في إللي هقولهوك:

وإحنا بنقفل الكفن هتعملي إنك بتساعديني وأنا  
هغطي عليك، وقبل لفة الكفن الأخيرة على الميتة  
هتغطي الحجاب ده في الكفن، فهمتي حاجة؟؟

هزيت دماغي يا أستاذ نادر إنني فاهمة كنت مرعوبة  
منها من نظراتها ومن طريقة كلامها وصوتها، وعرفت



وقتها أبويا طفش منها ليه ولو كنت قولتها مش فاهمة  
كان ممكن تسخطني قرد ولا حاجة.

بشلت الحجاب في هدومي وروحنا للمكان إللي فيه  
الميتة إللي هنغسلها، ورب العزة الست الميتة كان شكلها  
مرعوب وكأنها بتتوسل ليًا إنني معملش المصيبة دي، لكن  
ما باليد حيلة مكنتش أقدر أخالف أوامر أمي، لو أقولك  
إنني حسيت إن الست الميتة بصتلي بعنيها طبعاً مش  
هتصدقني، أنا توهمت من الدنيا وقتها ولقيت الميتة قامت  
قعدت ومسكت جيبي وطلعت منه الحجاب وبمجرد ما  
مسكته ولعّ، جيت أصرخ حطته في بوقي وهو مولع!

وصرخت فيًا: هتتحرقني في نار جهنم يا جليلة.

فوقت على صوت أمي وهي بتقول للاست إللي كانت  
واقفة معانا: والنبي ياختي هاتيلنا كيس قطن من عندكوا  
أصل القطن إللي معانا خلص.

خرجت الست تجيب القطن، قامت أمي مزعقة فيًا..

أم جليلة: أنا غطيت عليكى يجي ٥ مرات علشان ترمي  
العمل وإنتي البعيدة ولا هنا!

جذيلة: عمل إيه؟ أذا مش فاهمة حاجة؟

أم جذيلة: الحجاب.. الحجاب ناوليوهولي يا زفتة.

خدتة مني أمي وبين طبقتين من الكفن عند بطن الميته حطته ولفت عليه الكفن من جديد.

- رجعت الست ومعاها القطن أمي قالتها: خلاص يا حبيبتي أنا لقيت كيس القطن بتاعي.

الست إلهي أنا عرفت إنها أخذت المتوفية ماخدتش بالها من حاجة.

أمي قالتها: تباعي مية الغسل؟

الست رقعت بالصوت، وإتطردت أنا وأمي يومها من البيت شر طردة..

- (أنا كذت شغلت التسجيل وسجلت لجذيلة معظم إلهي قالتة، الوش الأولاني من الشريط خلص.)

نادر: تشربي إيه ياسبت جذيلة معلاش أنا أسف ما سألتكيش تشربي إيه من أول ما قعدتني

جليلة: ولا حاجة أنا عايضة أزيح الهم إلي علي قلبي

بس.

قومت فتحت الباب وناديت علي مدبولي وقولتله إعمل  
كوباية ليمون، وإستأذنت من جليلة إني هرجعلها علي  
ماتكون شربت العصير

خرجت وقفت في بلكونتي المفضلة في المكتب  
وسرحت مع الناس إلي رايحة وإلي جاية، كل واحد ماشي  
بهمومه وحكاياته وأحلامه وطموحاته وأنا زي أي حد من  
دول من حقي أكبر وأوصل للمكان إلي أستاهله ولو بأي  
طريقة يمين بقي شمال مش فارقة، والفرصة جاتلي  
لحد عندي ولازم أستغلها لا تقولي قصص وتحقيقات  
ولا سفر ومرمطة في المحافظات، ولا ناس تتعامل معايا  
إني صحفي مبتدئ، ولا ناس جهلة يؤذوني بكلامهم حتى  
ولو من غير قصد، دي فرصة وجاتلي من السما فرصة ما  
بتجيش في العمر غير مرة واحدة ولو ما إستغليتهاش  
أبقى ما أفرقش عن الجهلة دول في حاجة.

[HTTPS://T.ME/MKTBTARAB](https://t.me/mktbtarab)  
دخلت من البلكونة دوغري علي جليلة.

نادر: أنا قررت أساعدك ومن غير أي مقابل وتهتكي  
وتتوبي كأنك ما عملتيش أي حاجة خالص وقلبك وضميرك  
يرتاحوا على الآخر ياستي.

جليلة: بجد والنببي؟

نادر: طبعاً.. إنتي إخترتي الشخص الصح، بس أنا ليا  
شرط

جليلة: أوامرني أمر

نادر: بعد ما تخلصي عايز أشوف كل حاجة على  
الطبيعة

جليلة: إزاي بس، أنا عايزة أبعد عن الطريق ده خالص،  
وبعدين أنا بقالي مدة ما بغسلش والمصحف.

نادر(بخبث): وماله ترجعي تاني علشانني.

جليلة: يا أستاذ نادر في حاجة فايتاك أنا مغسلة نسوان  
يعني مستحيل تدخل معايا وأنا بغسل ده أهل الميتة كانوا  
موتوني وموتوك جذبها!

نادر(ضاحكاً): ياست الكل أنا عارف وفاهم إنك مغسلة  
نسوان زي ما بتقولني، بس واحدة زيك خبرة ٣٠ سنة منهم

٢٠ سنة في الشغل الأزرق أكيد لها معارف كثير رجاله  
وبيغسلوا رجاله

جليلة: أه طبعاً أعرف مغسّلين رجاله وتربيّة كمان  
وحانوتية.

نادر: بس تاهت ولقيناها هتعرفيني على مغسل راجل  
بيشتغل في البلا الأزرق إللي إنتي كنتي بتشتغلي فيه ده  
جليلة: أه.. فهمت إذا كان كدة ماشي

نادر: كملي بقى باقي الحكاية وأنا هقلب الشريط بتاع  
التسجيل علشان أسجل كل كلامك.

جليلة: لما رجعت مع أمي البيت خدتنني معاها أوضتها  
وقالتلي:

أم جليلة: بصي يا جليلة شغلانة المفسّلة دي شغلانة  
واحدة بتريح الناس مش الميتين بس لأ.. الميتين  
والعايشين كمان، بنغسل الميته من دول ونعطرها ونلفها  
في توب أبيض في أبيض ونجهزها لنومتها الأخيرة، وفي  
نفس الوقت تخيلي لو سيدناها وسط أهلها!

شوفي برغم الحزن إللي بيبقوا فيه لكنهم أول ناس  
 بيوصلوها لباب التربة، وإحنا بقى بناخد حسنتنا  
 جليلة: بس أنا مش فاهمة موضوع الجراكن والصابونة  
 يامًا.

أم جليلة: مع كل ميت في راحة لواحد حي، يعني فلان  
 يموت فلانة تخلف، فلانة تموت فلان يتجوز  
 جليلة: مش فاهمة برديو.

أم جليلة: يابنتي إقهمي إحنا بنساعد العايشين بأطر  
 الميتين، هيبقى معاكي فلوس كتير والكل هيطالبك،  
 أنا بقالي في الشغلانة دي سنين، كملي من بعدي بس  
 إتحملي لأن غضبة الميتين وحشة أوي.

جليلة: أنا خايفة يامًا بس هعمل بوصيتك

أم جليلة: أنا لسه ما وصيتكيش، وصيتي ليكي لما  
 أموت محدش يحضر غسلي غيرك، والليفة والصابونة إللي  
 هتغسليني بيهم إحرقهم والمية بتاعة الغسل إرميها في  
 جنية البيت، إوعي حد يستهيكى ويأخذها ومش هوصيكي

إوعي تضعفي لأي سبب وتحطي معايا عمل لو عرضوا  
عليكي مال قارون يا جليلة.

جليلة: يعني الميت بيدتأذي يامًا؟

أم جليلة: خلاص يا بت اسسكتي ما تتعبيش أعصابي  
أكثر ماهي تعبانة

جليلة: طب ما بلاها يامًا الشغلانة دي خالص

أم جليلة: إنتي إتأخرتي أوي يابذتي في الطلاب ده.

ومن اليوم ده إتعلمت كل حاجة منها وبقيت التلميذ

إللي غلب أستاذة عرفتني على ناس كتير

عرفتني يعني إيه عمل بمية الغسل.

عرفتني يعني إيه سحر الأكفان.

عرفتني يعني إيه عمل على أسنان المشط إللي سرحننا

به للميت.

وكل مرة كنت بزاد قوة وجبروت، لكن خليني أحكيك

عن حاجة عمري بنساها أبدأ، فضلت عايشة في كوابيس

أكثر من سنة بسببها ومش بس كوابيس دي حقايق كمان.

روحنا نغسل واحدة مية وكانت ست وحدانية عايشة  
 في أوضة فوق السطوح لوحدها وأهل الخير إللي طلبونا  
 نغسلها، لا عندها عيال ولا حد يسأل عليها، كنت أنا وأمي  
 إللي بنغسلها لوحدها لا في قرأيب ولا جيران ولا حد يقف  
 معانا على الغسل، أمي قالتلي:

أم جلييلة: الست دي كنز يابت يا جلييلة هناخد كل حاجة  
 غسلناها بيها والمية كمان مش هنسيب حاجة.

بس أمي حطت في الكفن خصلة شعر كانت معاها  
 وجيت أسألها عنها برقت لي فسكت.

أم جلييلة: خصلة الشعر دي بتاعة واحدة بطنها ناشفة  
 بور.

جلييلة: يعني إيه يا أمي بطنها ناشفة، خاسة يعني؟  
 أم جلييلة: خاسة إيه وهباب إيه؟ بطنها ناشفة يعني ما  
 بتخلفش، إحنا هنساعدوها إنها تخلف وزى ما إنتي شايقة  
 المية ملهاش حد وأهي إرتاحت وهتريح غيرها.





أنا فيه ده إزاي، طلعت أجري على أوضة أمي لقيتها قاعدة على السرير ومبرقة عينيها وفاتحة بوقها على الآخر بتحاول تتنفس لكنها مش قادرة وكانت خلاص بتلفظ أنفاسها الأخيرة، فضلت أهر فيها ومش عارفة أعمل إيه، صوت صراخي لمّ الجيران إللي خدوها على أقرب مستشفى وإتلحقت قبل ما تموت.

كلام الدكاترة أن أمي جالها إختناق بدون سبب وأصيبت بإنهيار عصبي حاد زي مايكون كان قلبها حاسس لما قالتلي إنها مبقتش متحملة غضبة الموتى.

فضلت أمي يومين في المستشفى بس محصلش فيهم حاجة تانية عدوا بسلام، أنا قولت كدة خلاص مجرد كابوس وراح لحاله، لكن لما أمي رجعت البيت حصل نفس الموقف تاني، صوت بينادي عليا جاي من الحمام الفرق إن المرادي مكنتش متكثفة ومشيت ورا مصدر الصوت وياريتني ماروحت.

الصوت من جوا الحمام بيقول: أذيتوني! إنتم شياطين إنتي وأمك، مش هسيب حقي.

إتفتح الباب بالراحة لوحده، صوت الباب وهو بيتفتح  
خلى قلبي شبيه هيقف من الرعب، لمبة الحمام نورت  
لوحدها ولقيت الست واقفة في الحمام قصاص مني وبتغسل  
أيدها في الحوض بنفس الصابونة إللي بنستخدمها في  
الغسل، هي هي الصابونة إللي غسلناها بيها، وبعزم  
ما فيها حدفتني بالصابونة في وشي، خبطة الصابونة  
في خلقتي كان ألمها كأنها ضربتني بطوبة، حتى بص  
يا أستاذ نادر شوف الجرح إللي في حواجبي، هو يمكن  
مش باين دلوقتي، لكن وقتها كان صعب جداً، مع خبطة  
الصابونة في دماغي أنا دوخت ووقعت في الأرض، وعلى  
ما بدأت أفوق لقيتني واقعة جذب السرير في الأرض وأمي  
بتحاول تفوقني وهي مخدوضة علياً موت.

أم جلييلة: مالك يابن، إيه الدم إللي عمال يشلب منك  
ده؟

جلييلة: معرفش يأمًا في إيه؟

أم جلييلة: أنا جبت البن علشان أكبسلك به الدم أتعدلي  
كدة، ويلا قومي لازم نروح المستشفى يدواك مضاد برشام  
ولا حاجة.

خدتني وروحنا المستشفى فعلاً وخيبت ٧ غرن  
 أنا كنت في دنيا تانية وأمي نازل عليها سهم الله وما  
 بتتكلمش دي حتى ما سألتنيش إيه حصلك.

لما بدأت أفوق شوفت حاجة غريبة جداً يا أستاذ نادر  
 أمي كبرت يجي ٢٠ سنة وشها إتملى تجاعيد، عينها  
 جدحت لبرة، لونها بقى شاحب جداً لدرجة إن أنا سألتها  
 هو أنا غبت عن الوعي ٢٠ سنة ولا إيه ياماً؟

ومن يومها يا أستاذ نادر أمي فضلت قاعدة في أوضتها  
 ما بتخرجش وبقيت أنا إللي بروح أغسل وللعلم الناس  
 يدعوا يقلوا في طلبنا علشان مش مقتنعين بيّا، كنت  
 بدخلها كل يوم أقولها الناس هتنسنا ولا كأني بقولها  
 حاجة، على طول باصة في السقف وما بتتردش.

أما أنا فالكوابيس ما رحمتنيش، الست الميئة  
 بتطاردني ليل ونهار، أنام تظهري أصحى تظهري، أنزل  
 السوق أشوفها واقفة ومخبية وشها ورا شال، ده حتى  
 المرات القليلة إللي روحت غسّلت فيها لقيتها واقفة جنب  
 الميئة، وفي مرة حصل موقف عمري ما أنساه: طلبوني

أغسل ست كبيرة، دخلت عليها الأوضة لقيتهم مغطينها  
كلها بكوفرتة، كشفت وشها لقيتها الست إلي بتطلع علي  
ومبرقة عنيا وقامت مصوطة في وشي، فضلت أصوت  
الستات إلي كانوا واقفين معايا إترعبوا وسابوني وجريوا  
بما فيهم بنات الست دي.

ما بقيتش أطيق أروح أي غسل وكملت لما دخلت  
على ست ميتة وأختها كانت واقفة جنبي وإتكرر نفس  
الموضوع الميتة إتحولت للست إلي بتطاردني وقامت  
قعدت ومسكت في رقبتني وفضلت تخنق فيا لحد ما وقعت  
من طولسي، ولما فوقت لقيت أخت الميتة بتقولي إنتي  
مجذونة إنتي كنتي واقفة تخنقي أختي الميتة يا مخبولة!!  
يومها يا أستاذ نادر ما غسلتهاش وجريت على البيت  
ودخلت على أمي أحكيها وهي ما بتتردش عليا ولا بتنطق  
كأني بكلم صدم أو تمثال، كانت جثة بتتنفس قدامي.

فضلت على الحال ده معاها يا أستاذ نادر أكثر من سنة،  
بأكلها بالعافية وهي ممتنعة تماما عن التعامل معايا أو  
حتى الكلام، وأنا بدأت أتعرف وأنزل وأكمل إلي أمي بدأته،  
لحد ما في ليلة تانية عمري ما بنساها، سمعتها بتعمل

صوت غريب أوي صوت بنقول عليه حشرجة الموت جريت  
على أوضتها لقيت باب الأوضة بيتفتح قبل ما أوصله  
وخارج من الأوضة الست إلي بتطاردني بس المرة دي  
شكلها كان متغير عن كل مرة كانت مبتسمة وفرحانة  
ووشها أبيض زي البدر في ليلة تمامه، عدت من جنوبي  
وأنا جريت على الأوضة أشوف أمي لقيتها ماتت!!!

كانت نائمة على ظهرها ووشها أزرق، عندها مبرقة  
جامد وبوقها مفتوح على الآخر وعضم خدودها بارز  
بشكل مخيف ورغاوي عمالة تنزل من بوقها وشعرها كله  
ناحل والمخدة محروقة والسريير كله نمل بيجري على  
جسم أمي.

وقفت زي التمثال مش عارفة أعمل أي حاجة، فين وفين  
على ما فوقت عمالة أصوت لحد ما الجيران إتكلّموا وكان  
مطلوب مني أصعب مهمة في حياتي إن أنا أغسلها!!

تاني يوم الصبح جت مغسلة تانية تطوعت علشان  
تساعد وصممت تقف معايا على غسل أمي، بس قبلها  
كذت غيرت ملاية السريير وكيس المخدة ورشيت جثة أمي  
بيروسول ونصفتها من النمل.

للقيتها خرجت شنطة سودا مليانة فلوس كتير وقالتي:  
يا جلييلة الحي أبقى من الميت يابنتي أمك خدمت الكل  
ولازم نخدمها.

معرفش يا أسداز نادر إيه إللي حصل ساعتها نسيت  
وصية أمي ليًا وخذت الفلوس من الست ولقيتني بقول  
فعلًا أمي ريحت الأموت والأحياء ولازم أكمل إللي بنعمله  
زي ما أمي طلبت.

لقيت المغسلة بتديني صورة لواحدة ومتشخبط على  
وشها بقلم ألوان فلوماستر وبتقولي سألني الأمانة يا  
جلييلة، ماكنتش محتاجة شرح علشان أفهم إيه المطلوب  
مني أعمله.

نادر: إنتي حطيتي الصورة في الكفن؟!!! ياقادرة!

جلييلة: أيوة ومن يومها بدأت أشق طريقي الخاص بيًا  
وقررت إنني همشي بالمبدأ إللي أمي علمتهولي إن الحي  
أبقى من الميت وإن الضرورات تبيح المحظورات وبقي  
إسم جلييلة المغسلة الكل بيعمله مليون حساب وكسبت  
قد إللي أمي كسبته مليون مرة.

-خلص الوش الثاني من الشريط وأستأذنت جلييلة  
تريح شوية عقبال ما أجهز شريط ثاني.

جبت شريط جديد عشان أسجل باقي حكاية جلييلة.  
باب المكتب خبط ودخل حد من زميالي: إنت مش  
مروح ولا إيه يا نادر؟

نادر: لا مش مروح، إنت حد عينك وصي عليا ولا حاجة؟  
زميالي: يا عم مش القصد، أنا قولت بس ..

نادر: لا ماتقولش بس، أنا قاعد شوية، روح شوف شغلك  
إنت ولا مصلحتك وحلّ عن أهلي .

خرج وقفل الباب، بصيت للست جلييلة وقولت لها:  
نادر: معلش أصل في ناس كدة يا ست جلييلة، لو سبتي  
لهم فرصة يصاحبوكي العشم بيموتهم، وأنا ما أكرهش  
في حياتي قد العشم، بيفتح أبواب لحاجات كتير الواحد  
في غنى عنها، وأديكي شايفة التطفل، ده كده ومن غير  
عشم بينا، تخيلي بقى لو كان في بينا عشم أصلاً، كان  
هيعمل إيه؟



جليلة (كملت متجاهلة الرد على نادر): أنا نسيت حكاية  
أمي دي خالص يا أستاذ نادر وبقيت أشتغل لوحدي ورميت  
الماضي كله ورا ضهري بفقره وذلّه وقرقه، البعبع إلابي  
كان مكتفني ومتحكم في حياتي خلاص ماتت وشبعت  
موت الخوف، إنتهى بموت أمي.

خدت إخواني إلابي أصغر مني وعزلنا بعد ما لقينا أمي  
مخبية في الكذبة مليون جذية!!! إنت متخيل؟!  
مليون جذية وإحنا كان بيعدني علينا أيام بذناب من غير  
عشا!

مبقاش فارق معايا حاجة، المهم الفلوس، كله بحسابه  
هنفذ أي طلب بس كله بحسابه.

عدى الزمن وجوزت إخواني وسافروا الإثنين الخليج مع  
اجوازهم وأنا حياتي بقت شغل وپس.

نسيت أحكيك على حاجة صحيح في واحدة إسمها  
نبوية بيقلوا عليها شيخة من إلابي بتعمل أعمال وحجاب  
وخلافه وقفنتني في الشارع وقالتي:

نبوية! ما تيجي يابن يا جليلة نشتغل سوا

جليلة: ما إحنا بنشتغل سوا وكل إللي بعمله بديهولك

نبوية: لا المرادي الموضوع مختلف، هنروح تربة، الميته لسه فيها طازة نرمي على الجثة ميّة الغسل ونمشي

جليلة: ماتعملي ده وأنا مالي يا أختي؟

نبوية: بصراحة أنا أول مرة أعمل الموضوع ده وأنا

قلقانة وعلى فكرة الموضوع فيه مصلحة حلوة

جليلة: إزاي يعني هننزل التربة؟

نبوية: هقولك.. بعد ما تغسلي الميته تروحي معاهم

المقابر وتختري أي حاجة تخليكي تنزلي التربة معاهم

ولا أقولك شوفي ميته مدفونة في مقابر الصدقة لا ليها أم

ولا ابن ولا أب يسألوا عليها لا عيّل ولا تيّل.

جليلة: ده إنتي شيطانة، أنا هروح أغسل واحدة لسه

متبلغة بها في دار مسنين وملهاش حد وهتدفن في

مقابر الجمعية الشرعية، والترب دي لا ليها حارس ولا

ليها حانوتي، الناس بتوع الجمعية همّا إللي بيدفنوا تطوع

وبعد كدة كل واحد بيروح لحال سبيله.

نادر: وبعدين عملتي إيه؟

جليلة: غسّلت الست وخذت مية الغُسل خبيتها، وعلى  
بالليل كنت مقابلة نبوية وطلعنا على الثُرب لقيتها حاطة  
في العربية بداعتها كشاقات وفاس لزوم الشغل.

فتحذنا التربة وحفرنا ونزلنا، نبوية كانت بتترعرش  
حرفياً وقعدت في الأرض تقول كلام مش مفهوم وأنا  
بعمل إلهي بتطلبه مني، كنت بدلق مية الغُسل على جسم  
الميتة، وفتحت بوقها بصعوبة وصبيت فيه مية الغُسل  
بردو، بوقها كان مكلبش حجر.

فجأة إتغير وش الست الميتة لوش أُمي، بعدها إتبدل  
للست إلهي كانت بتطاردني، بعدها إتبدل لوشي أنا  
شخصياً!

ما حسيتش بنفسي غير وأنا برمي كل حاجة و خارجة  
أجري من التربة ودخلت العربية وقفلت على نفسي  
وقعدت في الدواسة أترعش زي العيال الصغيرة، نبوية  
جت ورايا تزعق فياً وتقولني:

نبوية: الله يخربيتك هتخلي إلهي ميعرفش يعرف،  
خليكي متلقحة هنا مكانك وأنا هجيب الحاجة وأجي.

غابت شسوية ورجعت وركبت العربية ومشينا، إنت عارف يا أستاذ نادر أنا ماخوفتش من الميثة أنا خوفت من إللي قالتة!

نادر: بس إنتي ماقولتيش إنها إتكلمت  
جليلة: ودي هتفرق؟ أهى إتكلمت وخلص  
نادر: قالت إيه؟

جليلة: إخوانك هيدفعوا تمن إللي بتعمليه! إخوانك هيدفعوا....

نادر: وحصلهم حاجة؟

جليلة (إنفجرت باكياً): ماتوا يا أستاذ نادر الإثنين ماتوا.. ماتوا..

نادر (ضاحكاً): بس إنتي عايشة أهو

جليلة: بقولك ماتوا وأنا السبب هو إنت معذكش قلب؟  
بتضحك؟!

نادر: المهم كملتي.. كملتي.

جليلة: ده إللي فوقني يا أستاذ نادر، موت إخواني فوقني وخلصتني أجيلك وقبل ما أجيلك روحت أبلغ عن

نفسى لأنى ما أستاهلش أي رحمة أو شفقة وعاملوني إني  
عبيطة، أنا من يوم ما نزلت القبر ده قررت معملش كدة  
تاني، وأفضل في الغسل وبس، شغلي إللي إتعودت عليه،  
والحياة مشيت على كدة سنين لحد ما إخواني البنات  
رجعوا مصر وقرروا يستقروا هنا وكل واحدة فيهم رجعت  
بجوزها وعيالها أصلهم كانوا متجوزين إثنين إخوان خدوا  
بيت واحد وعاشوا فيه وحصلت مصيبة والبيت ولع بيهم  
كلهم وراح إخواني وإجوازهم وعيالهم ده حتى معرفتش  
أغسل حد فيهم، وكل إللي جه في بالي كلام الميثة إن  
إخوانك هيدفعوا التمن.

نبوية إتقبض عليها وكانت فاكرة إن أنا ورا إللي  
حصلها ده وبعثتلي رسالة قالي: هتتمني الموت يا جلييلة  
ومش هتطوليه، إللي عرفته بعد كدة إنها فتحت التُّرب  
على إخواني وعيالهم وعملت نفس عمايلها السودا معاهم.  
حسيت إنها رسالة ليّ، رسالة جاتلي زمان لما أمي  
ماتت ومفهمتهاش فقررت إنني أفهمها المرة دي وأفوق  
وأتوب وأرجع عن الطريق ده للأبد وقولت إنت الوحيد إللي  
هتصدقني وهتشيل عن قلبي الهم وضميري يرتاح

نادر(ساخراً): كان حد قالك إن أنا معايا صكوك الغفران؟

جليلة: يعني إيه صكوك الغفران دي؟

نادر(متهكماً): ماتاخدش في بالك أنا بس بسأل هو

إنتي لما تحكي لي ضميرك هيرتاح بتاع إيه؟

جليلة: إنت لسه مفهمتش أنا عايزة منك إيه؟

نادر: فهميني يا أم العُريف

جليلة: إفضحني، إنت سجلت بصوتي كل المصايب

إللي أنا عملتها وإذا كانت الشرطة ماصدقتنيش، بعد ما

إنت تنشر ده غصب عنهم هيلتفتوا ليًا، وبعدين إللي دلني

عليك قالي إنك واحد فُضحني كده كده.

نادر: يعني إيه ياست إنتي؟

جليلة: يعني إنت ماشي بمبدأ يارايح كتر من القضايح

وممكن تفضح أي حد مقابل إنك تنجح أكثر، صح ولا أنا

غلطانة؟

نادر(مبتسماً): والله جميل إنك عرفتني ده، بس تعرفني

إنتي جيتي لي في الوقت الصح لو كنتي جيتي من مدة

بسيطة كان مستحيل أنشر أي حاجة بإسمك لكني دلوقتي  
أوعدك هتتفضحي فضيحة تليق بإسمي (نادر فودة).

(قفلت التسجيل وقولت لها كدة ضميرك إرتاح شوية؟)

جليلة: لما دنشر كل إللي قولتلهوك

نادر: ما أنا قولتلك إللي أوله شرط أخره نور، هنشرك  
كل ده بس الأول لازم أقف على غُسل وأنزل تربة وأشوفكوا  
بتهببوا إيه عن قُرب

جليلة: حاضر

نادر: تعرفسي إن أنا لما أعمل ده وأحكيه هوقف أي حد  
عن إللي بتعمليه ده ويبطل ده تماماً، يعني هتاخدي ثواب  
كمان

جليلة: هظبطك يا أستاذ نادر مقابلة مع مكاوي  
المغسل وهتصل بيك، إديني رقمك.

(كتبت لجليلة رقمي على ورقة وإديتها لها وقولت لها  
كلميني ياست الكل في أي وقت هرد عليك).

(جليلة مشيت وأنا لميت حاجتي ورجعت على البيت  
وأنا حاسس بإن تصار كبير بسبب الطريق الجديد إللي

بدأته ومكمل فيه، طريق أنا مقرر هدوس فيه على رقبة  
أي حد يقف قدامي، ضيعت عمري في اللف هنا وهناك  
والبحث عن التميز الأدبي والسبق الصحفي وكلام الناس  
العميقة ده وفي الآخر مفيش في جيبني جنية، ورئيس  
تحرير مايسواش ٣ مليم يوديني وواحد غيره يجيبني، أنا  
فوقت وبصنع تاريخ جديد مضيئ وقوي للصحفي الأول  
بلا منازع نادر فودة، جه وقت مجدك الشخصي يا نادر)

[HTTPS://T.ME/MKBTARAB](https://t.me/mkbtarab)



# الفصل التاسع

## (تربية مشايخ)

[HTTPS://T.ME/MKBTARAB](https://t.me/mkbtarab)

(معلش عزيزي القارئ التليفون بيـرن ولازم أرد،  
عارفين مين؟ جليـلة حتى من غير ما أفتح المكالمـة.)

نادر: ألو

جليـلة: أيوة يا أستاذ نادر أنا جليـلة

نادر: منورة

جليـلة: أنا كلمت مكاوي المغسـل وقالي إنه كمان ٣  
ساعات هيروح يغسـل ميت ويدفنه وهيوريك كل إلي عاوز  
تشوفه

نادر: برافو عليكـي، قوليلي العنوان بسرعة.

كتبت العنوان ورقم تليفونه ويادوب غيرت هدومي  
ونزلت وبعد أقل من ساعة كنت وصلت للعنوان.

بالمناسبة أنا مخدتش الكتاب معايا لأن بالبلدي رايح  
أتعلم بس مش رايح أفرد عضلاتي أو أستعرض قدراتي  
على حد.

وإتصلت بالرقم.

نادر: عم مكاوي معايا؟ أنا نادر إلي الست جليـلة  
كلمتك عني

مكاوي: الله يقطعك يا جليلة ويقطع مجايبك، إنت  
فين يا سي الأستاذ إنت

نادر: تحت البيت إللي في العنوان بالضبط

مكاوي: طب إتلقح عندك وأنا هنزلك

نادر: ما تتأخرش بس

مكاوي: لا هتأخر مش عاجبك غور

فضلت واقف في الشارع ساعة إلا ربع ومفيش قدامي  
إختيار غير إنني أستنى أستاذ زفت ده إنه ينزل لحد ما  
لقيت واحد نازل شكله ميت أصلاً، نحيف جداً لابس جلابية  
مكوية ١٠ مرات وفوقها عباية ودقنه بيضا قصيرة، عينه  
خضرا وبارزة لبرة، بيبص حواليه زي إللي عامل عملة.

نادر: عم مكاوي؟

مكاوي: عمي الديب، إسمي الأستاذ مكاوي

نادر: طيب يا أستاذ مكاوي أنا أسف

مكاوي (ضاحكاً): بضحك معاك، المنطقة نورت يا باشا  
تعالى معايا.

مشيت وراه خرجنا من الحارة الصغيرة للشوارع برا  
ووقف قدام عربية لاند كروزر عمري ما أحلم أركب في  
شذطتها إللي ورا!

مكاوي: قول ما شاء الله عينك هتفشخ العربية يا أخي!

نادر: هتفشخ؟! الملافظ سعد يا أستاذ مكاوي

مكاوي: ياسيدي ربنا يرزقك باللي أحسن منها

نادر: وهي دي في أحسن منها؟ دي بكام مليون بقى؟

مكاوي: ياكش تولعي يا جليله، أنتي بعثالي صحفي  
ولا مأمور ضرايب، إركب يالاً وخلصني.

ركبت العربية وروحنا لمنطقة قريبة شعبية بردو وفي  
نفس محيط المقابر، نزلنا ودخلنا بيت قديم طلعنا الدور  
الأول فيه.

مكاوي (يتنحنح): ياساتر، ردت عليه ست كبيرة كانت

قاعدة إتفضل ياعم مكاوي إتفضل ياخويا.

شاورت لنا الست على أوضة مقفولة، فتح مكاوي الباب

ودخلنا، كان فيها جثة متغطية على سرير قديم، وعلى  
ترابيزة خشب جذب السرير ليفة وصابونة ومسك ومشط

وقطن وباقي عدة الشغل، قلع مكاوي العباية وأنا كمان  
قلعت الجاكيث وشمرت القميص علشان أتعلم.

مكاوي: هو إنت عمرك غسّلت قبل كدة.

نادر: حضرتك أنا غسّلت وإتغسّلت

مكاوي: طب غسّلت وفهمناها، إيه إتغسّلت دي كمان؟

نادر: ما تركز في إللي بتعمله الله يرضى عنك وبطل

هرى

مكاوي: أبطل هرى؟ طب يلا شيل كل الحاجة إللي

على الترابيزة وحطها على السرير وبعد كدة شيل عمك

سعداوي وحطه على الترابيزة.

نادر: سعداوي مين.

مكاوي: الميت، أمال إنت فاكر نفسك جاي أكاديمية

الفنون، إنت جاي تغسل ميت! شيل الجثة وإخلص.

عملت إللي قال عليه ونقلت الجثة على الترابيزة، الباب

خبّط، لقيت الست إللي قانلناها برا جايبة جردلين واحد

فيه مية سخنة وواحد فيه مية ساقعة

مكاوي: تحب تتوضى ولا ننجز ونشتغل بطريقتي؟

نادر (ساخرأ): إنت هتحوّر هو إللي زيك بيركعها أصلاً؟

مكاوي: خد مفتاح العربية، هتنزل تفتح الشنطة هتلاقي چركن لونه أزرق هاته بسرعة.

نزلت جبته الجركن، وطلب مني أحطه تحت الترابيزة، مكاوي عمل إللي بيتعمل في الغسل العادي، معملش حاجة مختلفة غير إن الميّة إللي كانت بتنزل من الغسل كان بينزل منها كتير في الجركن، بعد ما خلصنا خرج من جيبه كيس بلاستيك أسود حط فيه الصابونة والليفة والمشط، وبعدها رجع الكيس في جيبه تاني وخرج تليفون صغير من جيبه غير إللي كان معاه وإتصل بحد وقاله: أيوة يابني أنا خلصت يلاً إتحركوا.

الناس شالوا الجثة وحطوها في الخشبة ونزلوها عربية نقل الميتين، وركبت الست إللي قابلناها في نفس العربية وأنا ركبت مع مكاوي عربيته، وبذفس التليفون عمل مكاوي مكالمة تانية:

مكاوي: أيوة يابني فتحت التربة وكله تمام؟ إحنا جايين في الطريق ومعانا الأمانة.

نادر: هو الراجل ده مالوش أهل؟

مكاوي: لأ، الست دي مراته ومقطوعين من شجرة، أديك  
شفايف مفيش حد جه معانا يدفنه، هو البني آدم كده يا  
نادر بيه بيجي غريب ويمشي غريب

نادر(ساخراً): الله عليك وعلى حِكَمك

مكاوي: الله عليك وعلى أبوك.

وصلنا المقابر، الناس نزلوا الخشبة ونزلت مع مكاوي  
جوا التربة علشان ندفن الميت، كان في شابين في  
إنتظارنا غالباً هم إللي فتحوا التربة قبل مانيجي، محدش  
نزل التربة مع مكاوي غيري.

فجأة قطع فتحة في الكفن وطلع من جيبه المشط  
والصابونة والليفة، مرمغ الصابونة في التراب وسابها  
وكسر أسنان المشط سن سن، ودفن كل سن في حته  
مختلفة في الرمل، ومسك الليفة وقطعها أجزاء كثيرة  
وبدأ يدفن كل جزء في حته مختلفة من الكفن والجزء  
إللي قطعته في الكفن طلع من جيبه ورقة متطبقة ودفنها  
جواه.

طول ماهو بيععمل ده أنا عمال بسأله فهمني بتعمل  
 ده ليه؟ وهو ما بيردش عليًا لحد ما زهقت وسكت وبطلت  
 أسأل ولحد ماهو خلص وخرجنا من التربة، كانت عربية  
 نقل الميتين مشيت ومفيش غير الست إللي بتعيط على  
 جوزها والشابين إللي قابلونا في الأول، مشينا كلنا وراه  
 لحد العربية بتاعته، شاورلذا إنني أركب أنا والست، لمحته  
 بيدي الشابين فلوس، رجع ركب العربية وطلع من التابلوه  
 كيس فيه ززم فلوس إداهم للست وقالها: خيركم علينا  
 ياست ولما يقربوا يخلصوا كلميني وزى ما إتفقنا كل  
 طلباتك مُجابهة.

الست مدت إيدها وشدت الفلوس زي المجنونة  
 وما نطقتش وقامت موطية بايسة إيد مكاوي!

وصلناها لبيتها وبعد كدة روحنا عند بيت مكاوي  
 لقيته بيديني عشرين ألف جنية وبيقولي: ده حقك!

نادر: حقي! هو أنا عملت إيه؟

مكاوي: كل ما تساعد وإنك ساكت حقك بيكبر، تتكلم  
 حقك يقل، وبعدين إنت جاي من طرف واحدة خيرها على  
 الكل!



نادر: بس أنا محتاج أفهم أنا مش عايز فلوس

مكاوي: ماهو لو فهمت مش هتكمل لأن إللي عرفته

عذك إنك تربية مشايخ

نادر(مبتسماً): لا ده كان زمان يامكاوي بيه، أنا هكمل

تحت أي بند وتحت أي ظرف

مكاوي: هفهمك بطريقتي مش بطريقتك، خلاص؟

نادر: يعني إيه؟

مكاوي: هبعثك شغلانة لوحك وهستناك ترجع

وتقولي هتكمل ولا تربية المشايخ هتغلب؟

نادر: موافق

مكاوي: بص ياسيدي، هتروح تاني، مكان ما كُنا

موجودين، هتفتح الثُربة، وهتجيب حته من صباع الميت

وكل سنان المشط إللي أنا دفذتها، تلمها وتجيبها وتكلمني

وإنت هناك وهقولك هتعمل إيه تاني.

(مكانش في أيدي غير إن أنا أوافق أنا محتاج أثبت

لنفسي إن أنا إتخبرت وحوار تربية المشايخ ده كان زمان

وجبر

وبالفعل نزلت وروحت على نفس المكان.

الشيء الغريب إنني لقيت التربة مفتوحة زي ما يكون  
مكاوي بعث حد يفتحها قبل ما أوصل، فجأة سمعت  
صوت طفل بيهمس وبيقولي:

نهايتك قربت..

نهايتك قربت..

إلتفت بسرعة ورايا لقيت طفل صغير ما يكملش ٦  
سنين واقف في الضلمة ومش باين من ملامحه حاجة.)

نادر: إنت مين يا حبيبي؟

الطفل: أنا مرسول جهنم وجاي أقولك لو نزلت مش  
هتطلع ثاني، هتتحبس جوا لحد ما تموت، إحنا عارفين  
إنك بتدور على المجد، وبس العملة إللي هتعملها دي  
هتخلص عليك، إهرب وشوفلك حاجة تانية قبل ما ورا  
المقابر يخلص عليك، ولا أقولك تعالى ورايا.

إتحرك بمنتهى السرعة ولقيتني بتشد وراه بدون  
إرادتي كان بيجري بسرعة رهيبة زي الطيف، وأنا زيّه لحد  
ما لقيت نفسي قدام حيطه سد زي ما تكون سور لمبنى

قديم من القاهرة زمان، وعلى الأرض كان في شاهد قبر مكتوب عليه «قبر الصحفي نادر فودة».

أنا إتجمدت مكاني وفقدت النطق من المنظر وده معناه إن كلام الطفل ده صح، ده قبرك يا نادرا

طلعت تليفوني وكلمت مكاوي..

مكاوي: هاه سبعب ولا تربية مشايخ؟

نادر: إنت ماقولتليش ليه إن في عفريت عيّل صغير

هيطلع لي؟

مكاوي: عفريت مين؟ إنت هتخرف، إنت خرفت وبدأت

تهلوس شكلك، كل ده من الخوف على فكرة.

نادر: لا أنا ما بخافش وشوفت أكثر من كدة ٢٠ مرة وأكثر.

مكاوي (مقاطعاً): بعدين عيّل إيه إلهي طلع لك ده، قالك

عايز إيه؟

نادر: قالي إسمه مرسول جهنم

مكاوي: وطلب منك إيه بسلامته؟

نادر: طلب مني أمشي وراه وإلا هموت، ده وراي شاهد

التربة بتاعتني!

مكاوي(ضاحكاً): إنت خسرت وتربية المشايخ كسبت

يامعلم.

نادر: يعني إيه؟

مكاوي: إللي طلح لك ده مش مرسل جهنم ولا حاجة

زي ما قالك

نادر: أمال إيه؟

مكاوي: ده ملاك حضرتك، الملايكة لسه شايفين جواك

خير وعلشان كده بيساعدوك تبعد عن سكتنا وإللي طبعاً

مش على هواهم.

نادر: بقولك شوفت تُربتي، إنت بهيم!

مكاوي: تحب أوريك ١٠ تُرب عليهم إسمك دلوقتي؟

والله ما حد بهيم غيرك.

نادر: بس أنا مش نادر القديم أنا أتغيرت وإتعرفت على

أسوء خلق الله والدليل إني بكلمك دلوقتي

مكاوي(ضاحكاً): لا يا حبيبي إنت دلوقتي بترقص على

السلم لا عارف تبقى زيننا ولا عاوز ترجع لتربية المشايخ

نادر: أنا هرجع التربة دلوقتي وهعمل إللي أنت طلبته

مني كله وهتشوف.

مكاوي: آسف، فرصتك خلصت، لا هتتعرف توصل للتربة  
ولا هتتعرف تعمل أي حاجة ونصيحة ليك ماتتصلش بيًا  
تاني، شوفك حد غيري يعلمك الشغلانة لأنني مش فاتحها  
حضانة، وبعدين ياسيدي يابختك إن لسه في منك أمل  
والملايكة عايزة ترجعك للطريق الصح، بابك لسه موارب  
بلاش تقفله خالص.

نادر: إنت إللي بتقول الطريق الصح؟

مكاوي: طبعاً الطريق الصح، هو إنت فاكر إننا مش  
عارفين إن إللي بنعمله ده كله غلط ونهايتنا هتبقى سودا،  
روح بيتك يابني وإحمد ربنا إن باب توبتك لسه مفتوح،  
إلحق أدخل منه قبل ما يتقفل وما يتفتحش تاني، ويمكن  
نصيحتي ليك تشفع لي عنده

نادر: عند مين؟!

مكاوي: عند ربنا، إنت نسيته ولا إيه؟!

[HTTPS://T.ME/MKBTARAB](https://t.me/mkbtarab)

[HTTPS://T.ME/MK1BTARAB](https://t.me/mk1btarab)

## الفصل العاشر

### (بيوت مسكونة)

[HTTPS://T.ME/MKBTARAB](https://t.me/mkbtarab)

من بداية اليوم وأنا قلبي مقبوض مع إنني محقق نجاح متميز بأخر تحقيق نشرته عن قصة بسنت وإتصرف لي بسببه مكافأة محترمة، ولسه كمان لما أنشر تحقيق «جليلة ومكاوي» بس بردو مش مرتاح إوعوا حد منكوا يقولسي ده ضميرك (على فكرة أنا بضحك دلوقتني) إللي عندي حاجة تعالوا نسميها مثلاً قلق العظماء، ماهو يا جماعة الوصول للنجاح صعب لكن الحفاظ عليه أصعب بكثير، بس بردو أنا مش مضبوط، حاسس زي مايكون في حاجة هتحصل وده إنذار ليّا إنني أخذ بالي.

قطع حبل أفكارى كعادته السخيفة مدبولي وهو داخل بمشروب الصباح، إلهي يطفحه!

مدبولي: صباح الخير يا أستاذ نادر

نادر: إيه إللي إنت جايبه ده؟ فين الشاي؟

مدبولي: الشاي مش هيطير، إشرب بس كوباية

الكركية دي علشان يروق أعصابك وشوية وهعملك أحلى  
كوباية شاي.



نادر: هو للدرجادي باين علياً إني تعبان يامدبولي؟!

مدبولي: إنت إللي بتعمل كل ده في نفسك

نادر: هااا.. وإيه كمان؟

مدبولي: إخلف من الكتاب ده يابني، أو هاته وهخلصك

منه

نادر: إنت حذيت ولا إيه؟!

مدبولي: أحن للأيام السودا؟ الله لا يعودها.

نادر: طبعاً، ما إنت شايفني إحلويت وده بشهادتك  
والفلوس هتجري في إيدي أكثر، فطبيعي إن عقلك يقولك  
ترجع مدبولي بتاع التلات ورقات.

مدبولي: حدالله بيني وبين أي حاجة تغضب ربنا تماماً

نادر: ما تغضبهموش تماماً أغضبه نص نص، إنت عارف

يامدبولي إنت بتفكرني بمين؟

مدبولي: بمين يا أستاذ نادر؟

نادر: بالواحدة إللي بتفضل تلبس الحجاب وتقلعه،

في المناسبات تقلعه وتلبسه في رمضان، وتلبسه في  
التراويح، وتقلعه ليلة العيد وتبص في المراية بعد رمضان

ما يخلص وتقول الحجاب شكله مكبرني وترجع تلبسه في العمرة وبعدها تقبول دي طاعة أنا مش قادرة عليها، تقلعه وتطلب من إلهي حواليتها يدعولها، ترجع تلبسه وتقلعه وتقلع كل إلهي معاه.

مدبولي: ماهو يا أستاذ نادر يا مثقف ده إسمه جهاد النفس إحنا مش دورنا إننا نحكم على البني آدمين والواحدة إلهي إنت بتتكلم عنها دي أكيد بتكون نفسياً حالتها صعبة جداً ومش الحل إننا نجلبها، وبعدين أنا مش فاهم ده إيه علاقته بيّا!!

نادر: علاقته بيك وثيقة جداً وهفكرك يامدبولي قريب جداً هترجع زي الأول وتمارس كل إلهي كنت بتعمله بس متغلف بصبغة دينية المرة دي ماهو الموضوع ده بردو بيكسب والزباين العُبط كتير كل مافي الموضوع تظبيط الشغل كدة، وافتح التلفزيون وهتلاقي من النوعية دي كتير

دقن، جلابية مكوية، عود سواك في جيب الجلابية إلهي فوق، سبحة، إزازه مسك تستحمي بيها وإنت خارج وشوية جُمل من نوعية...

- اللهم بارك

- جزاك الله خيراً

- الله يعزك

- وتعوج لسانك في نطق الأسماء:

يعني تقول فاطمة بدل فطمة وعائشة بدل عيشة

وعبداللّه بدل عبدالله

وتحجّب الفنانات وتدي دروس في الفيلا، وتعمل خط

الفتاوي، وكل شوية تتجوزك عيلة من دور عيالك.

مدبولي (مقاطعاً): أعوذ بالله إنت بقيت شيطان، إذت

وصلت لمرحلة صعبة والناس إللي إنت بتتريق عليهم دول

ناس بتحاول تجتهد علشان تمشي على الطريق الصح،

وعلى حد علمي إن إنت تتلمذت على إيد واحد منهم ومش

كلهم كده زي ما إنت مقتنع!

نادر: الله يرحمه بقى زمانه مات

مدبولي: الله يرحمنا جميعاً، بجد إنت صعبان عليّ

وأقولك على حاجة؟ الموضوع مش موضوع كتاب، إللي

إنت فيه ده حاجة أكبر وأخطر بكثير ربنا يكفيننا يابني

ويكفيك شرور وتقلبات الدنيا، بعد إنك هروح أكمل شغلي، صحيح نسيتني يا أستاذ نادر في أنسة جت النهاردة بدري وسأبت لحضرتك رقم تليفونها وبتقولك كلمها ضروري عندها ليك قصة هتعجبك جداً

نادر: ما قالتش حاجة تاني؟

مدبولي: ولا حرف، رقمها في الورقة دي إتفضل أهو.

(- أخذت الرقم من مدبولي وشربت الكركدية ومكانش عندي حاجة أعملها النهاردة فقولت أتصل بصاحبة الرقم يمكن نقفل السنة بتحقيق محترم أحط على الكل به.)

وأهو تليفوني بيرن برقم أمي كنسلاتها، إتصلت تاني رجعت كنسلاتها إتصلت تالت ورابع وخامس بصيت للتليفون وقولت لها مش وقتك ولا وقت لطفي لما أخلص التحقيق الجديد هبقى أروح أعزي في البلد، أنا مش فاهم هو أنا خلفته ونسيته!

- طلبت الرقم رد عليًا صوت كان مكتوم، بعيد زي

مايكون صاحبته عندها برد ومبحوح كدة.

[HTTPS://T.ME/MKTBTARAB](https://t.me/mktbtarab)  
صاحبة الرقم: أستاذ نادر صح؟

نادر: أيوة مع حضرتك أو ميري ني

صاحبة الرقم: أنا فرح بكلمك من الفيوم عندنا مشكلة كبيرة وعرفنا مؤخراً بتحل أي مشكلة مش بس كصحفي نادر (بنبرة زهو): إيه ده هو وصلكوا ده في الفيوم كمان... ده شئ عظيم وحقيقي.

فرح: طبعاً يا أستاذ نادر

نادر: هي البحة إللي في صوت حضرتك دي دور برد ولا صوتك حلو كدة على طول؟!

فرح: تقدر تقول الإثنين بس طالما عاجبك خليه مباحوح كدة أحسن على طول.

نادر (ضاحكاً): لأ ده أنا أجي النهاردة أشوف الحكاية دي بنفسي.

فرح: تمام، هبعت ل حضرتك العنوان في رسالة

نادر: عندي سؤال هي المشكلة دي خاصة ولا عامة

فرح: مش فاهمة، يعني إيه؟

نادر: يعني مشكلة تخصك إنتي ولا حد من طرفك ولا حد معرفة سطحية ولا حد من قرأبك

فرح: هتفرق؟!

نادر: أه طبعاً هتفرق كثير علشان إحنا ما إتفقناش

فرح: ما إتفقناش على إيه؟ وعلى العموم هي مشكلة

تخص القرية عندنا كلها، والكل اتبهدلوا بسببها!

نادر: تمام يبقى تجمعيلي من أهل القرية إللي عندك ١٠

ألاف جذية يكونوا جاهزين أخذهم قبل ما أعمل أي حاجة

فرح: هو حضرتك بتأخذ فلوس؟

نادر: بسم الله كدة هستفتح بيكي، وهتكوني أول حد

أخذ منه فلوس، أصل بيني وبينك الشغلانة لمت وإللي

زبي لازم يكون مميز وياخذ حقه

فرح: طب ممكن تقلل المبلغ شوية؟ البلد عندنا أهلها

غلاية أوي

نادر: على فكرة أنا هاخذ في أول تحقيق هعمله بعدك

الضعف، شوقتي أنا كارمك إزاي يا فرّوحة!

فرح: حاضر، يذفع تيجي النهاردة؟

نادر: لو المبلغ هيكون جاهز هايجي

فرح: ماتقلقش كل حاجة هتكون جاهزة

نادر: كل حاجة يعني إيه، أي حاجة هطلبها؟!

فرح: هذستناك يا أستاذ نادر.

- إنتهت المكالمة بس الأهم من ده كله حكاية إنني أخذ فلوس دي عبقرية دي جاتلي وقتي وأنا بكلمها. ده الواحد ممكن يعمل ثروة من المغفلين، ربنا يخليلنا الجهلة ويبارك لنا في مدينة البهائم.

- مشيت من الشغل من غير حتى ما أستاذن روحت الشقة جيت شـنـطـتي إلـي فيها شرايط الكاسيت وجهاز التسجيل والكشاف والورق والأقلام وطبعاً مانسيتش أحط الكتاب، ومن ميدان الرماية ركبت العربية إللي رايحة الفيوم، ورجعت ركبت مواصلة تانية للقريبة نفسها على ما وصلت كانت الساعة ٨ بالليل إتصلت على فرح وعرفتني هتقابلني فين.

وصلت المكان إللي إتفقنا عليه لقيت واحدة واقفة

لابسة نقاب وزدهت علياً.

فرح: أستاذ نادر صح؟

<https://t.me/mktbtarab>

نادر: لولا صوتك المبحوح مكنتش عرفتك، هتقعد فين

في الحدة المقطوعة إلهي إحنا فيها دي؟

فرح: معلى أنا أسفة إنني جبتك هنا أصل أي حد لو

شافني واقفة مع واحد غريب إنت عارف بقى كلام الناس

نادر: بس مش لدرجة إنك تجيبيني في حدة مقطوعة

كرة!

فرح: والله هي ما كانتش مقطوعة غير بسبب إلهي

هحكيهولك، هو إلهي خلى الناس كلها تبعد عن هنا

نادر: شوقتييني.

- قعدت أنا وفرح على دكة خشب قديمة، وخلييني

أوصفلكم المكان بالضبط..

المكان عبارة عن أرض مهجورة شجرها ميت، الريحه

كانت غريبة مش عارف. أوصفها كل إلهي أقدر أقوله إنه

مكان ميت غرقان في معظم الضلمة.

شاورت لي فرح على بير مبني بحجر قديم وقالتي:

<https://t.me/mktbtarab>

فرح: الحكاية كلها في البير دخ،



نادر: إنتي صوتك مش غريب عليًا لو البحة دي مش موجودة حاسس إن الصوت هيكون مميز جداً

فرح: أعتبر دي معاكسة ولا إطراء؟!

نادر(مبتسماً بخبث): إللي تحبيه أنا موافق عليه

فرح(مقاطعة): بس غريبة إنت ما سألتيش علي الفلوس

نادر(متلعثمًا): طبعاً.. طبعاً كنت هسأل، هي فين؟

فرح: إتفضل، بس أرجوك شوفلنا حل في المصيبة إللي

إحنا فيها دي

نادر: للدرجة دي مصيبة؟!

فرح: لما الموضوع يكون متعلق ببُق الميَّة إللي بنشره يبقى أكيد مصيبة

نادر: البير ده طلع منه عفاريت ولا حاجة؟

فرح: لا عفاريت إيه إنت فهمتني غلط، أنا هحكيلك...

البير ده منعرفش مين إللي بناه، ناس بيقولوا قدام

المصريين وناس بيقولوا محمد علي باشا وناس بيقولوا حد من الأولياء وناس مصممة إن الجن إللي بناه.

كنا على طول بنشرب منه ونروي منه وعمره مانقص،  
بس إللي إتعودنا عليه من زمان إن في أيام ١٣، ١٤، ١٥  
ممنوع نقرب منه، ويوم ١٥ بالليل نجيب دبيحة ونحطها  
قدام البير ويوم ١٦ الفجر نيجي نلاقي الدبيحة مش  
موجودة ومفيش نقطة دم واحدة ولا حتى عضمة فنعرف  
إن الدبيحة إتقبلت وإننا هنرجع ناخد من البير خيره،  
وفضلنا على الحال ده سنين من أيام جدي وجد جدي لحد  
الشهر إللي فات، واحد من شباب البلد جه يزوره زميله من  
القاهرة قام حاكيه على الموضوع كله، نسيت أقولك إن في  
عهد في البلد هنا إن حكاية البير دي محدش يعرفها أبداً  
علشان كدة لو قلبت الدنيا مش هتلاقي معلومة واحدة عن  
البير ده، أدخل على الذئ وأكتب بير مسحور في الفيوم  
أتحدك لو لقيت حاجة.

نادر: ياسستي ولا هدخل ولا هطلع، إحكي إنتي بس  
وهصدقك.

فرح: المهم ياسيدي الشاب إللي كان من القاهرة ده  
كان اسمه زياد وصاحبه إللي كان من البلد كان اسمه وليد،  
فضل زياد يسمع من وليد كل حاجة عن البير وألح عليه

إنه يروح يشوف البير، فخذده وراحوا في الأيام العادية إللي مسموح لنا فيها بالزيارة لكن زياد قاله أنا عايز أروح في الأيام المحظورة، وليد رفض تماماً والموضوع إتطور بينهم لخناقة إنتهت بإن زياد زعل وسافر القاهرة.

كل ده والموضوع كان عادي ومحدثش كان عارف حاجة أصلاً، لحد يوم ١٣ بالليل الشهر إللي فات، سمعنا كلنا في البلد صرخة جاية من ناحية البير، رجالة البلد إتجمعوا ومابقوش عارفين يعملوا إيه، الصرخة إتكررت ثاني ومحدثش عنده الشجاعة يقترح إنه يروح حتى يشوف في إيه، إنت بتتكلم في عادة بقالها سذنين ومحدثش يقدر يغيرها، وفي عز ما الرجالة واقفين بيفكروا الصوت إشتغل بس المرادي كان جاي من جوا البيوت، طلع الرجالة يجروا كل واحد على بيته، وكانت الصدمة، كل بيت من بيوت الرجالة إللي خرجت وإللي كانوا فوق العشرين بيت حصل فيه مصيبة.

يعني مثلاً.. أول بيت منهم الست إللي فيه، باب البيت خبط فتحت لقت جوزها داخل، وهو بيمشي جوا البيت بتبص على رجليه لقتها مليانه شعر وصوابع رجليه

زي حوافر الحيوانات فالست صرخت من الهلع بتقول  
 إن جوزها إلتفت لها وفضل يطول.. يطول.. يطول لحد ما  
 راسه وصلت للسقف، ووقعت من طولها فاقدت الوعي من  
 المنظر.

- (البيت الثاني)..

الأطفال إللي فيه سمعوا خبط على الشباك فتحوا الشباك  
 لقوا رؤس متقطعة ومرصوصة على الشباك، الرؤس دي  
 كانت لأبوهم وأمهم، العيال فضلت تصوت وبيقولوا بعدها  
 إن الرؤس دي كانت حية وبتبصلهم بغضب.

- (البيت الثالث)..

كانت عروسة جديدة، وجوزها خرج مع إللي خرجوا،  
 الباب خبط عليها لقت حماتها بتقولها: جوزك هيبات  
 برا إنزلي علشان تباتي معايا تحت، نزلت وراها بس ما  
 دخلتش الشقة، بتقول إنها لقت حماتها خرجت للشارع،  
 فنادت عليها علشان تشوفها رايحة فين، ماردتش عليها  
 إتلفتت لها بس وشاورتلها تمشي وراها، لسه هتتحرك  
 وراها سمعت صوت بينادي عليها بإسمها إتلفتت لقت

حماتها واقفة على باب الدار وبتزعقلها وبتقولها: إنتي  
رايحة فين متأخر وجوزك برا؟

البتت يا أستان نادر لسانها إتشل وإتلفقت تدور على  
إللي كانت ماشية وراها فص ملح وداب!!

(البيت الرابع)..

الباب خبط فتحت الزوجة لقت واحد غريب بيقولها  
جوزك طب ساكت والرجالة شايلينه وجايبينه ورايا،  
فضي أوضة علشان يتغسل فيها، الست فضلت تصوت  
هي وعيالها على جوزها إللي المفروض إنه مات، ووقفت  
لوحدها على باب الدار تسكتني وصول جثمان جوزها  
ومفيش حاجة جت، سمعت ضحك عالي من جوا دخلت  
تجري لقت جوزها ميت ومحطوط في الأرض عريان  
وولادها جايبين جرادل مليانة دم وبيصبوا عليه، من  
الصدمة فقدت النطق وإبنها بصلها وقالها: أحنا أولى  
بغسل أبونا!!

(البيت الخامس)..

الزوجة بتحكي إنها كانت بتتقلب على السرير لقيت  
جوزها صاحي ومفتح عيذه وعيذه كانت كلها سودا

وفتح بوقه على الآخر وصرخ في وشها وقالها: نامي ياولية، نطت من على السرير طلعت تجري في الصلاة لقت الباب بيفتح وجوزها داخل من برا.

(البيت السادس)..

كان بيت راجل عايش هو وأمه العجوزة لوحدهم وخرج مع إللي خرجوا، لما رجع لقي أمه المُسننة مش قاعدة في الصلاة مكان ما سابها وخصوصاً إن حركتها صعبة، نده عليها وسمع صوتها من جوا بتقوله: أنا جياك يا بني، بص لقاها جاية بتمشي على إديها ورجليها ورأسها مقلوبة لفوق وجاية جري عليه وبتقوله (بصوت مخيف): البير المحذور إتنس!.. إتنس!.. إتنس!!!

(البيت السابع)..

ساكن فيه راجل أرمل وعايش لوحد، لما رجع مع إللي رجعوا ودخل أوضته لقي مراته إللي ماتت قاعدة قدام التسريحة بتسرح شعرها وبصت له من خلال المرآة بصة هربت الدم من عروقه وبتقوله: وحشتني!

الراجل مبقاش عارف يعمل إيه، رجع بضره علشان يخرج من الأوضة خبط في جسم إتلقت لقاها مراته الميتة

وبتقوله: هو في حد يخاف من نصه الثاني؟ وحشتني  
يا حبيبي!

ومدت أيديها وحضنته، بيحكي ويقول إنه حس بروحه  
بذتسحب منه وكل إلهي فاكره إنها قالتله:

الغريب دنس البير المحظور

الغريب دنس البير المحظور

الغريب دنس البير المحظور

(البيت الثامن)..

بيت من البيوت إلهي كل أهل البلد بيحبوا يسألوا عن  
أهله لأنه لزوج وزوجة مات إبنهم الوحيد وهو عنده ٦  
سنين في حادثة، بيحكي صاحب البيت وبيقول روحت  
لقيت مراتي نايمة فإتطمنت إن الصوت مكانش جاي  
من بيتي وقولت أخرج علشان أتطمئن على باقي أهل البلد،  
وأول ما وصلت عند باب البيت سمعت صوت بينادي عليًا  
أنا عارفه كويس، صوت إبنني كريم الله يرحمه، إتجمدت في  
مكاني كان كل ما يقول بابا كان جسمي يتنفض، لحد ما  
لقيته جاي يمشي بالراحة في الطرقة وكان ماشي بيتطوح  
وفي إيده سكيينة كبيرة من المطبخ غرقانة دم وبيقولي:

أنا وضّلت ماما للسمما وجاي علشان أوصّلك إذت كمان، لما  
 بصيت في عنيه كانت كلها لونها أبيض مُخيفة، وسمعت  
 صوت حشـرجة جاي من أوضتي أنا ومراتي، وقعت من  
 طولي.

وفوقت ملقيتش أي حاجة من الكلام ده حصل ولا إبني  
 رجع ولا مراتي إتدبحت ولا أي حاجة.

(البيت التاسع) ..

بيحكي صاحبه إنه لما سمع الصوت جري هو والرجالة،  
 وكل واحد راح يجري على بيته، بيقول لما وصلت لقيت  
 الباب متوارب، أول لما دخلت الباب إتزرع ورايا والنار  
 مسكت في كل حثة في البيت، نار كتيرة وكبيرة لدرجة إن  
 أنا مكانش عندي فرصة ألحق أظفي أي حاجة، كل حاجة  
 ولعت مع بعضها الستاير والكراسي والكتب بالعفش كله،  
 ومن وسط النار سمعت صوت ولادي بيصرخوا.

من غير ما أفكر دخلت جوا النار وحصل حاجة غريبة  
 أنا ما حسيتش بأي حرارة بالعكس أنا حسيت بتلج  
 وساقعة رهيبة ما بقيتش فاهم إزاي النار دي كلها حواليا  
 وطالع منها تلج كدة، يمكن اللي يسمع يقول دي أرحم من



الذار لكن لآ السقعة طبقت على صدري، وجمدت أطرافي،  
ووقعت على الأرض، وأخر حاجة فإكرها إنني شوقفت في  
الأرض عيالي وأمهم كانوا بيضحفوا ناحيتي وأول ما وصلوا  
عندي قالوا: الغريب دنس البير، وبعدها غبت عن الوعي،  
وأخر حاجة شوقفتها كانوا بيقطعوا صوابعهم بأسنانهم  
وبياكلوها ووشوشهم بقت عبارة عن كُتل دم بس.

(البيت العاشر)..

صاحبه لما رجع لقي مراته وعياله واقفين برا  
وبيعيطوا، ولما سألهم في إيه، قالوله: إنت بعد ما خرجت،  
سمعنا صوت خبط ورزغ جاي من الحمام روحنا فتحنا  
الباب نبص في إيه لقينا الحمام مليان تعابين فوق بعض  
وبمجرد ما فتحنا الباب زحفوا بسرعة جداً كأنهم بيحجروا  
ورانا، وكنا كل أما نروح نستخبى في أوضة نلاقيها  
مليانة تعابين، فبين وبين على ما قدرنا نوصل لباب البيت  
وخرجنا نحري برا.

بس بعد ما كانوا محاطين أوكرة باب البيت ومحدث  
يقدر يمد إيدته يفتح، بين وبين لما سابوها وعرفنا نخرج.

لما الراجل يا أسقاذ نادر دخل البيت ملقاش التعابين  
 لكنه لقي مئآت من الجلود إल्ली التعابين بتخلعها من  
 جسمها في وقت تغيير الجلد، من بشاعة المنظر خد ولاده  
 ومراته وراح بسات ليلتها عند الجيران، طبعاً منظر صعب  
 جداً.

(البيت الحادي عشر) ..

صاحبه بيقول دخلت البيت كان عادي جداً مفيهوش  
 حاجة غريبة وبنتي ومراتي كانوا كويسيين فسألتهم  
 سمعتوا الصوت؟

قالوا: سمعوه وخافوا يخرجوا يشوفوا في إيه لأنه كان  
 رهيب.

وعدى الوقت وبالليل قام صاحب البيت على صوت  
 دق ثابت ومذتظم خرج لقي مراته بتدق لحمه في الهون  
 النحاس بتاع زمان دهعلشان تعمل كفتة فسألها ليه الدق  
 ده بالليل يا ولية؟ فكان ردها علشان اللحمه تبقى طازة،  
 سمع صوت خروشة في المطبخ دخل لقي بنته بتمسح  
 أرضية المطبخ بردو إستغرب من التوقيت!

بنته كانت عندها سرحانة وشاردة تماماً وخلصت إلهي  
بتعمله وخرجت في هدوء، طلع هو كمان قعد معاهم  
شوية لحد ما مراته خلصت بس لاحظ إن طول ما مراته  
بتدق اللحمه في صوت ققط مزعج جداً جاي من برا  
البيت، فقالها هفتح أمشيهم، فجأة عندها إتقلبت وقالتله:  
الغريب دنس البير، والبير بلعه!!!

شوية ودخلت مراته وبنته يناموا وصوت الققط زاد  
أوي وبقى لا يطاق، فتح صاحب البيت الباب علشان يهش  
الققط ويمشيهم إتفاجئ إن إلهي واقفين قدام باب بيته  
أكثر من عشر ققط وإلهي ما إستنوش، دول دخلوا بسرعة  
من بين رجليه جري على المطبخ، دخل وراهم لقاهم  
بيشدوا كيس من الزبالة عاوزين يخرجوه، كان فاهم إنهم  
جعانين، فشال الكيس يشوف لو فيه أكل يرميه للققط  
برا، الكيس إتقطع ووقع منه ٣ رؤس ققط وجلد مسلوخ!!!  
الراجل إتصدم ورماه في الأرض، الققط شالوا الرؤس

والجلد بس نازهم وطلعوا يجرؤا به برا، وإتبقى بعضهم  
واقفين ينوتوا ببشاعة قدام باب التلاجة، فهم المطلوب

وفتح باب الفريزر لقي مراته عاملة ٣ أكياس لحم مفروم من القطط! مفيدش إحتمال تاني.

شالهم وذلهم على الأرض، القطط خدتهم وخرجت بهم في هدوء وبطلوا يعملوا أي صوت! وإختفوا.

بعدها بيقول إنه فضل صاحي طول الليل مش بس من الخوف من إللي مراته وبنته عملوه لأ علشان هم كمان طول الليل كانوا بيزوموا وبيذونوا وبيطلعوا أصوات مُخيفة أكثر من صوت القطط نفسها!

-تاني يوم مراته وبنته لما صحبوا مكاوش فاكرين أي حاجة مسن إللي حصل! ولا كأن الليلة إللي فاتت كان فيها مجزرة حرفياً في البيت!

وإفكر صاحبنا إن الموضوع إنتهى، لكن كان كل ليلة بعد ما مراته وبنته أول ما يناموا يرجعوا يعملوا نفس الصوت المُخيف من جديد!

لحد ما قرر يسحب البيت خالص ومشى من البلد كلها!

(أما البيت رقم ١٢)

كان عايش فيه شاب ومعه أبوه كبير في السن وبيعاني  
من الزهايمر، أول ما الشاب رُوح البيت قلب الدنيا على  
والده ملقاهوش فاترعب لا يكون خرج!!

لكنه إكتشف أن أبوه مستخبي ورا كرسي الصالون،  
تعجب الشاب وسند أبوه وقعه على الكرسي وسأله ليه  
مستخبي يا بابا؟

الأب: البعبع يابني

الشاب: بعبع إيه ياوالدي؟!

الأب: البعبع كان هنا وكان عاوز ياكلني يابني.

الشاب: ياوالدي بيته يالك مش أنا قولتك قبل كده إنت  
بيته يالك حاجات كتير

الأب: والله يابني البعبع كان هنا

الشاب: طب شكله إيه؟

الأب: كان عفريت كبير وله قرون كبيرة وعينه تخوف.

الشاب: إشمعني فإكر دي، ما إنت بتنسى كل حاجة!

الأب: لأأنا فاكرا وحتى قالى: الغرىب دنس البىر ودفعا  
الآمن والبلد كلها هآدفع الآمن!

بىقول الشاب يا أسآناز نادر إنه آأء والءه نىمه وهو  
مصمم إن كان فى بعبع فى البىء.

وبمآرء ما الشاب نام..صآى على آر شءىء فآء؁  
عىنیه وقام ىفآء الشبآك عآشان ىءآل نسمه هوا؁ مآرء  
ما الشبآك إآفآء لقى مسآ واقف فى وشه؁ مءءئىآ الشبآك  
ءه فى الءور الآنى ومفىش آآآة ىقءر ىقف علىها

آانىآ بقى: إنه شاف نفس الشىء بنفس المواقفاآ إالى  
أبوه قاله علىها؁ ءه كمان عاد له نفس الآملة إالى قالها  
لأبوه:

الغرىب دنس البىر ودفعا الآمن والبلد كلها هآدفع  
الآمن!

طلع الشاب ىآرى على والءه صآاه وقاله يا والءى  
كلامك صآ؁ أنا شوفآ البعبع أنا كمان وقالى نفس الكلام  
إالى قالهولك.

الأب: بعبع إيه يا حبيبي؟ إنت شكلك كذت بتحلم  
بكابوس وحش، أنا هقوم أصحي والدتك تعملك كوباية  
شاي بلين وتجهزلك هدموك علشان ما تتأخرش على  
المدرسة.

الشاب: مدرسة! يا والدي أنا عندي ٣٥ سنة! وأمي ماتت  
من زمان!

الأب: ماتت؟! الله يرحمها.. طيب نام شوية علشان ما  
تتأخرش على معاد السحور!!

الشاب: حاضر يا والدي هنام، بس خليني أنام هنا  
جنبك علشان أنا خايف

الأب: طبعاً يا حبيبي وهصحيك نصلي العيد سوا ما  
تقلقش هاخذك معايا إنت وأمك لما ترجع من العمرة.

(البيت الثالث عشر)..

صاحبه كان الشيخ علام إمام الجامع وبيقول إنه رُوِّح  
للقى مراته وعياله نايمين والبيت هادي وساكت، فاتطمئن  
وأكل لُقمة وقعد في الصلاة يتفرج على التلفزيون وعينه  
غفلت وهو مشغل التلفزيون، صبحي على صوت مخيف  
بيقوله:

إصحى يا شيخ علام، الغريب دنس البير  
إصحى يا شيخ علام، الغريب دنس البير

بيقول فتّحت عنيا على الصوت وبصيت حواليا ملقيتش  
حاجة وقال ده أكيد كابوس، قام يطفى التلفزيون علشان  
يدخل يكمل نوم في الأوضة شاف حاجة غريبة لاحظ إن  
الفيلم إللي شغال في التلفزيون فيه حاجة غريبة المكان  
إللي في الشاشة ده المنطقة بتاعة البير بتاع البلد، الشيخ  
قام قعد مكانه! وقال: إيه ده!!

الصورة كادت بتعرض البير والجو كان المغربية وظهر  
شاب من ضهره ماشي ناحية البير وعمال يبص حواليه  
يمين وشمال كأنه حرامي.

بيقول الشيخ علام إنه شاف وشه لكنه معرفوش،  
وفضل الشاب ده ماشي ناحية البير وأول ما وصله وطى  
يبص عليه من جوا، وطلع تليفونه علشان يتصور والبير  
ورا منه (صورة سيلفي).



وهو بيتصور وشه إترعب وجسمه إتنفض كأذه شاف  
في الموبايل بتاعه حاجة مش ظاهرة في إللي بيتعرض  
في التلفزيون.

الشاب إتجمد مكانه ورمى التليفون بعيد ناحية الزرع،  
وقام طلع على طرف البير بهدوء، وقام ناطط جوا البير  
والصورة إتشوشت ورجعت للقناة إللي كان الشيخ علام  
مشغلها!

الراجل بعدها يكام يوم راح عنذ البير قلب الدنيا لحد ما  
لقي الموبايل فتحه، وشاف الصورة إللي الشاب صورها،  
كانت صعبة أوي.

الشاب متصور ووراه وحش أسود عيذيه جمرتين من  
نار، وكان في المكان إللي شافه بيترمي فيه وواقف ورا  
الشاب وطاير في الهوا!

من بعدها الشيخ علام قال لأهل البلد إن الشاب كدة نال  
عقابه وإنه هيشوف طريقة يخلي البير يسامحنا وترجع  
زي ما كنا، ومن يومها وهو بيحاول، لحد ما الست العجوزة  
جدة الراجل صاحب البيت رقم ١٤ حك حاجة غريبة أوي.

بتقول إن البير ده له حكاية قديمة والكل نسيها أو تناساها! ومحدثش فاكر أصلها وبدايتها.

نادر: حكاية إيه؟!

بتقول إن البير زمان كانوا بيرموا فيه الشباب والبنات الملبوسين ويخرجوا منه والمسّ إلهي عليهم مختفي نهائي، وكان ده بيحصل بس في أيام ١٣ ، ١٤ ، ١٥ وإن أي حد كان عليه جن بمجرد ما ينزلوه في البير يخرج منه سليم متعافي وكانوا بيرموا الملبوسين في التلات أيام دول بس وكان إسمهم أيام النور...كلامهم متناقض ما تفهمش بيروحوا في الأيام دي ولا ما بيروحوش يا أستاذ نادر

تقدر تقول 3 أيام للعلاج وباقي الشهر للشرب والموضوع مكتمين عليه والبلد حالها هادي، ومحدثش عنده المعلومات دي.

لحد ما في مرة نزل ١٣ شباب ومرجعوش تاني والبلد إتقلبت والكل إعتبر إن البير غدر بيهم، وخان العهد القديم مع أهل البلدا

والناس والأهالي مُخها إتلحس وبقت بتعامل البير إنه  
بني آدم وتروح ترمي فيه زباله، والأغرب إن البير نفسه  
إستجاب ولفظ الشباب برا لكنهم كانوا كلهم ميدين، الدنيا  
قامت ومقعدتش والناس حلقوا إنهم يهدوا البير ويردموه،  
مجرد ما فكروا في الفكرة دي الخراب حلّ على البلد  
والبيوت إتملت خوف ورعب وحزن بدون سبب!

لحد ما خرج في يوم شاب كان صاحب واحد من إللي  
ماتوا في البير، وقال إن صاحبه في مرة قبل ما ينزل هو  
وصاحبه قاله أنا هنزل وهاخد واحدة غريبة عن البلد معايا  
تحت! فضل يقنعه إن ده حرام ومش عارفين البير ممكن  
إنتقامه يكون إيه!! إرجع عن إللي في دماغك!

لكذه صدمم ونزل فعلاً وخرج من غيرها وقاله وهو  
غاضب البير خطفها مني! أنا هنتقم منه شر إنتقام! أنا  
محدث ياخذ مني حاجة تخلصني.

وقاله إنه هيجمع شباب وهينزلوا يدوروا عليها  
وهيدنسوا مية البير بمية قاري عليها ساحر طلاس...

حاول يُثنيه عن الفكرة بس رفض وطلب منه ما يحكىش  
لحد أي حاجة لحد ما يرجع هو والشباب من البير، ونزلوا  
في نفس أيام النور وبعدها حصل إللي حصل!

أهل البلد لما عرفوا إللي حصل راحوا لحد من المشايخ  
الكبار طلب منهم خلوة أسبوع ويرجعوا له قالهم:

خلاص البير غضب إنسوا تماماً إنكم تنزلوا أي حد إلا  
لو وصل لمرحلة صعبة من الشر والأذى ومحدث عارف  
يسيطر عليه ووقتها يا إما البير هيعالجه أو هيقضي  
عليه ومش هتشوفوه أو هيلفظه ربما حي وغالباً ميت،  
ووارد البير يغضب لو حد راح من باب الفضول.

غير كدة الثلاث أيام بتوع النور دول لازم محدش يقرب  
من البير تماماً إلا لو هتعملوا حكاية إنكم فاقدين الأمل في  
حد خلاص.

- الثلاث أيام إتحولوا من أيام النور للأيام المحظورة  
والكل بقى بعيد عن البير فيهم تماماً!!!

وده معناه إن الشباب إللي راح من باب الفضول تسبب  
في غضبه جديدة للبير نشر بسببها الفزع في البلد كلها

في بيوت العشريين راجل إلهي خرجوا يشوفوا أيه سبب  
الصرخات في الليلة دي!

ومن وقتها يا أستاذ نادر والبيوت زي ما قولتلك في كرب  
شديد، والبير نشف وأعلن غضبه من جديد، وأنا واثقة فيك  
إنك هتعرف تحل المشكلة دي وتقولنا الحل إيه!!  
(البيت الخامس عشر)..

نادر (مقاطعاً): خلاص كفاية إلهي سمعته أنا عاوز  
أقابل إلهي راح البير مش قولتي تقريباً اسمه زياد؟  
فرح: للأسف إختفى

نادر: أmaal عرفتوا إزاي إنه راح؟

فرح: هو راح وإعترف وحكى إلهي حصل وبعدها  
إختفى تماماً وبعدين طلع هو إلهي الشيخ علام شافه في  
التلفزيون.

نادر: أنا برودو مش فاهم فين المشكلة هي الناس دي  
بعد إلهي حصل في بيوتها ده جرالها حاجة تاني؟ ولا  
الموضوع خلص عند كدة؟

فرح: ما شافوش يوم عدل من وقتها مع إنهم ملهمش  
 ذنب ومعملوش حاجة، بس مجرد ما يبعدوا عن بيوتهم  
 الدنيا بتهدى والمعاناة بتقل كثير.

نادر: خلاص محلولة يسـيبوا البيوت، فين المشـكلة  
 بقى؟

فرح: المشكلة إن البير جف تماماً

نادر: خلاص إشربوا من أي حاجة تانية

فرح: هو إيه إلهي نشرب من حاجة تانية هو إذت طالب  
 10 آلاف جنية علشان تقول إشربوا من حاجة تانية!!

نادر: لا حضرتك إذتي فاهمة غلط أنا مش شغال في  
 وزارة الري!

فرح: أمال قارفني وقارف الناس كلها إذك حلال العقد  
 ليه؟ لما إذت مجرد صحفي ما تبقاش تتفرد تاني على  
 الناس وتتك على الخلق.

نادر(متهكماً): أوعدك المرة إلهي جاية وأنا جاي هجيب  
 العصا السحرية وأقف قدام البير وأقوله «أبرا كدابرا» وأقوله  
 رجّع الميَّة يا بـير ياوحش من تاني وإلا هزعك

فرح: ما تطلع الكتاب وتشوف حل فيه

نادر: كتاب!! إنتي عرفتي مزين إن أنا معايا كتاب.

فرح (بإرتباك): ماهو.. ماهو.. ماهو. أكيد بيبقى معاك كتاب زي شمس المعارف وكدة بتستعينوا به ما كلكم شبه بعض.

نادر: بقولك إيه أنا من الأول مش مرتاحك وشاكك فيكي، إنتي مين إللي زكك عليا؟

فرح: أنا لازم أمشي دلوقتي علشان إتأخرت، بعد إنك وهكلمك تاني.

نادر (ماسكاً بذراعها): لا مفيش مشي، تروحي فين؟ هو دخول الحمام زي الخروج منه يا حلوة!؟

- وبحركة مُباغته شدّ نادر النقاب من على وش فرح وصرخ بإنزعاج شديد!

إنتي!!!

إنتي!!!

نادر: إيه ده؟! إنتي إيه إللي جابك هنا!؟

فرح: جاية علشان أفوّك وألحقك زي ما لحقك كثير قبل كدة، هي يعني أول مرة!

نادر: أنا مش فاهم حاجة يعني كل الموضوع ده كله  
إشتغالة؟!

فرح: معرفش، أنا جاية في مهمة محددة وواضح إنني  
فشلت فيها يا نادر.

نادر: إنطقي يا مروة إيه إلهي جابك هنا، وعرفتني  
موضوع الكتاب مدين بدل ما أكلم خالتي صفية وأطربق  
الدنيا على دماغك، إنطقي يا مروة!!

مروة: لا متتعيش نفسك وتكلمها أو تكلم أي حد مش  
مستاهلة.

نادر: يعني إيه؟

مروة: بص حواليك كويس يا نادر وإنك تفهم.



الفصل الحادي عشر

(العصاة والبئر)

[HTTPS://T.ME/MKBTARAB](https://t.me/mkbtarab)

- بصيت حواليا لقيت خالتي صفية خارجة من وسط الغاب قولتها: إنتي بتهببي إيه هنا! إنتي كمان؟

ومن الناحية الثانية ظهرت أمي وزاد تعجبي أكثر!

ومن ناحية الثالثة ظهر الحاج مختار وإنضم للمشهد ووراه علا واقفة بتبصلي بتحدي قولتلهم: إيه إللي جابكوا هذا، إنتي إللي جبتهم يا مروة؟ ولا إنتي يا علا هانم؟!

ومن خلف مروة ظهر كرسي متحرك قاعد عليه الشيخ لطفي وشكله تعبان جداً، مكانتش دي صدمتي، صدمتي الحقيقية كانت في إللي بتزق الكرسي بصعوبة، عارفين مين؟

أمنية أختي إللي لوهلة حسيت إنها أمي من شعرها الأبيض وتجاعيد وشها ولولا إنني لسه شايف أمي كذت مستحيل أصدق إن دي أختي أمنية وسمعت صوت من ورايا بيقول: عرفت مين الروح الذالثة يا نادر؟

لسه برديو مش فارق معاك؟!

لسه مش فارق معاك إن أختك كبرت وعجزت لدرجة إنك مش عازف تفرق بيديها وبين أمك؟

دلوقتي عُلا وأمنية وأنا، إنت السبب في إللي حصلنا  
إحنا الثلاثة.

نادر: أسكتي يا هالة.. بقولك أسكتي.. اخرسي

نادر(صارخاً): إنتوا عاوزين مني إيه؟ أنا مليس ذنب في  
إللي حصلك يا أمنية، ولا إنتي يا ست عُلا، إنتي بتبصي  
كدة ليه يا أمي؟

إيه يا حاج مختار دلوقتي بقيت أخرس ما بتنطقش؟!

إيه يا شيخ لطفي لسه فيك نفس؟ تكودش فاكربي  
ملبوس ولا حاجة وجاي تقرا عليًا وتعمل الشويدين  
بتوعك؟

الشيخ لطفي: ياريتني كذت أقدر مكنتش إتأخرت،  
أنا جيتلك أكثر من مرة في رؤيا ليك، وبقيت أنادي عليك  
بصوتي وأحذرك وأقولك إرجع لكن إنت إللي في دماغك  
مصمم تعمله، أنا جيت علشان أقولك فوق يا نادر، إرجع

نادر إللي أنا رييته وعلمته يا بني.

اللهم يا حنان يا منان يا واسع الغفران...

جري نادر على الشيخ لطفي وخبط الكرسي إلهي قاعد  
عليه وقعه به وبعد عنه.

زعق الحاج مختار وجري قعده على الكرسي ورجع  
نادر وقف وسطهم كلهم وعنيه بتلف عليهم واحد واحد  
زي المجنون.

ويقول: عملتوا إلهي إذتوا عاوزينه، ومفيش حاجة  
هتتغير، أنا مش عاوز أعرفكوا تاني في حياتي، مش عاوز  
أقابل حد فيكم ولو صدقة، من الذهارة أنا يتيم الأب والأم  
ومليش إخوات مليش معارف مليش قرايب، وبحذركم أي  
حد ويكررها أي حد هيحاول يتواصل معايا هيندم ندم  
عمره يا عصابة.

وفي وسط المواجهة إلهي كانت بيني وبينهم سمعت  
صوت بعيد مش مألوف أوي بالنسبة لي طالع من وسط  
الغاب في الضلمة يقول:

- يا من جرت بيننا وبينكم العهود

<https://t.me/mktbtarab>

- أقسمت عليكم بربي وربكم الواحد المعبود

- أن تحضروا إلينا من الأرض السفلية ومن باطن  
الأخدود

- لتلبوا النداء وتطيعوا أمرنا بكرمكم المعهود

- إنه عبداً ضلّ وأبى التقويم

- كُنّا نعهدُه صالحاً لربه خالص التسليم

- سيطر عليه شياطين الإنس بتسليط من الشيطان

الرجيم

- فلتحضروا الآن ولتكونوا دعماً لنا أيها الأعوان

- أيقظوه ولما حدث له انظروه

- وعن الغمة السوداء اكشفوه

- وعم مسار الشيطان أزيحوه

- إحضر يا حَبّاب أو من ينوب عنك

- إحضر يا عزازيل أو من ينوب عنك

- إحضر يا زوّبعة أو من ينوب عنك

- إحضر يا مقلّاص أو من ينوب عنك

- إحضر يا دهار أو من ينوب عنك

- إحضري يابنت شمهورش أو من يذوب عنكي
- إحضري يابنت زحالف أو من يذوب عنكي
- إحضري يابنت الأحمر أو من يذوب عنكي.

فضل صوت الشخص المجهول يتردد وأنا مش شايفه، ولكني شايف في ركن بعيد الدليل العجوز وهو يبص بمذتهى الغضب وبيقولي: إهرب دلوقتي قبل ما يقتلوك. رجح الصوت يكرر الطلاسم لكنه كان بيدعى ويشدد قوة، وفي نفس الوقت بدأت أحس بضعف غريب والدنيا بدأت تضلم في وشي، ودوخة شديدة بتهجم عليا، مديت إيدي بسرعة جوا الشنطة علشان أطلع الكتاب لقيت أمزية بتتكلم بصوت مُجهد تعبان وبتقولي: بتدور على ده يا نادر؟

جريت زي المجنون عليها علشان أخذ الكتاب منها هجم عليا عم مختار وظهر مدبولي إلي معرفش جه إمتي هو كمان وكثفني معاه وشالوني الإثنين، ولقيتهم رايعين بيًا على البير وسمعت الراجل العجوز بيقولي: هيرموك

دلوقتي في البير يا مسكين حتى أقرب الناس ليك قرروا  
يموتوك.

فضلت أقاوم بشراسة لكنهم كانوا أشد وأقوى مني  
الإتذنين مع بعض، وبعزم ما فيهم وصلوا الإتذنين بيًا للبير  
وبنظرة سريعة مني شوقت الآتي:

أمي بتصرخ وبتقول: سيبوا إبني

أمنية وقعت على الأرض ومزهارة من العياط

مروة وخالتي صديقة حاضنين بعض وبيعيطوا هم

الإتذنين وبيصرخوا

الشيخ لطفي رافع صباعه وبييكي وبيقول: إنا لله وإنا

إليه راجعون.. إنا لله.....

عُلا واقفة مُتبادلة المشاعر مقدرش أقول فرحانة ولا

زعلانة ولا فاهمها.

والراحل العجوز مديني ضهره وماشي بعيد سايب

<https://t.me/mk1btarab>

المكان.





# الفصل الثاني عشر

(الأثم)

مقدش أقول إن أنا فقدت الوعي أول ما وقعت في  
البيء بس أنا إلهي متأكد منه إني غبت عن الوعي بمجرد  
ما سابوني أقع.

عايزين تعرفوا حاجة كمان؟ أنا بدأت أشوف رؤية  
غريبة جداً بمجرد سقوطي في الهوا، رؤيا فسرت وشرحت  
كل حاجة كانت غامضة علياً وهتوضحلكم كل إلهي حصل  
من الألف للياء.

كنت بتفرج على كل حاجة كأني بشوف أحداث فيلم أنا  
البطل فيه وفي نفس الوقت أنا المتفرج الوحيد عليه.

شوفتني في مكتبي وشوفت مدبولي برا المكتب بيحاول  
يلزق جواب مفتوح علشان مايبانش إنه فتحه، وخبط على  
باب المكتب ودخل حطلي كوباية عصير البرتقال وبدأ  
وصلة رغيه المعدادة وإلهي إنتهت بإنه سسلمني الجواب،  
فتحت الجواب بشخصية نادر إلهي بشوفها وبشخصيتي  
أنا قدرت أقرأ إلهي مكتوب في الجواب كان جواب مختلف  
تماماً عن أي جواب جالي قبل كدة، كان مكتوب فيه جملة

واحدة بس (أنا مُعلق بين الحياة والموت أرجوك أنقذني عن طريق الإسقاط النجمي).

شوفت نادر عمال يقوم ويقعد في المكتب وهيتجنن من الحيرة، إتبدل المشهد ولقيت نادر في البيت في أوضة نومه قاعد على كرسي في حالة إسترخاء تام لا منه نايم ولا منه صاحي، فضل الوضع ده مدة طويلة مش عارف قد إيه لحد ما فجأة بدأ نادر يتنفض كأنه بيتكهرب، وركزوا معايا كويس في إللي هقولها ولكم دلوقتي..

أبطال المشهد (أنا متفرج وراوي، نادر بطل المشهد).

ظهر بطل ثالث، البطل ده هو طيف خرج من جسم نادر وبدأ يحوم في الأوضة، يعني يا جماعة إحنا بقينا 3 نادر

(واحد على كرسي سسطيحة نايم تماماً والتاني طيفه

إللي بيتجول في الأوضة والثالث أنا المتفرج).

نادر الطيف كان بيطير في الأوضة ومسنتمتع بحالة

الحرية إللي بقي فيها، حاولت أكلمه لكنني أيقنت إنني مجرد مُشاهد للفيلم إللي قدامي والمتفرج عمره ما بيكلم

بطل الفيلم والفيلم شغال، فإكتفيت إنني أكمل مشاهد  
وخصوصاً إن باب الأوضة إتفتح ودخلت هالة!  
شافها طيف نادر وهي كمان شافته وبدوا يتكلموا مع  
بعض..

نادر: إنتي شايفاني؟

هالة: ما أنا إللي خليتك تبقى كدة علشان أعرف أتواصل  
معاك أسهل

نادر: يعني إيه؟

هالة: أنا صاحبة الجواب يا نادر

نادر: معقول!! وليه بعتالي جواب ما إنتي لما بتحبي  
تشوفيني بتعرفني توصلني لي

هالة: للأسف، مبقاش ينفع زي الأول وبعدين خلي بالك  
أنا قدامي مدة بسيطة ولازم أمشي فمش عايزين نضيع  
وقتنا في كلام فاضي ملوش لازمة، أنا جياالك علشان أقولك  
إن في فرصة أرجع ثاني للدنيا بنى أدمة من لحم ودم.

<https://t.me/mktbtarab>  
نادر: بجد إزاي؟! قولني لي.

هالة: الموضوع كله في إيدك إنت

نادر: قوليلي أي حاجة أقدر أعملها ومش هتأخر يا

هالة.

هالة: أي حاجة يا نادر؟

نادر: هالة أنا بحبك وبرغم إن علاقتنا دي غريبة ومش

عارف نهايتها هتكون إيه، لكني مكمل وإنتي جاية دلوقتي

تقوليلي إن ينفع ترجعي للنديا، وأنا بقولك أوامريني وأنا

هنفذ

هالة: كل المطلوب منك يا نادر إنك فعلاً تنفذ لكن

بشرط

نادر: موافق من غير ما أعرف

هالة: الشرط إنك ماتفكرش ولا تجادل في أي حاجة

هطلبها منك أو هتشوقها

نادر: حاضر

هالة: هتلاقي وراك على الأرض إبريق ألق هدومك كلها

وصُب على نفسك من السائل الموجود في الإبريق ده.

نَفَذَ طَيْفَ نَادِرِ الطَّلِبِ الْأَوَّلِ وَصَبَ عَلَى جِسْمِهِ الْعَارِي  
 مِنَ الْإِبْرِيْقِ سَائِلَ أُسُودٍ أَشْبَهَ بِالزَّيْتِ، كَانَ كُلُّ مَا يَصْبُ عَلَى  
 نَفْسِهِ كَانَ جِسْمَ نَادِرِ الذَّائِمِ يَصَابُ بِتَشْنِجَاتٍ عَنِيْفَةٍ وَلَمَّا  
 يُوَقَّفُ صَبَّ السَّائِلُ يَطْلُعُ دُخَانٌ مِنْ جِسْمِ نَادِرِ الْنَائِمِ كَأَنَّهُ  
 يَبْتَحْرِقُ، فَضَلَّ طَيْفَ نَادِرٍ يَكْرُرُ نَفْسَ الْأَمْرِ لِحَدِّ مَا السَّائِلُ  
 خَلَصَ، بِصَ لِهَالَةِ إِلَيَّ إِبْتَسَمَتْ بِبِرَاءَةٍ وَقَالَتْ:

هالة: إتبع الدليل يا نادر

إتبع الدليل وإقبل التغيير

نادر: يعني إيه؟

هالة: هنتقابل تاني يا نادر قريب، أنا همشي بس ما  
 تنساش تتبع الدليل وتقبل التغيير

إخدتت هالة وهم طيف نادر بالعودة لجسد نادر النائم  
 لكن إستوقفه مشهد لغت نظري أذا كمان كمشاهد، شوفت  
 حاجة بتحفر جسوا الحيطه وعاوزه تخرج، ولما ركزت  
 شوفت ضوافر صغيرة، قلبي إتقبض جداً وأنا بتخيل شكل  
 الوحش أو الجن إلابي هيخرج من الحيطه.

كذت أنا وطيف نادر في حالة تجمد الثواني بتعدي  
علينا ساعات في إنتظار خروج الوحش من الحديقة لحد  
ما خرج.

بدون تريقة الوحش لم يكن سوى فارس، أيوة زي ما  
بقولكم كدة فارس أسود داكن جداً، وإبتسمت من سخافة  
الموقف وتابعت الفارس بعينيا إللي قرّب من طيف نادر  
وإستغربت إنه شايفه، حاول طيف نادر إنه يداعب الفارس  
بشكل طفولي لكن لاحظت إن الفارس عمال يتحرك لمكان  
ويرجع لطيف نادر ثاني أكثر من خمس مرات وكأنه  
بيقوله تعالى ورايا، الرسالة وصلت لطيف نادر وبالفعل  
خرج ورا الفارس من باب أوضته وأنا وراهم.

برا أوضة نادر مكانش البيت، كان منطقة نائية مُقفرة  
جداً بيتوسطها بئر، هو نفس البئر إللي إترميت فيه.

طبعاً طيف نادر كان بيتعرف على البئر لأول مرة يعني  
مشافوش قبل كدة زي ما أنا شوفته، يعني أقدر أقول إن  
إللي بشوفه دلوقتي ده عبارة عن فلاش باك لحاجة حصلت  
قبل ما أعرف أي حاجة عن البئر ده، بس الغريب إنها لو

فلاش باك إزاي أنا مش فإكر حاجة من الكلام ده، توهتوا  
مني صح؟

تعالوا معايا واحدة واحدة كدة، البير أنا أعرفه، لكن  
الطيف مايعرفوش فده دليل إنه لسه مجاش البير وإللي  
حصل ده حاجة قديمة بس في نفس الوقت الحاجة القديمة  
دي أنا مش فإكرها خالص.

على العموم أصبروا وكل حاجة هتوضح أكثر.

الفار جري بسرعة ونظ في البير، طبعا طيف نادر  
بدون تفكير جري وراه علشان يلحقه ووطى يبص في  
البير لقي في وشه ربح شديدة خارجة من البير وقعته  
على ضهرة في الأرض، ومن البير خرج كيان أسود مخيف  
غير متناسق بيصدر صوت مرعب خارج من البير وشايل  
جسد نادر إللي إحنا سايبينه نايم على الكرسي في الأوضة.  
إنحني الكيان المخيف ووضع جسد نادر النائم على  
الأرض، ولقيته ركع، مكانش بيركع لنابر ده كان بيركع لحد  
واقف الناحية الثانية من البير، دقت نظري في الضلعة  
علشان أعرف هو بيركع لمين فكانت الصدمة الكبرى



كساب!!!!

أخر شخص كنت أتوقع إنني أشوفه، أصابني حالة من اللخبطة الشديدة، أما طيف نادر فلو قولتلكوا إنه جاله إنهيار عصبي مش هكون ببالغ، كان بيجري زي المجنون هنا وهناك يطلع فوق الأرض ينزل يدبذب زي الأطفال ويصرخ..إذت..إذت..إذت!!!

إبتسامة كساب كانت كفييلة إنها تدب الرعب في طيف نادر وفيًا أنا كمان كمشاهد وفي الجثة المرمية في الأرض لو صحيت.

شكيت لوهلة أن كساب شافني لكني بعدها أتأكدت أنه كان بيبص لطيف نادر وهو واقف جنبي.

أطلق كساب ضحكات زلزلت المكان حرفياً.

قد إيه برغم إنه في الآخر بشر إلا إنه له سطوة مُرعبة ويطش هائل!

طيف نادر: أنا مش فاهم حاجة إذت بتهبب إيه هنا؟

كساب (سأخراً): أصبر عليًا يا صديقي العزيز لما أخترق وتحترق

طيف نادر: تخرق إيه ومين إلهي يحترق؟!

- بنظرة وبإشارة من كساب إنطلق الكيان الأسود المرعب على جسد نادر النائم وتحول هذا الكيان المخيف إلى غبار أسود فضل ينكمش لحد ما رجع لصورة الفار من جديد.

هجم الفار على وش نادر النائم وبأيديه الصغيرة فتح بوق نادر ودخل جواه.

رجعت الرعشة من جديد لجسد نادر وصاحبها المرة دي نوبة ترجيع لسائل أسود بيخرج من بوق نادر(نفس السائل إلهي طيف نادر صبه على نفسه).

كان طيف نادر واقف بيرتجف من المنظر وأنا كنت بتمنى أفوق من الكابوس ده وعمال أسأل إيه دخل كساب بجواب هالة؟!

أنا هتجنن إيه العلاقة بينهم؟ ماهو لو إلهي في بالي صح وكساب سخر هالة وخلاها طعم يجيبني به يبقى

الموت عندي أهون مليون مرة من إنني أكتشف تواطؤها  
مع عدوي اللدود.

قطع كساب دوامة تفكيري وهو يقول لطيف نادر:  
كساب: فضيتك ممكن بقى نتكلم تحب نبدأ منين؟  
أقولك إذا حكيتك وهريحك.

أنا المرادي يا نادر جايلك مخصوص عدشان أطبع عنك  
أقدر ذكريات في ذهن كل حبايبك، أمك، أخذك، مختار  
الأهبل، لطفي الموميا، حرمانا المصون مروة، وأي حد تاني  
كان شايف فيك لا مؤاخذة قدوة هخليه يلعن اليوم إلهي  
شافك خلقتك فيه، وماتسألنيش إزاي إنت هتشوف كل ده  
بعينك هتفوق هتلاقي أزبل نسخة منك في طريقة تعاملك  
معاهم، لأ وإيه إنت هتكون مقتنع تماماً إنك كدة صح وإن  
كل إلهي حوالياك شوية حوش وحشرات علاجهم الدهس  
حتى حوارنا مع بعض ده مش هتفتكر منه ولا حرف.

طيف نادر (مصدوما): مستحيل أبقى كدة!!

كسّاب(ضاحكاً): لأ هتبقى كدة ونص، إنت هتصحى يا صديقي تلاقي نفسك نسخة بالكربون مني وأوعدك أني هكون معاك لحظة بلحظة بس في صورة راجل عجوز طيّب من الناس الهيلة إللي بتاكل عقلهم بحواديت قبل النوم بتاعتك وهيكون إسمه الدليل.

إكتفيت ولا تاخذ تاني؟ بص ياسيدي إللي ظهرتك دي مش هالة بتاعتك، بس أوعدك حبيبة القلب هتظهر بجد وهخليك تخسرها زي ما هتخسر كل دايرة معارفك المتخلفة، وسواء إفتكرت حوارنا ده أو ما إفتكرتوش أحب أقولك أنا علّمت عليك وبالقوي، وأسطورة إن الخير لازم ينتصر على الشر إللي بتضحكوا على الفقرا بيها أنا دمرتهاك، ولو عنذك الشجاعة بعد ماتفتكر كل حاجة إطلع وإحكي للناس.

ونزل كتب وإكسب منها وقول للناس نادر إبن المعلم فودة إتهزم يا رجالة.

تم انفجر كسّاب ضاحكاً ضحكات جنونية هيسديرية.

طيف نادر: عمرها ما كانت دي النهاية دي حياالله جولة  
ماكملتش وإنت نهيتهها بدري علشان عارف إن النهاية  
دايماً مش في صالحك

كسّاب (بعصبية): طب كفاية شعارات بقى وبطل وش  
وسيبني علشان أطفحك طعم الهزيمة دلوقتي بمزاج.

- توجه كسّاب نحو جسد نادر الذائم وقام بجرح كف  
يده وعصرها بالقرب من قم نادر المُستلقي على الأرض،  
رجعت التشنجات من جديد لنادر، والمرادي طيف نادر  
كمان فضل يتهز ويترعش ويختفي ويعود للظهور بصفة  
متكررة.

كسّاب:

- توحدت أرواحنا

- توحدت دماننا

- سيطر دمي الفاسد على دمك الماسخ

- بإسم الوقاد الأب الذي خشعت له قبائل الجن

- بإسم أبي الذي رضخ لسطوته أهل الأرض

- بدعم خُدّامي المخلصين

- وبدعم الجن المقربين

- أقسم على هذا الجسد وهذا العقل أن يُصبح مكروهاً  
ويُمسي منبوذاً

- إنه بحق راسخ وأبانوخ وعزازيل وملك الأباطيل، إنكم  
تعلمون أن ذلك الملعون قد أذاني في نفسي وفي أبي  
فأجيبوا دعوتي وحققوا مُنيّتي.

- توحدت أرواحنا

- توحدت دمائنا

- سيطر دمي الفاسد على دمك الماسخ

- بإسم الوقاد الأب الذي خشعت له قبائل الجن

- بإسم أبي الذي رضخ لسطوته أهل الأرض

- بدعم خُدّامي المخلصين

- وبدعم الجن المقربين

- أقسم على هذا الجسد وهذا العقل أن يُصبح مكروهاً  
ويُمسي منبوذاً

- إنه بحق راسخ وأبانوخ وعزازيل وملك الأباطيل، إنكم تعلمون أن ذلك الملعون قد أذاني في نفسي وفي أبي فأجيبوا دعوتي وحققوا مُنيّتي.

فضل كسّاب يقوم قد الكلام ده عشر مرات ويعصر دمه أكثر في فم نادر!

بدأت الصورة تتشوش وضباب يملئ المشهد وأخر حاجة شوقتها طيف نادر وهو بيتوحد مع جسده الذائم، أما أنا كمُشاهد فحسيت إن الصورة بتختفي تدريجياً من قدامي والدنيا بتضلم.

[HTTPS://T.ME/MKBTARAB](https://t.me/mkbtarab)

[HTTPS://T.ME/MK1BTARAB](https://t.me/mk1btarab)



الفصل الثالث عشر

(توبة مُتأخرة)

[HTTPS://T.ME/MKBTARAB](https://t.me/mkbtarab)

صداع شديد وألم رهيب في كل حثة في جسمي، فتحت  
 عنيا بصعوبة لقيتني في قاع البير جسمي مزيان كدمات،  
 وأدركت وقتها إن نادر المتفرج إختفى وطيف نادر إختفى  
 هو كمان، وإن إللي باقي هو أنا نادر فودة الصحفي  
 بجريدة عمق الحدث باب ما وراء الطبيعة، الصحفي  
 البائس المهزوم المذكس الرأس.

كنت عاوز أصرخ لكني مش قادر، نفسي أزعق وأقول  
 إلحقوني صوتي بمش طالع، شوفت من فوق من عند فوهة  
 البير حوالي خمس أشخاص مش قادر أتبين ملامحهم  
 يبصوا عليا وحبل متعلق وواحد بيذل عليه وبيقولهم  
 يارب يكون لسه عايش الإرتفاع يا جماعة عالي أوي، هو  
 إزاي وقع في البير كدة ولا حد زقه ولا إيه؟

دي آخر حاجة فاكرها لأنني فقدت الوعي تاني بس  
 المرادي كان نفسي ما أصحاش تاني وأموت لأنني مش  
 عارف هواجه الناس إللي أذيتهم إزاي بعد ما أفوق.

يارب.. يارب.. كلمة بقالي كثير ما قولتهاش، واضح  
 إنني إنتهكت كل المحرمات في فترة سيطرة كساب عليا،  
 يارب إجعلها دي نهايتي علشان إللي زيي ما يستاهلش في

الحياة فرصة تانية..أنا ما أستاهلش أي شفقة أو تعاطف  
من أي حد..أنا عاوز أموت..عاوز أموت.

صوت أجهزة الرعاية المركزة بيتسلل لوداني من بعيد  
وحرب دايرة بيني وبين عدو مجهول، أنا بعافر علشان  
أفتح عنيا وأفوق وعدوي بيمنع ده بكل قوته وبيقولي  
استلم يا نادر

إنتصرت في الحرب دي وقدرت أفتح عنيا لقيتني على  
السرير في غرفة العناية المركزة في مستشفى، وواقف  
قدام السرير أمي الباكية، أمنية، الحاج مختار، علا ومعاهم  
مروة وخالتي صفية.

بمجرد ما فتحت عنيا بدأوا يتسرسبوا واحد ورا التاني  
وكلهم بيقولوا لأمي: حمدلله على سلامته يا حاجة، أمي  
دموعها مفارقتش خذها.

نادر(متحدثاً بصعوبة): مكنتش أنا صدقيني يا أمي..  
صدقيني..أنا معملتش أي حاجة من ده يا ماما..أبوس إيدك  
بلاش سكوتك ده.

[HTTPS://T.ME/MKTBTARAB](https://t.me/mktbtarab)

- إلتزمت أمي الصمت وإكتفت ببكائها

نادر: إنتوا نفسكوا كلكوا كنتم بتقولولي إنت مش نادر

صح.

يعني إنتوا كنتوا واثقين إن إلسي بتتعاملوا معاه ده واحد تاني غيري، طلع كلامكوا صح أنا كان متسيطر عليًا من شيطان بيني وبينه تار قديم ما بيسقطش بالتقدم وكنت نأسيه ومش فاكر أي حاجة عنده.

والدة نادر: ويفيد بإيه ده يا بني؟!

إرتاح دلوقتي ولما تصحى ربك يعدلها ويكون الشيخ لطفني فاق من الغيبوبة إلسي إنت سببتها له! ربنا يسامحننا كلنا.

نادر: ماتسـيبينيش يا أمي أنا مش باقي ليًا في الدنيا غيرك، حتى أختي أنا قضيت على حياتها، وأديكي بتقولولي الشيخ لطفني كمان، بالله عليكـي خليكـي جذبي، أمي ماتبصليش كده، حرام عليكوا.

(- إنهار نادر وفضل يصرخ: بلاش كلكم تسيبونني هو عاوز كده، ماتبقوش إنتوا وهو عليًا، لو عاوزني أنتحر قولولي...)

- دخل الدكتور بسرعة وأنا في حالة الهياج دي وحقن  
المحلول إلي متعلق بمادة مكنتش محتاج وقت علشان  
أعرف إنها مخدر لأنني توهمت وغبت عن الوعي في لحظات...  
رجعت البير ولمحتها من بعيد، لمحتها قاعدة لبسها  
متقطع وجسمها مليان جروح، حاولت أقرب منها علشان  
أقولها سامحيني يا هالة، وبلاش تسيبيني إنتي كمان، كنت  
كل أما أقرب منها كانت بتبعد وتبصلي بمنتهى الحزن  
وما بتتكلمش وكأنها بتنفذ وعدّها الأخير ليا إن ده لقائنا  
الأخير... هالة... أنا... اسمعيني... أنا... هالة... هالة....

(أول حاجة عملتها لما فوقت تاني طلبت إنني أشوف  
مروة، جاتلي المستشفى..)

نادر: أنا عندي سؤال واحد

مروة: إتفضل يا نادر، المهم تكون نادر إلي أعرفه

نادر: إنتي جبتي مدين كل الحكاية بتاعة البير؟ تخريف

صح؟

مروة: ماشي ياسيدي مقبولة منك علشان تعبان، أنا لا

ألفت ولا خرفت ولا غيره

نادر: أمال إيه!

مروة: قصة البير دي حقيقية بالكامل

نادر: وروحتي تشوفها علشان تخليني أنزل البير،  
على العموم هو فعلاً له دور في إني فوقت من إلهي كان  
مستحوذ علياً وإلهي طلع (جوز حضرتك المختفي) بس  
يردو مش فاهم عرفتها إزاي؟!

فتحت مروة شسنتطتها وطلعت جواب لنادر وقالتله:  
إفضل ده جواب بالحكاية كلها كان المفروض إنه جايلك  
علشان تروح تحقق فيه وكله عن قصة البير بالكامل!

نادر: ووقع في إيدك إزاي؟!

مروة: مش هتزعق؟

نادر: لأ أنا تعبان أصلاً وبتكلم بالعافية يامروة.

مروة: عم مديولي الساعي إلهي عندك بيفتح الجوابات  
إلهي بتجيلك على طول وبيقراها من باب الفضول، هو  
بيقول إنه تاب من كل حاجة إلا إنه يقرأ الجوابات إلهي  
بتجيلك... مش عارف يبطل دي.

ولما أمدية أخذك جمعت كل الناس إلي بيتعاملوا معاك  
هو طلع الجواب ده وحكى لنا على كل حاجة فيه وهو إلي  
اقترح السيناريو يمشي إزاي من أول إنني أعمل نفسي  
فرح صاحبة الجواب لحد ما نقنعك تنزل البير بالذوق أو  
نشيك و نرمىك في البير بالعافية!

، أمدية جمعت الكل علشان تلحقك يا نادر

نادر: الله..الله ده إنتوا عصابة بقى!!!

مروة(ضاحكة): بس عصابة حلوة كان كل هدفها  
تلحقك من الطريق الأسود إلي إنت دخلته، طب تصدق

بالله يا نادر؟

نادر: لا إله إلا الله

مروة: أنا قولتلهم إن كساب ورا كل إلي كنت فيه  
وكلهم قالوا لا كساب أذاه مباشر عن كدة، قولتلهم طبعاً  
لا كساب عمره ما هيفضر نادر ضرر مباشر أبداً، كساب  
ونادر عاملين زي القط والفان محدش فيهم هيفرح بموت  
التاني، لكنهم بيستمعوا إنهم يعلموا على بعض، وكلامي  
طلع صح.

نادر: إيه الحكمة دي كلها يامروة؟!

مروة: مش حكمة ولا حاجة أنا عشت معاه وعاشرته  
وحافظاه وحافظاك إنت كمان يانادر.

وعلى فكرة إللي أكدلي إن كسّاب ورا إللي حصل إنهم  
بيقولوا إن كل ما سيرته كانت تيجي قدامك تقول إنك  
متعرفش حد بالإسم ده!

وده معناه إنه كان بيلعب ماتش معاك بس ماتش كان  
سخن من أول دقيقة، كان نفسي النتيجة تكون لصالحك،  
بس معلش الدنيا غالب ومغلوب مرة فايز ومرة خسران،  
والمرادي إذا كنت إنت خسرت ف الجايات كثير تلعب  
وترجع نادر إللي نعرفه وتكسب وتردهناله يا نادر.

نادر: ومين قالك يامروة إني خسرت؟ بالعكس أنا  
كسبت كثير أوي..

مروة: إزاي

نادر: أنا فوقت من الغرور إللي كان بدأ يسيطر عليا  
أنا عرفت غلاوتكم عندي وإني من غيركم ولا حاجة،  
ومهما كبرت ما أكبرش عليكم.



أنا عرفت أن في حرفياً ناس ممكن تضحي بنفسها

علشانني

أنا عرفت إن النجاح جميل بس مش لدرجة أنه ينسيني  
أنا مين ومستأول عن مين وعرفت إن طريق ربنا هو الطريق  
الوحيد الصح.

وكفاية إنني عرفت قيمتي عنديكم كلكم.

سامحيني للمرة المليون يامرودة، أنا عمري ماهنسى  
الضرر إللي أنا سببتهولك لما خدتك معايا بيت الملعون  
الوقاد واحد دلوقتي بسبب لك كل المشاكل دي!

مرودة(ضاحكة): إنت لسه فاكر، خلاص بقى أنا بقيت  
حرم الملعون الإبن على سن ورمح، وفي حكم المطلقة  
عادي، ركز بس في صحتك وقرب من أمنية يا نادر، أي نعم  
صحتها رجعتها ورجعت صغيرة، بس نفسياً الشرخ إللي

إنت إتسببت فيه محدش يعالجه غيرك

نادر: عندك حق يا مرودة.

[HTTPS://T.ME/MKTBTARAB](https://t.me/mktbtarab)

مروة: وعُلا دي غلبانة لو مش ناوي تتجوزها سيبها  
 ماتعلقهاش بيك، دي بنت حساسة جداً وواضح إنك  
 بهدلتها جامد معاك!

نادر: أنا عمري مافكرت فيها غير كزميلة، القرف إلي  
 حصلي هو إلي خلاني أتلاعب بمشاعرها، أنا مش طايق  
 نفسي بجد!

مروة: هي ملهاش ذنب، صارحها بده يا نادر  
 وأخيراً هالة... إحنا كلنا خلاص عرفنا حكايتها من  
 الشيخ لطفي دي الوحيدة إلي مش عارفة أقولك إيه عنها،  
 بس من الواضح إنها إتجرحت جرح كبير أوي وإنت بردو  
 السبب فيه يا نادر بكل أسف

نادر: ماهي علاقة غريبة هي شبح وأنا بشر وأنا فعلاً  
 دبحتها بسكينة تلمة

مروة: إننت إرتضيت بالعلاقة دي من الأول يا نادر،  
 ماتجيش دلوقتي تقولي إنها علاقة غلط وغريبة.

نادر (مُبتسماً): وكان أنا أول مرة، أشوفك يامروة أنا  
 فرحان بالتغيير إلي حصلك ده، وخلصني فخور إن ليّا

بنت خالة وأخت بالعقل والحكمة دي وكلامها كله صح  
وأقدر أرجعها زي ما يرجع لأمنية بالضبط في كل  
مشاكلي.

مروة: إحنا بنكبر يا نادر، وكل يوم بيمر علينا بنتعلم  
فيه خبرات جديدة وبننضج وبنتغير، أنا هسيبك ترتاح  
علشان أروح أتطمئن على ماما، بصراحة أهل البلد هنا  
كرمهم مفيش منه وفاق الوصف، دول فاتحين لنا بيوتهم  
من وقت ما جينا ولا الفنادق...

نادر: أه والله كتر ألف خيرهم إحنا طولنا عليهم وإحنا  
عددنا كثير بردو.

مروة: ولازم تردلهم يا نادر الجميل!

نادر: أكيد طبعاً، هاتي الجواب، وأول حاجة هعملها إن  
شاء الله أول ما أخف إنني أفك اللاغز وأساعدهم بكل طريقة  
أقدر عليها....

خرجت مروة وسأبتني محمل بتأنيب ضمير أكثر  
وحزن أعمق، هتسألوني الناس فين؟ هقولكم:

- عُلا إستقالات من الجورنال وإختفت تماماً وبعثتلي

رسالة نصها:

إنها مش عايزة تشوفني في حياتها صديقة أو حتى  
بالغلط، وحسبي الله ونعم الوكيل.

- الشيخ لطفي فسي غيبوبة تامة، بي فصلني عنه  
سريرين في غرفة العناية المركزة.

- عم مختار سافر من نص ساعة البلد من غير حتى ما  
يودعني، بس أكيد هيرجع على الأقل علشان يتطمئن على  
الشيخ لطفي.

- أمي وأمنية موجودين بيدخلوا يتطمنوا عليا، كل  
شوية ولا زالت أمنية صامتة تماماً برغم إنها رجعت لشكلها  
الطبيعي هي وعُلا.

- عم مدبولي إختفى وإختفى معاه الكتاب!

السؤال إللي إنتوا بتفكروا فيه أنا بردو بفكر فيه، هل  
خد الكتاب علشان يخلص منه ولا رجعت ريما لعادتها

القديمة؟

[HTTPS://T.ME/MKTBTARAB](https://t.me/mktbtarab)  
وهيرجع مدبولي بتاع زمان.

أنا حاسس إن كلها يومين ثلاثة أو حتى أسبوع وهرجع  
مكتبي وألاقيه في خلقتي بيقولي جملته الشهيرة «  
ما تكتب عندي بقى هاهاهاها» على إعتبار إنني مش كاتب  
عنه يجي أربع خمس مرات لحد دلوقتي.

-أما عن عدوي اللدود كساب فأنا لحد دلوقتي مش فاكر  
غير وإللي حكيته لكم إللي معنديش أي دليل ملموس إنه  
أصلاً حصل يعندي ممكن أكون واهم ودورت على شـماعة  
أعلق عليها كل ذنوبي الأخيرة.

مش هدخل في الدوامة دي علشان مش ناقص دوامات!

[HTTPS://T.ME/MKBTARAB](https://t.me/mkbtarab)

[HTTPS://T.ME/MKTBTARAB](https://t.me/mktbtarab)

الفصل الرابع عشر

(أوراق أخيرة)

[HTTPS://T.ME/MKBTARAB](https://t.me/mkbtarab)

الثلاثاء صباح اليوم التالي، الغرفة ١١ بالمستشفى العام بالفيوم  
 نادر جالساً على سريره وأمامه أوراق وأقلام وشرايط  
 كاسيت وجهاز تسجيل صغير ويقوم بالتسجيل على أول  
 شريط مكتوب عليه بخط عريض (الخشارة الكبرى).  
 وبدأ التسجيل قائلاً:

- أدرك أن معركتي القادمة مع نفسي
- أدرك أن عليّ أن أرمم كل ما قُمت بتدميره
- أدرك أن عليّ أن أعالج كل من قمت بإذائه
- أدرك أن عليّ أن أعتذر لكل من أسأت إليه
- أدرك أن عليّ إصلاح ماتم تخريبه.

وفي مقدمة تحقيقي أتوجه إليكم بسؤال هام: هل  
 كل من أوجعناهم (حتى وإن كُنّا تحت أشد الظروف  
 والضيغوط) هل يمكننا أن نعود إليهم ونقول لهم بمنتهى  
 البساطة سامحونا... فيسامحونا!!!



أنا لا أعتقد ذلك وأرى أنني قد أحدثت شرخاً كبيراً  
أصبح من الصعب أن يُرمم مهما كانت الظروف ومهما  
كانت الأسباب.

كان معكم رفيقكم نادر فودة الصحفي بجريدة عمق  
الحدث باب ما وراء الطبيعة.

دخلت الممرضة علياً بأجمل بوكية ورد شـوفته في  
حياتي، قلبي قال لي إنه من علا.

أخذته منها وفضلت ترغي وأنا بدور على الكارت مش  
مركز معاه، ملخص كلامها إنها من المتابعين ليّا بشغف  
وتقريباً عندها كل أعداد الجورنال من أول ما أنا إشتغلت  
فيه، لاحظت الممرضة إنني بدور على الكارت وبصتلي  
بُخْبُت وقالتي: تدفع كام وتأخده؟

إبتسمت إبتسامة مُصطنعة: إللي تطلبه ياستي.  
خرجت الممرضة من جيبتها كارت وإدتهولي أخذته  
منها بلهفة زي الطفل وقريرت المكتوب فيه..

(حمد لله على السلامة يا نادر وملتقي في جولات  
أخرى...كسّاب).

رمىت بوكية الورد في وش الممرضة بدون وعي، وزعقت، خافت مني وطلعت تجري، ودخلت على صوتي أمنية أختي بمجرد ما شوفتها بكيت زي الطفل وإترميت في حضنها وإترجيتها تسامحني.

الحقيقة كعادة أمنية هي أحسن وأكرم بكثير، في لحظة هي نسيت كل حاجة ولاحظت إني ماسك الكارت ومكلبش عليه بإيدي، خدته بالراحة من إيدي، بصت فيه وقطعته ورمته في صندوق الزباله.

نادر: كساب هو إلي خلاني أعمل كل ده فيكم، هو إلي سيطر عليا أنا عمري ما أعذكي يا حبيبتي لو آخر يوم في عمري، سامحيني أرجوكي.

أمنية (باكية): مصدقك ياخويا ومسامحاك وحتى لو مكذتش رجعت لنادر القديم برود مسامحاك

نادر: الملعون إتش كل لي بمليون شكل، مرة راجل عجوز، مرة هالة، مرة وحش ومرة بشكله الحقيقي، بس المرة الوحيدة إلي مش قادر أفهم تفسيرها لما جه وإنتم موجودين عند البير ووقف يقول طلاسّم وهو مستحبي

وسط الغاب ومش ظاهر منه غير صورة غير مكتمله، كان  
غرضه إيه؟

أمنية: تقصد مين؟

نادر: كسّاب، أنا مش عارف هو منين عمل كل ده وجه  
في الآخر يساعداكم في إنقاذي ولا هو فعلاً عاوز أعيش  
علاشان يكمل عليّا!

أمنية: يا نادر مين قالك إن إلي كان واقف وسط الغاب  
كسّاب؟

نادر: طبعاً هو مفيش غيره

أمنية: يا حبيبي ده واحد ثاني مش فاكراة إسمه إيه

نادر: واحد ثاني مين؟!

أمنية: أصبر بس هفتكر إسمه... أصبر

نادر: إسمه إيه يا أمنية؟

أمنية: ما إنت مش مديني فرصة أفكر... أصبر

نادر: أديني سكتّ أهو فكري بقي.

بعد مدة بسيطة صرخت أمنية وقالت لنادر: إفتكرت  
إسمه علي ما أنذكر عادل كرم فخر الدين

نادر: مين؟

أمنية: لا إسـتـنى، إفتكرت إسمه عادل كرم الدين... أول مرة أسمع يا نادر الاسم ده، هو مين ده يا نادر

يا نادر... إنت سكتّ ليه؟

يا نادر... يا نادر... نادر

نادر: هاه يا أمنية... بتقولي حاجة!

أمنية: مين عادل ده؟

نادر: ما تاخديش في بالك يا حبيبتي، اسنديني يا أمنية عاوز أخرج برا الرعاية، عاوز أطلع أقف في أي حدة محتاج أشم هوا نضيف بعد ما الهوا إتمنع عني طول سنة فانت...

مشت

الفهرس

[HTTPS://T.ME/MKBTARAB](https://t.me/mkbtarab)

٧	..... (مقدمة)
١٣	..... الفصل الأول (عودة مدبولي الساعدي)
٢٣	..... الفصل الثاني (لا زلت أنسة)
٤١	..... الفصل الثالث (طوق نجاه)
٥٥	..... الفصل الرابع (لا يفل الحديد إلا الحديد)
٦٣	..... الفصل الخامس (لقاء عابر)
٧٥	..... الفصل السادس (ليالي الأرواح الضالة)
١٢٣	..... الفصل السابع (حوارات عبثية)
١٤٥	..... الفصل الثامن (غضبة الموتى)
١٧٧	..... الفصل التاسع (تربية مشايخ)
١٩١	..... الفصل العاشر (بيوت مسكولة)
٢٢٥	..... الفصل الحادي عشر (العصابة والبئر)
٢٣٣	..... الفصل الثاني عشر (الأبـم)
٢٤٩	..... الفصل الثالث عشر (توبة متأخرة)
٢٦٣	..... الفصل الرابع عشر (أوراق أخيرة)

نعتذر عما التوقد من النشر على القنوات الاخرى مؤقتاً

الاشخاص البتفاعلين وأصحاب القروبات

سيحصلوا على نسخة

عالية الجودة وبدون طباعة اى دعايا عليها

تلقرام

<https://t.me/MktbtArab>



للشراء والبيع

[HTTPS://T.ME/MKTBTARAB](https://t.me/MktbtArab)